

EHMEDÊ XANÎ

منتدی اقرأ الثقافی

[www.iqra.ahlamontada.com](http://www.iqra.ahlamontada.com)

**MEM Û ZÎNE**



KURMANCÎ RA ÇARNAYÎŞ

**MURAD CAŇŞAD**



[www.iqra.ahlamontada.com](http://www.iqra.ahlamontada.com)

بۆدابه زاندىنى جۆرلەر كىتاب: سەردانى: (مُنْتَدَى إِقْرَأِ النَّقَافِي)

لتحميل انواع الكتب راجع: (مُنْتَدَى إِقْرَأِ النَّقَافِي)

پدای دانلود كىتابهای مختلف مراجعه: (منتدى اقرا الثقافى)

[www.iqra.ahlamontada.com](http://www.iqra.ahlamontada.com)



[www.iqra.ahlamontada.com](http://www.iqra.ahlamontada.com)

للكتب ( كوردى ، عربى ، فارسى )



EHMEDÊ XANÎ

# Mem û Zîne



Kurmancî ra çarnayîş: Murad Canşad

**Roşna I Şîrî**

**Weşanxaneyê Roşna: 50**

**Şiirî: 9**

Ehmedê Xanî

Mem û Zîne

Kurmancî ra çarnayîş: Murad Canşad

Çapa Yewine, Diyarbekir, 2018

**Edîtor-Redaktor:** Roşan Lezgîn

**Mîzanpaj:** Weşanxaneyê Roşna

**Xebata Qapaxî:** Şemal Medya

**Çapxane:** Berdan Matbaası

Davutpaşa Cad. Güven Sanai Sitesi C Blok No: 239

Topkapı / İstanbul

Tel: 0 212 613 12 11

**ISBN:** 978-605-68625-1-9

*Daşinasnayîş ra teber bê destûrê weşanxaneyî  
bi tu hawayî nîno kopyakerdîş û vilakerdîş!*

**Adres:** Elazığ cad. Diyar Galeria C blok, Kat: 3, No: 9

Yenişehir / Diyarbakır

Tel: 0 412 223 03 69

rllezgin@hotmail.com



**Ehmedê Xanî** 1651 de Bazîd de ameyo dinya û 1707 de nîncî Bazîd de şiyoy rehmet. Tirba ci nika Bazîd de corê Qesra Îshaq Paşayî de ya. Tarîxnasî vanê eslê înan dewa Çelê Xan ra yo, eşîra înan ra "Xanîyan" ameyo vatiş, coka ey ra vato "Ehmedê Xanî". Nameyê babîyê ci Îlyas, nameyê dadîya ci zî Gulnîgar a. Verî Bazîd de Medreseyê Muradîye de dest bi wendiş kerdo, dima Exlat, Ruha, Bidlîs, Cizîre, Bexdad û Misir de tehsilê xwu tamam kerdo û ageyrayo Bazîd. Uca muderisiye kerda û eynî wext de katibê Mîr Mehemedî biyo. Ehmedê Xanî zîwanê ke o wext muhîm bî ra erebkî, fariskî, tirkî û kurmanckî zaf baş zanayê. Eserê xo bi kurmanckîyêka zaf fesîhe nuştê ke ewro zî zaf weş fam benê. Eserê ey ke resayê ewro enê yê:

1-*Nûbihara Biçûkan*, 1683

2-*Eqîdeya Îmanê*, 1687

3-*Mem û Zîn*, 1695

4-*Dîwan* (şîrê muxtelîfî)

**Murad Canşad** 1974 de dewa Puluî Derwêşan de ameyo dinya. Domantîya ey dewe de vîyarte. Mektebo verîn û mîyanîn Pilemurîye de mektebê pansîyonî (yatılı okul) de wendî (1981-1989). Dima Xarpêt de lîse wende (1990-1993). 1993 de dest bi Fakulteya Îlmê Sîyasetî ya Unîversîteya İstanbulî kerd. Wexto ke unîversîte de wendêne mîyanê organizasyonê sîyasî yê îllegal o bi nameyê Yewîya Ciwananê Kurdistanî de xebitîya. 1995 de ame tepîştîş. Badê ke des serrî mehkeme bi, peynî de cezaya muebedî girawte. Hepisxaneyan de Fakulteya Ekonomî (Açık Öğretim) ya Unîversîteya Anadolu ra mezûn bî.

Murad Canşadî hepisxane de dest bi nuştîşê kirmanckî (zazakî) kerd. Hetanî nika gelêk hîkaye û meqaleyê ey kovar û rojnameyanê çîya-çîyayan de bi kirmanckî û tirkî weşanîyayê. Kitabê eyê hîkayeyan ke weşanîyayê enê yê:

1-*Xafilbela*, Weşanxaneyê Vateyî, İstanbul, 2008

2-*Hesê Mişî*, Weşanxaneyê Roşna, Diyarbekir, 2013

3-*Waştî*, Weşanxaneyê Roşna, Diyarbekir, 2015

## VATEYO VERÎN

Ehmedê Xanî (1651-1707) îlhamê xo destanê neteweyî yê kurdan *Memê Alan* ra girewto û *Mem û Zîna* ke sertacê edebîyatê kurdan a bi kurmancî nuştta. No şeheser hetanî nika ziwananê miletanê bînan ra çarnîyayo almankî, armenîkî, erebkî, rûmkî û rûskî ser. Diyalektanê kurdkî ra çarnîyabî sorankî, bi hewramkî zî xwura rewna ra *Mem û Zîn* nusîyaya. Helbet bi zazakî zî *Mem û Zîne* nusîyaya la şaheserê Ehmedê Xanî ke 60 qisiman û 2657 beytan ra yeno pê, nêçarnîyabî zazakî ser.

Serranê 1990an de wexto ke mi hema lîse de wendêne, înkâr û qedexeyê ke kurdkî ser o estbî, bineyke bîbî sist, bi kurdkî tek-tuk kitabî, kovar û rojnameyî, kasetî vejîyayêne. Ehmedê Xanî eserê xo 1695 de tamam kerdo, 1995 hîrê sey serrîya nuştîşê eserî bîye, coka tayê aktîvîteyî organîze bîyêne. Ê wextan ez Ehmedê Xanî û eserê ci *Mem û Zîne* ra bîya xeberdar. Labelê ez gêrîyaya, kewta peyê beran. Çend serrî badê pey zere de ancî hişê mi şî *Mem û Zîne* ser. Nusxeyo ke Mehmed Emîn Bozarlanî bi kurmancî û tirkî amade kerdbî, mi o kitab girewt la seba ke kurmancîya ci mi rê giran ameyêne, mi tenya qismê tirkî wend. O wext yew çî nuqitîya zerrîya mi, gelo beno ke merdim nê eserî biçarno zazakî ser? O çîyo ke nuqitîya mi zerrî, bî kurne, bî hope, bî gole, bî dengîz...

Serre bîye 2015, mi vat ez nê eserî çarnena zazakî û ez kewta çimeyan dima. Teber a birayo delal Yûsuf Eldemir esto, mi hal û mesele ci rê nuşt, keyeyê ey awan bo, ey zî çimeyî peyda kerdî û mi rê rusnayî. Çarnayîş de mi enê eseran ra îstîfade kerd:



- Ehmedê Xanî, *Mem û Zîn*, Wergera Tîpên Latîni û Kurdîya Xwerû: M. Emîn Bozarslan, Weşanên Deng, Çapa 3., İstanbul 2010

- Ehmedê Xanî, *Mem û Zîn*, Çeviri ve Kavramsal Tahlil: Kadri Yıldırım, Avesta Yayınları, İstanbul 2010

- Ehmedê Xanî, *Mem û Zîn*, Bi Kurdîya Îro: Jan Dost, Weşanxaneyê Avesta, İstanbul 2008

Verî ke ez dest bi karê çarnayîşî bikerî, bineyke felsefeyê "wehdet-ul wucûdî" ser o xebitîyaya. Çimkî *Mem û Zîne* de heto felsefîk xurt o, Ehmedî Xanî nê felsefeyî ra dûr nîyo. Û no felsefe mîyanê kurdanê elewî, êzidî û yarsanan de zî serwer o. Winî aseno ke sey tesewufî zerqê mîyanê îslamîyetî bîyo. Eserê dîni ke bi zazakî nusîyayê, ma vajin, mewlûdê Ehmedê Xasî, yê Usman Efendiyê Babijî, yê Mela Mehmed Elîyê Hunî, yê Mela Mehmedê Muradan, yê Mela Kamilê Puexî... Mi enê eserî ancî wendî û bala xwu da uslûbê înan û termê ke bikar ardê ser. Bîl-hesa mi tayê çekuyê ke înan şixulnayê xwu het not kerdî. Bi zazakî, kurmancî, fariskî, tirkî û tirkîya usmanîyan ra new ferhengî zî nayî xo ver û tam roja 21.09.2015 de mi dest bi çarnayîşê *Mem û Zîne* kerd.

Ehmedê Xanî eserê xo beyt bi beyte, her misra bi 10 heceyan nuşt. Labelê seba ke mana teng nêmano û seba ke çekuyê zazakî nîsbet bi kurmancî hîna derg ê, bitaybetî formê makîyîye de hûmara heceyan zêdiyena, coka mi tercumeyê zazakî de her misra bi 13 heceyan saz kerde. Mehmed Emîn Bozarslan û Kadri Yıldırımî tercumeyê xo de seba îzehkerdişê tayê çîyan cêrnotî ronayê. Mi tayê cêrnotê înan neqil kerdî û mîyanê parantezî de nameyê înan nuşt. Hetanî serê adarê 2016î mi 54 qismî tamam kerdî. La o wext îdareyê hepîsxaneyê ke ez tede

mendêne, ez uca ra sirgunê yewna hepisxaneyî kerda. Hepisxaneyo newe de kitabê mi dayî la defterê mi ke tercumeyê *Mem û Zîne* zî tede bî û destnuştayê mi nêdayî, eşti depo.

Hepisxaneyo newe de mi ancî ê kitabî û ferhengî xo ver de nayî ro û mi dest bi çarnayîşê şeş qismanê ke mendê kerd. Axir roja 11.04.2016 de çarnayîşê tamam bî. Yanî xebata çarnayîşê xam yê *Mem û Zîne* şertanê hepisxaneyî de mabeynê tarîxê 21.09.2015-11.04.2016 tamam bî. Çarnayîşê tamam bî la tenya şeş qismî mi dest de bî, 54 qismî destê îdarekaranê hepisxaneyî de, depo de bî. Eynî sey bextê *Memî û Zîne*, eser zî nêresayêne pê!

Wisarê 2017î de mi bi erzûhal muracatê îdareyê hepisxaneyî kerd, mi va, çiyê mi ke depo de esto, bidê ez rusnena keye, wa şima rê giraniye nêkero, cayê şima teng nêbo. Mêrikan ez berda depo, mi ê 54 qismî dekerdî tayê çî-mî ver ra û rusnayî keye. Mi aileyê xwu ra waşt ke destnuştayanê tercumeyî kopya bikerê û parçe-parçe mi rê birusnê. No kar zî warkeynaya mi Arya girewt xo ser, o wext newserra bî. Kopyaya ê qisman tay-tay dekerdî zereyê zerfan û sey mektub mi rê rusnayî. Mektubê aye yew bi yew pêro beran ro vîyartî ameyî resayî mi. Bexudar be, weş û war be, pîr û kal be Arya.

Bi no qayde ez kewta ver, newe ra ser o xebitîyaya. Seba ke ez birusnî teber mi tamamê metnî yew defter de nuşt. Mi defter kek Roşan Lezgîni rê rusna. Ey zî destnuştayê mi komputer de nuştî, nuştîş de birêz Îdrîs Yazarî zî hetê ci kerdo. Ez înan rê zaf sipas kena.

Çarnayîş de meylê mi hîna zaf ziwanê standard û gramatikî ser o bî, la kek Roşan gama ke ser o xebitîyayo, meylê ey hîna zaf ziwanê pratikî û ahengê wendişî ser o biyo, teshîhkerdişê de

nê xisûsîyetî tetbîq kerdê. Seba ke ez şeklo redaktekerde kontrol bikerî, ey roja 06.02.2018 de dosyaya ke komputer ra vetbî mi rê rusnaye. Mi zî kontrol kerde, cayê ke îcab kerdêne îşaret kerdî û roja 22.04.2018 de ancî ey rê rusnaye. Badê teshîh û redakteyê peyînî axir *Mem û Zîna* Ehmedê Xanî seba ke bibo kitab û bireso verê destê wendoxan, seba ke edebîyat û zîwanê ma bixemilno, şîye metbea. Mesrefê metbea de wayanê mi Ay-sele û Sultane, ancî birarkeynaya mi Rojda û birarzayê mi Serdarî xwu mîyan de ardim kerd, ma înan rê zî zaf sipas kenê.

Ez bi çarnayîşê zazakî yê şaheserê edebîyatê ma *Mem û Zîne*, nîzdî ra şînasnayîş û mûsayîşê fikir û felsefeyê Ehmedê Xanî zaf bextewar a. Wa qebra Ehmedê Xanî nûr û gulan mîyan de bo. Wexto ke ey no şaheserê xo tamam kerdo, çewres û çar serre bîyo. Nika ke ez nê vateyê verînî semedê metnê zazakî nusnena, emrê mi zî bî çewres û çar. Haşa, neke ez xo duştê Ehmedê Xanî ra vînena la no tesaduf mi rê bî sedemê keyfwe-şîye. Çimkî çarnayîşê *Mem û Zîne* seba mi keyf û zewqêko pîl bî. Eke çarnayîş de yew kêmanî yan xeletîya ma bîya, wendoxê delalî ferq bikerê, ma ra bivajê, ma zaf memnûn benê.

Şaheserê edebîyatê ma *Mem û Zîne* wa bi zazakî zî bibo û milletê ma rê xeyrin bo.

**Murad Canşad**  
**Bafra, 21.04.2018**



## DÎBACE



Sernameyê kitabî nameyê Ellahî  
Bê nameyê ey kitab kêmi yo wellahî

Ey serçimeyê rindekîya eşqbazîye  
Ey mehbûbê mecazî, mehbûbê rastîye

Nameyê to yo lewhaya kitabê eşqî  
Nameyê to yo neqîşê qelema eşqî

Bê neqîşê to neqîşê qelema xam o  
Bê nameyê to kitab kêmi û natemam o

5 Meqsedê şahbeytan nameyê to yo helbet  
Fîhrîstê **nuşteyan** nameyê to yo helbet

Nameyê to yo eslê kitabane pîlan  
Çîyo xeyb bi înan beno eyan û beyan

---

**nuşte:** nuşteyê bimbarekî/pîrozî qest benê

Ey dost û yarê zerrîya zerrîbesteyan  
Ti ancenê xo het zerrîyan û cîgeran

Maşuq ti yê, hem rûmetdar ê, hem zî nazdar  
Aşiq ti yê, ne lavakar, ne zî nîyazdar

Mutleq ti yê, hem **mufid** ê, hem zî **mustefad**  
Bêguman ke ti hem murîd ê, hem zî mirad

10. Nûr ê ti, rindekîya rîyê dildaran de  
Adir ê ti, qelbê aşiqanê zaran de

Çila yê ti, şibhê nûr û adirî nîyê  
Roj ê ti, goreyê çim û çimdarî nîyê

**Genc** ê ti, mîyanê tilsimê cîhanî de  
Xizna yê ti, dil û cîgera însanî de

No cîhan, nê însanî, nê çiyê eyanî  
Nê fanîyî, xêncê to, heme cîsm û canî

Bi to wa beno debr û debarê hemeyan  
**Ti danê baxê viraştişî, feyz û ferman**

---

**mufid:** feydeyin, mifadar, çîyo ke feyde dano

**mustefad:** çîyo ke ci ra feyde yeno dîyene

**genc:** gencîne, defîna

**Ti danê baxê viraştişî, feyz û ferman:** Tîya de ayetêka Quranî îşaret bena ke Homayî tede vato “Hayîdar bê, viraştiş/xuliqnayiş û ferman, yê Homayî yê.” (notê M. Emîn Bozarslanî)

15 Pê fermanê to "k<sup>u</sup>n"î, tavil di cîhanî  
Virazîyayî. Ser û sebeb çî? Însanî

Qul bi xo yew o, na dinya û a dinya ra  
Yew herf a, aferîyaya bi "kun" nişka ra

Yew herf a; herfa heqîqetê muheqeçî  
Bi qudretê to, hem ferman o, hem zî xulqî

Beşn û balî bi na dinya resimkerde yê  
Ruh û canî bi a dinya nişankerde yê

Nê can û cesedî pê zorî, pê tehdayî  
Ameyî zewecnayış bi emrê Homayî

20 Bêguman ke ê beşn û balî rengfesal ê  
Labelê ê ruh û canî nûr û cemal ê

Herfa ke ma vata, hurdî yo neqîşê ci  
Labelê xorîn o, meqsed û waştîşê ci

Hurdî ya, bi goreyê vînayışê çiman  
Eslen gird a, neqîşê qelema qeleman

Mewcûd o aye de helbet, eşkera û keyb  
Eyan o tede helbet, şan û şeref û eyb

---

**Kun:** Emrê Homayî yo û yeno manaya "Bibe!" Homayî dinya û axî-  
ret bi nê fermanî xuliqnayê.

Însan bi eslê xo hem tarî yo hem zî nûr  
Însanî to ra hem zaf nêzdî yê hem zî dûr

25 Bêguman çîyo ke malê nê cihanî yo  
Pêro pîya tabîyê neslê însanî yo

No çerxê felekî seraser berz û bala  
Nê ferîşteyî pêro bimbarek û ala

No erdo sîyayo ke tim çerixîyeno  
No asmêno keweyo ke her tim geyreno

Hende herre, nê unsûran reyra û pîya  
Hende **erez**, nê cewheran reyra û pîya

Hende çîyo weşo delal, hende nan-nîmet  
Hende werdiş û şimitiş, hende kinc-kiswet

30 Hende doze-dewa, hende nîyaz û waştîş  
Hende zerrî perayîş û hende heskerdiş

Hende heywanî, hende madenî, velg-vaşî  
Hende arzûyî, meqsed û miradê weşî

---

**erez:** Çîyo ke bi sereyê xo nêşkeno estbo û mewcûdîyetê xo nîşan bido, seba ke estbo û mewcûdîyetê xo nîşan bido, ihtiyacıya xo bi maddeyêk esta. Sey rengî. Heta ke reng nêro maddeyêk ser, nêşkeno mewcûdîyetê xo nîşan bido. (notê M. Emîn Bozarlanî)

Pêro pîya semedê ma kewtê karî ver  
Pêro pîya semedê ma kewtê barî ver

Bêguman to nîzamêko rast û roşn rişto  
Ma rê ronayo û semedê ma viraşto

Ma xafilî, ewareyî û gunekarî  
Beste yê bi qeyd û bendanê nefsê harî

35 Çinê yo zerrîya ma de fikrêk û zikrêk  
Ma bi zivanê xo bikerê hemd û şikrêk

Xanî ke bi qelbê xo nêkeno zikrê to  
Bide ci zivanêk, wa bikero şikrê to





**HÛMARITIŞÊ NÎMETAN Û HOMAYÎ RÊ REYNA  
ŞIKIRKERDIŞ  
BI HAWAYÊ SALIXDAYIŞÎ VERÊ KARANÊ  
HOMAYÎ RA PERDE AKERDIŞ  
BI DUAYÊKA KILMEKE YA BI KURDÎ  
TEMAMKERDIŞ**



Bêguman cewherê ziwanan o şîkrê to  
Bêguman şewleyê zerrîyan o zîkrê to

Ey Heqo pîlo bêşiriko tek û tenya  
Ey mewcûdiyeto bêemsal û bêhempa

Ey baqîyo bêzewal, baqîyo mudawîm  
Ey raybero heqîqî, ey raybero qewîm

Ey wayirê erdan, ey wayirê asmênan  
Ey xaliqê cinan, ey xaliqê însanan

5 Erd û asmên, felek û melekî tek bi tek  
Pêro to afernayê, qudsî û bimbarek

Hemd û sena to rê bo, her çî to viraşto  
Weş û delal ronayo, hurdî hurdî taşt

Çîyo ke to virašto, ey weşker û başkar  
Pêro herinda xo de, pay ra û payîdar

Nê her **new sedefkisikî**, seraser **durrî**  
Durrê xo sipî-sipîla, şeffaf û tarî

**Hewt hemeyî** mîsalê durranê giloran  
Heme **şeş cîhetî**, heme çargoşe cîhan

10 **Her hîrê** çimeyê wayirê semereyan  
Erdo sîya, asmêno kewe bi miftayan

**Lewha, Qeleme**, estareyî û **erş** pîya  
Heywanî, nebatî, madenî û **ferş** pîya

---

**new sedefkisikî:** sedefkisik (istiridyê) candarêkê dengizan o ke pîzeye çî ra durr (încî) vejîyeno. Bi "new sedefkisikî" îlmê verên yê astronomî gore new felekî qest benê û pîzeyê her felekî de sey durr yew seyare/planet (gezegen) esto.

**durr:** mirwarî, bi tirkî "inci"

**hewt heme:** hewte felekî; aşme, utarît, (merkur), zuhre (venus), roj, behram (mars), muşterî (jupîter), zuhal (saturn)

**şeş cîhetî:** çep û rast, ver û pey, cêr û cor (notê M. Emîn Bozarlanî)

**her hîrê:** heywanî, madenî û çiyê bêcanî ke ci ra zaf semereyî peyda benê qest keno

**Lewha, Qeleme:** Yanî "Lewhê Mehfüz". Ontolojîyê dînî gore, Homayî verî ra Lewha û Qeleme xuliqnayê, kaînat de çiyê ke do biqewimîyê, bi na qeleme na lewha ser o nuştê. Rîwayetan gore, na lewha asmêno hewtin de ya, mesûlê ci İsrâfîl o. (notê Kadri Yıldırımî)

**erş:** rîyê asmênî

**ferş:** rîyê erdî

Bêguman to eyan kerdî nê çîyê başî  
Bêguman to peyda kerdî çîyê weşî

Heme çî to ardo meydan, to kerdo peyda  
Heme çî to taştö viraştö bê **heyûla**

Heme îns û canî, çî ewel û çî axir  
Welhasilê kelam, çî mu'mîn û çî kafir

15 Pêro to rê bîyê cayê xo-nawnayîşî  
Pêro to rê bîyê cayê xo-nimnayîşî

Bê husnê to çin o ci rê estbîyayîşêk  
Bê cemaîê to çin o ci rê asayîşêk

Hikmet o yo ke, ti hem batin ê hem zahir  
Qudret zî o yo ke, ti hem xeyb ê hem hazir

To rê çin o ca mekan, to rê çin o dîyar  
Labelê her çî to xo rê kerdo ca û war

Ê pêro cîsimêk ê, û ti can ê helbet  
Ê pêro bajarêk ê, û ti xan ê helbet

---

**heyûla:** madeyo verên ke vanê kaînat ci ra xuliqnîyayo. La îslamî-  
yetî gore madeyêko winasî çin o. Homayî kaînat çinbîyayîş ra afernayo  
(notê M. Emîn Bozarlanî) .

20 Husnê to yo helbet, xeml û xêzê **hebîban**  
Mûrê to yo helbet, kîn-xerezê **reqîban**

Meylê to yo, aşiqan anceno bêguman  
Derdê to yo, zerrîyan dejneno bêguman

Şîrîne Perwîzî çim de to kerde şeker  
Ferhadî çim ra to ard war gonî-gonîşer

Leyla to kerde belayê sereyê Qeysî  
Bi to vile kerd çewt Ramîne seba Weysî

Yûsuf to çira û qey musna bi Zuleyxa,  
Wamiq to senî û çitur resna bi Ezra?

25 Şeyxê Sen'anî bîbî hecî pancas reyî  
To kerd budela seba keynaya fileyî

Vilika nîlufere bi to bîya nazdar  
Bi to seba rojî bîya bengîn û dildar

Beşna derge to daya selwîyêran helbet  
Bendikê lîngan to dayo sulunan helbet

Sûrgulî bi to telfîyan ra benê peyda  
Bilbilî bi to hezar reyî benê şeyda

---

**hebîb:** heskerde, sînaye, waştî

**reqîb:** keso ke bexîltîya aşiqî keno û keweno mabeynê ey û hes-  
kerdîya ci

Bêguman rengo weşik to dayo sûrgulan  
Bêguman vengo weşik to dayo bilbilan

30 Nûr û roşnayî to daya serê **şemalan**  
To bi kila ci perwaneyî kerdê talan

Bêguman waştîyî to afernayê dildar  
Bêguman aşiqî ser o kerdê tarûmar

No eşq û no muhbeto ke ho dilan de  
Nê biskî û nê gilayê ke hê milan de

Qey to nêafernayî têver de muqabil,  
Qey to nêkerdî pêro têver de muadil?

**Eynikî** to afernayî tekrar bi tekrar  
Rindekîya xo to înan de kerde dîyar

35 To eynikî verê **tutîyan** de ronayî  
To dafikî verê **kovîyan** de ronayî

Eynikî goreyê înan ra sey awe yê  
Eksê xo goreyê înan ra sey **tawe** yê

---

**şemale:** mûme, finde

**eynik:** cîsim û can qest benê, Homayî cîsim û can xuliqnayê, rindekîya xo tede kerda dîyar

**tufî:** papaxan

**kovî:** koyî, yabanî, wehşî

**tawe:** tije, tav

Neqîşê to vînenê ê rîyê awe ra  
Nêpawenê xo ne awe ne dafike ra

Dermanê derdê teyšanan awa zela a  
**Tehmik** û dafike bo zî, ci rê delal a

Eke estbo çiman de meqsedêko hazir  
Do bivîno ey Homa, her kesêko nazir

40 Tutîyî bi xo caran qala weşê vanê!  
Çi bivînê, çi bihesnê, ey tekrar kenê

Ê meqsed û miradî muhîm nêvînenê  
Lingî qeydan de yê, bi o tewir manenê

Ti yê mîreyê meqsed û miradê dilan  
Ti kamî biwazê ey kenê sey evdalan

Kam keso ke bikerê mîsalê bomikan  
Payanê ci bestenê bi por û şanikan

Kam keso ke bidê vernîye, rayiro rast  
Hetkarîya ci bikerê, tedir bibê dost

45 Ti ey danê meqamê berz û balayî ser  
Tabî' bo eger, ti kenê serwer û rayber

---

**tehmik:** seba seydwaniye çiyê werdişî ke seydvani dafikan de nanê ro (notê M. Emîn Bozarslanî)

Ya Heq, Adem hîna to rê nêşîbî secde  
To o kerd qiblege, xaftela û desinde

Îsa to senî û çitur resna bi ezman,  
Ecêba bi çi sebeb ra to sîna o can?

Dersa ke to nimate, daye bi Îdrîsî  
O do pê bişîyêne cayê muqedesî

Îblîs feqîr bî, bêxeta û bêcînayet  
To ci rê kerdbî xeylê başî û înayet

50 Her roje to rê kerdêne hezar îtaet  
Çimkî to daybî ci hende qewet û taqet

Ey kesêk rê nêkerd secde to ra qederî  
To ancîna zî qewirna eşt verê berî

To ra teber nêşî secde kesê bînî rê  
Hêrsê to ver bî mehkum adirê harî rê

Welhasilê kelam, sirrê to ra hagîdar  
Maşela, ma nêdî kes û çiyêko candar

Wayirê ilmî, înanê ke zaf wanayo  
Seba to vato ma ne dîyo ne vînayo

55 Derheqê to de, Xanî bi nezaniya xo  
Ho keno vîndî êdî rayir û rêça xo

Ancax, eger ardimkarê yewî Homa bo  
Yan zî rayberê ci Mihemed Mistefa bo

Bi qandê Mihemed Mistefayî, ya Homa  
Xaniyî bi xo bike aşîna û zana





**PESNÊ QELEMA MESNÛAT Û SERDEFTERÊ  
MEWCÛDAT  
Û AQILÊ MAQÛLAT Û PÊŞEDESTÊ  
MEXLÛQAT  
HEZRETÊ SEYYÎDU'S-SADAT  
MIHEMED MISTEFAYÎ RÊ HEZAR SELEWAT**



**Eşyayî** bi goreyê salix û delîlan  
Estê yan çin ê, ferq nêkeno seba înan

Wacib yew o, o zî zatê Homayê pîlî  
Derya û dengiz, ê eşyayî, zaf û bolî

Ê wacibî eşyayî xo rê kerdê perde  
Zere de ca bîyo, nimite û temirte

Yanî ey waşto bizanîyo bi delîlan  
Cemalê ci dalde ra bivejîyo meydan

5 Waşto, wa xiznaya cewheran bibo dîyar  
Waşto, wa neqîşan ra nas bibo neqîşkar

---

**eşya:** manaya objeyan de, çî-mîyê ke aferîyayê

Labelê hunerê ê wayirê hikmetî

Labelê neqîşê ê wayirê qudretî

Eyan nêbîyêne ê tenya bi **resiman**

Do ifade bibîyêne ê bi **reqeman**

Hac û ihtiyac nuşte bî, reqeme bîye

Coka mexlûqa ewile, qeleme bîye

**Qeleme û ruh û aqilo ewil pîya**

Heme hîrêyî ewilê ewilan pîya

10 Caran înan yewbînan ser ra meke cîya

Bide têver û têhet, bike yew û pîya

Bivaje ke “Her hîrê yew ê, yewpare yê

Qebûl benê ke hûmare bi hûmare yê.”

Ewilî nûrêk çilka husnê Homayî ra

Rest manaya xo Mihemed Mistefayî ra

O nûr bi emr û fermanê **Alimê** xeybî

Bî çimeyê bereketê alemê xeybî

---

**resim:** manaya şekil û şemalî de, eysayîş

**reqeme:** manaya herfan û nuşteyî de

**Qeleme û ruh û aqilo ewil:** Ontolojiyê dîni gore, kaînat nûrê hezretî Mihemedî ra aferiyayo. Nûrê hezretî Mihemedî dima nê hîrê çiyî aferiyayê: qeleme, ruh, aqilo ewil

**Alim:** Homayî qest keno

Canî bi manaya Mihemed pêxemberî  
Zêdîyayî sey velg û vaşî, sey pirparî

15 Mihemed bî bin û bingeyê heme canan  
Hem yê weş û başan hem yê pîs û xiraban

Hemeyê ci pê bîyê weş û baş û dîncî  
Hemeyê ci pê bîyê wayirê qezencî

Hîna ke ne no erd bî ne zî no asmên bî  
O serwerê nebîyan raybero verên bî

Aferîyayîşê felekan seba ey bî  
Secdeşîyayîşê melekan seba ey bî

Ey ra girewtêne bereket her alemî  
Herre-awe bî, can nêdîyabî Ademî

20 O pêxemberê tamî û yê letikî bî  
Adem hîna zî yê awe û lêzdikî bî

O penceraya husn û cemalê Barîyî  
O roj û tîja felekê dilê tarîyî

Wexto ke kewtbî dilq û sûretê cîhanî  
Ca de bî pêxemberê axir û zemanî

Berzax o, mabeynê **wacib** û **mumkinî** de  
Mîre yo, dilq û şekilê dergewanî de

Betal kerdî heme dînî heme miletî  
Derman kerdî heme janî heme îletî

25 Ewynîya ke cîhan şîyo kafirîye ser  
Dawet kerdî sifreyê pêxemberîye ser

Heme xelq û miletê serê rîyê erdan  
Ca kerdî sifre de sey merdan û camêrdan

**Xaqan** bi xo hindûyê kox û kozikan bî  
**Fexfûr** bi xo qulizê meyê tasikan bî

**Qeyzer** kêmişya xo ra, û qusirê xo ra  
Hema tede vet, ageyra uzirê xo ra

Şahê erebî seke ala kerde pira  
**Kîsrayê** ecemî bî têsêr û têbin ra

30 Rûm û hebeş û fireng û qiptî û tatar  
Înanê ke bi dînî nêkerdêne îqrar

---

**Wacib** û **mumkin**: Wacib Homa yo, esto û çinbîyayîşê ci mumkin nîyo. Mumkin, teberê Homayî de heme can û camid ê; estbîyayîşê ci zî çinbîyayîşê ci zî mumkin o.

**xaqan**: hukimdarê tirkan

**fexfûr**: hukimdarê Çînî

**qeyzer**: hukimdarê Bîzansî

**kîsra**: hukimdarê eceman

Ci ra zaf tenî pê şimşêrî **bîyî fena**  
Heta ke tayê ci bi dîn bîyî aşîna

Bi adir û kile veşnayî pûtxaneyî  
Ting û tarî de verdayî ateşgedeyî

Wexto ke dînê xo rona, û kerd eşkera  
Dawudîyan, cihûdan, înanê **Nesara**

Tewrat, hema vajê êdî kerdbî xo vîr ra  
Încîl û Zebûr zî êdî şîbî ezber ra

35 Wexto ke Încîl wendêne resûl Îsayî  
Behsê ey kerdêne bi fermanê Homayî:

“Ez ha mijdîyane dana, Resûlo **emced**  
Do mi dima biyero nameyê ci **Ehmed**”

Ey doza xo kerdêne, bi dest û bi ziwan  
Destê ci de şimşêr, û fekê ci de Quran

Xulqê ci weş o; hem mîre hem pêxember o  
Hîkmetê ci zaf o; hem kitab hem şimşêr o

---

**bîyî fena:** merdî, kişiyayî

**Nesara:** Bajarê hezretî Îsayî yo, xirîstîyanî qest benê

**emced:** wayirê şan û şereffî

**Ehmed:** Nameyêkê hezretî Muhamedî.

Nêwende bî, bî malimê heme cîhanî  
Fiqare bî, bî wayirê lutf û îhsanî

40 Bêestor û bêespar, vila bî dinya ra  
Bêdawul û bêala, vengana da her ca ra

Çîyo asaye pêro o bî, o pêxember  
**Eskerê ci melekan ra, ameybî pêser**

Bêban, bêbîna, bêxeyme û bêçadire  
Hewr ey ser o bîyêne sîye û sitare

Çende xeberdar bî, ver û vernîya xo ra  
Hende hayîdar bî, pey û peynîya xo ra

Sîya ci ra nêginayêne rîyê erdan  
Têver de goşdarî kerdêne se xeberdan

45 Tede qisey kerdêne kemeran û kuçan  
Tede eleqe ronayêne velg û vaşan

Cins û cibatê heywanan ra hemeyan  
Ard pê pêxemberîya ey bawer û îman

Tenya tayê domanê hezretî Ademî  
Bîyî boka kila adirê cehenemî

---

**Eskerê ci melekan ra, ameybî pêser:** Ayetêkê Quranî qest beno ke tede qalê cengê Huneynî beno. Vano "Homayî seba ardîmî pêxemberê xo rê tayê eskerî rusnayê ke şîma ê nêdîyêne."

Yanî rîyê erdan de rîyê asmênan de  
Yanî mîyanê heme cin û însanan de

Bêguman çin a ey ra teber ma rê roştî  
Bêguman çin a ey ra teber ma rê paştî

50 Ê resûlî; feqîro neçar, umetê xo  
Kerd wayirê text û bextî, bi hîmetê xo

**Teqwaya** ey dîn kerd pêt û qewîn û tekuz  
Şerîetê ey rayir kerd raşte û dim-duz

Alimî pêro sey enbîyayan ê helbet  
**Abidî** pêro sey ewlîyayan ê helbet

Panc seyî tenî egîdanê kafiran ra  
Kesêk zî sehabîyanê cengaweran ra

Yekûnê egîdanê kafiran seraser  
Duştê sehabîyî de bîyêne tarûmar

55 Kesê ke derheqê dînî de gumankar bê  
Bikewê cedel-cudel, cahil û famkor bê

Hem Quran hem hedîsî, cewabê tewr başî  
Ayet û sûreyî zî delîlê tewr weşî

---

**teqwa:** gune û heram ra dûr vindertiş, gune û heram ra xo pawitiş  
**abid:** îbadetkar, keso ke teqwa gore hereket keno

Ebûbekir û Umer, zaf weş di birakî  
Usman û Elî, têver de di dostê pakî

Ey şah û padîşaho qedirberz û giran  
Rojê asmênî to rê beno sî û sîwan

Pesnê to, bi zanayîşê mi boş-betal o  
Pesndarê to ancax û tenya Heqo pîl o

60 Ez çî bivajî ey şahê şahan, ey serdar!  
Kelamê Heqê pîlî to rê bîyo pesndar

Ey şah! Nameyêko delal o to rê "**Yasîn**"  
Ey **Taha**! Yew sirr û tilsim o to rê "**Ta sîn**"

Tim bes a to rê ey sînayeyo muteber  
Homayî to rê sond wendo, sereyê to ser

Sond bo, se reyî bi sereyê to ey serdar  
Eke bibê di seyî reyî ma gunekar

Her çiqas ke se mertebe gunekar ê ma  
Ancî to ra umîdwar û hêvîdar ê ma

---

**Yasîn:** Sûreyê 36. ya Quranî. Nameyanê Hz. Muhemmedî ra yew o.

**Taha:** Sûreyê 20. ya Quranî. Nameyanê Hz. Muhemmedî ra yew o.

**Ta sîn:** Sûreyê Nemlî (sûreya 27.) ya Quranî bi "Ta sîn" dest pêkena.



65 Hetanî ke kamil bibo no Xanîyo zar  
Qilêrino qertîşino lîmin û mirdar

O pîso xirabino kutiko lanetî  
Wurişto keno doz û dewaya umetî!

Ê zerrîçepelê fêlxirabê sey kelpan  
Bike teqîbkarê rayirê sehabîyan



4

**CENABÊ WAYIRÊ ŞEFAETÎ RA WAŞTIŞÊ  
ŞEFAETÎ  
KE SÛRETÊ MÎRACÎ DE VEJÎYAYO QATÊ HEQÊ  
WAYIRÊ ÎZETÎ**



Ey semed û ser-sebebê her di cîhanan  
Biye nîzdîyê Heqî, **hendê di kewanan**

Ey şahê şahan û textê sûka Medîna  
Ma to ra zaf sirr û keramet dî û vîna

Seyr û seferê felekan seba gamêk  
Îftîxarê melekan seba to selamêk

Aşme bîya di leteyî bi yew îşaret  
**Her çîyo ke to dî rast bî, ne şaş ne xelet**

---

**hendê di kewanan:** Şîyayîşê mîracî yê pêxemberî qest beno, Quran de Homa vano şewa mîracî de pêxember hendê di kewanan şîyo nêzdîyê Homayî. (notê M. Emîn Bozarslanî)

**Her çîyo ke to dî rast bî, ne şaş ne xelet:** Tîya de ayetêka Quranî qest bena ke Homayî tede qalê mîracê pêxemberî kerdo û vato ke çimê ey nêşemitîyayî û şaş nêdî, çiyê ke ey dî, pêro rast bî. (notê M. Emîn Bozarslanî)

5 Ey şah û sultanê serê textê "**lewlak**"î  
Wurize şo rîyê asmênan bi çalakî

Amade yê semedê to **Buraq û Refref**  
To ver û to dima ferîştayî, ref bi ref

Dê wa biancîyê perdeyî beynate ra  
Bê perde qîsey bike, Heqê pîlî reyra

Bivaje ci rê: "Ti qadir û zulcelal ê"  
Bivaje ci rê: "Ti ebedî û ezel ê."

Ma fanî û zar ê, sûcdar û gunekar ê  
Ger ti rayber nêbê, ma bi xo tarûmar ê

10 To çira ma kerdî wayirê ezemetî,  
Seba çî naye ma sere taca hurmetî?

To dayo ma xîlafet, to dayo ma hurmet  
To ardo kerdo bavokê ma o **emanet**

---

**lewlak:** Çekuyêka erebkî ya, yena manaya "Eke ti nêbiyêne". Yanî Homayî pêxemberî ra vato "Eke ti nêbiyêne mi felekî xelq nêkerdene." (notê M. Emîn Bozarlanî)

**Buraq:** Çekuya erebkî "berq" yanî birûsk ra yena, wexto ke pêxember şîyo mîrac, weniştio Buraqî.

**Refref:** Çiyêko sey doşek yan zî xaliçe yo, pêxember gama ke şewa mîracî şîyo huzûrê Homayî, Sîdre ra dima ser o ronîştio.

**emanet:** xelîfetiye, yanî rîyê erdan de wekîlîya Homayî qest bena. Ayetêkê Qurani de Homayî vato "Homayî soz dayo bawermendanê wayirê emelê başî ke do inan rîyê erdan de bikero wekîl." (notê M. E. Bozarlanî)

To zanayêne ke ma cahil û nezan ê  
Qedrê ê emanetî ma çi rey nêzanê

Her çîyo ke to seba ma kerdo îrade  
Yew mîsqal zî ma nêkerdo zaf û zîyade

Haşa haşa, kemalê merhemetê to ra  
Haşa haşa, pîlîye û rehmetê to ra

15 Eke kufir û guneyan bikê behane  
Qey no yo karo layiqê to yo şehane!

Nezerê to de eynî yê, îman û kufir  
Nezerê to de eynî yê, cenet û **adir**

Qehirê xo bikerê eşkera û zahir  
Cenet do ma ser o bibo kile û adir

Bivaro hewrê rehmetê to ra bereket  
Bêguman cehenem do ma rê bibo cenet

Her çiqas ke ma xafil ê, û gunekar ê  
Labelê ancîna zî to ra umîdwar ê

20 Heme kesê kafirî, heme bêîmanî  
Sifetanê to rê bîyê ca û mekanî

---

**adir:** cehenem qest beno

Bîyê kafir ma, pê nameyê to "**Qehar**"î  
Bîyê gunekar, pê nameyê to "**Xefar**"î

Qey ti nêeşkenê guneyan bexş bikerê!  
Eger ti guneyan ma ro neqîş bikerê

Do bextîyar bibê pê halê ma şeytanî  
Do şad û bextewar bibê xeylê melûnî

Qey no bext o, ey sîye-sitara alemî  
Qey no layiq o, ey şiwaneyê **ademî**

25 O vergo lanetîyo vêşano pîs û har  
Do sey malê pesî ma bikero tarûmar

Yanî o hawa bike ke o dêvo serkêş  
Wa tenya biveşo û bianco dej û êş

Welhasilê kalam, ma heme xas û xaman  
Asîyenê eşqîyayan û natemaman

Pêro pîya bi şefaetê xo nas bike  
Pêro pîya kila hare ra xelas bike

---

**Qehar:** Yew nameyê Homyî, yanî o ke qehr keno.

**Xefar:** Yew nameyê Homyî, yanî o ke guneyanê ma nimneno.

**adem:** însan, benî adem



**EŞKERAKERDIŞÊ PESNÊ EŞİRANÊ KURDAN  
BI EGÎDÎYE Û XÎRETKARÎYE  
NÎŞANDAYIŞÊ BEXTREŞÎ Û BÊTALIHÎYA ÎNAN  
BI HENDE QELENEDERÎ Û WELATPERWERÎYE**



Ey saqî, ti Homayî kenê kerem bike  
Ti îskan û **qedehê Cemî** bi mey deke

Dê wa qedeh zî bi meyî **cîhannuma** bo  
Dê wa bext û qederê ma pê eşkera bo

Wa bibo eşkera ma ver de hal û hewal  
Wa biyero zanayene qeder û îqbal

Bêîqbalîye resaya gama peyêne,  
Ecêba hinî merg o, yan hinî merdene?

---

**qedehê Cemî:** Manaya camê Cemşîdî de. Efsane gore, Cemşîdî mey îcad kerdo, qedeh yanî camê ey zî efsûnin biyo, sey dûrbîne cîhan nîşan dayo, estareyî ardê verê çimê ey. Coka ci ra vato "camê cîhannuma" yanî camo ke cîhanî nawneno. Camê cîhannuma îstîqbal zî nîşan dayo. Ehmedê Xanî qedehê xo teşbihê camê cîhannuma kerdo, yanî waşto bi wasitaya qedehê xo hal û îstîqbalê kurdan bivîno û bizano. (notê M. Emîn Bozarlanî)

**cîhannuma:** çîyo ke cîhanî nawneno

5 Ecêba tim wina şono, tim wina beno,  
No çerxê felekî tim-tim wina geyreno?

Ecêba mumkin o ke bext ma de bibo yar?  
Yew estare semedê ma ra bibo dîyar

Dê wa semedê ma zî bext bibo dost û yar  
Dê hinî bibo aya hewn ra, bibo hişyar

Bivejîyo ma mîyan ra **sîyêk-sitarêk**  
Peyda bibo ma ra padîşahêk, serdarêk

Şûrê hunerê ma biyero ronayene  
Qedrê qelesa ma biyero zanayene

10 Dêrd û kulê ma bivîno daru û derman  
Îlm û îrfanê ma bibo yê serê destan

Bibîyêne yê ma zî yewero muzafer  
Fen-fikir de aver, lutf û îhsan de serwer

Darb bîyêne pereyê ma zî bi sîkkeyan  
Nêbîyêne wina bêîtîbar û erjan

Her çiqas ke xalis û pak û ter-temîz ê  
Sîm û zerrnî ancî bi sîkkeyan ezîz ê

---

**sîyêk-sitarêk:** sîye û stare (mecazen) keso hîmayekar, keso ke çiyêk rê wayirîye keno, miqateyê ci beno

Eke bibîyêne ma ra zî padîşahêk  
Heqî layiq bidîyêne ci rê kilawêk

15 Samedê ey wa bidayêne meqam û text  
Samedê ma zî wa biyêne îqbal û bext

Hasil bibîyêne samedê ey ra tacêk  
Hasil bîyêne samedê ma zî **rewacêk**

Derman biyêne derd û kulê ma sêwîyan  
Şiyêne ma ser ra no hukmê sewterîyan

Muzafer nêbîyêne ma ser o nê **rûmî**  
Nêwendêne paga ma ser o teyrê bûmî

Nêbîyêne ma perîşan û haltenikî  
Ma ser o hukm nêkerdêne tirk û **tacikî**

20 Labelê ezel ra Homayî wina kerdo  
Hukmê rûm-ecemî ma ser o rewa kerdo

Tabîyê înan biyayiş şermo giran o  
No şermo giran yê pîlan û serdaran o

Namûs o, bi hukimdaran û bi mîreyan  
Hêzê xo çi yo; yê şaîr û fiqareyan?

---

**rewac:** qîymet, erj

**rûmî:** tirkî qest benê, seba tirkan yeno vatiş

**tacikî:** ecemî qest benê



Kam kesî ke dest berdo şimşêr bi xebate  
Bi çêrîye zeft kerda, vista dest dewlete

Çimkî sey veyveka newîye yo no cîhan  
Destê şimşêrê rûtî de yo hukm û ferman

25 La qewl û qalind, marre û marrebirnayiş  
Lutf û kerem, camêrdîye û bexişnayiş

Lakîn mi persayo na dinya ra bi hîkmet:  
"Çi yo qalindê to?" Mi rê vat: "Cehd û xîret!"

Yanî dinya pê şimşêrî û pê îhsanî  
Bena tabî, bengîn û besteyê însanî

No aqilê mi nêşi karê Homayî ser  
Kurmancî enê **darê dinya** de seraser

Gelo çi ser-sebeb ra hende mendê mehrûm,  
Pêro pîya çi semedî ra bîyê mehkûm?

30 Înan bi şûr girewto bajarê şuhretî  
Û bîyê sermîyanê dîyarê hîmetî

Çimkî her mîreyê xo emsalê Hatemî  
Çimkî her egîdê xo mîsalê Rustemî

Seyr bike, erdê ereban ra ta yê gurcan  
Kurmancî bîyê sey kelayan û sey bircan

---

**darê dinya:** dinya pêro, hemeyê dinya

Nê rûm û ecemî bi înan payîdar ê  
Kurmancî dorûverê ci ra çarkenar ê

Her di terefan êl û eşîrê kurmancî  
Tîranê xo rê kerdê hedef û armancî

35 Çira ke mifte û kilîdê serhedan ê  
Êl-eşîrê xo pêro sey sênc û bendan ê

No dengizê rûmî, no deryayê tacikî  
Çi mehel xo têwbidê, bikewê çalakî

Kewenê mîyanê kurmancan sey şimşêrî  
Verdenê înan ser gonî û gonîşêrî

Qelenderîye, camêrdîye hem zî hîmet  
Dilawerîye, mîreyîye hem zî xîret

Nê mor ê, semedê eşîranê kurmancan  
Pê şûrê hîmetî biyê name û nîşan

40 Çende ke dilawerîye de xîretkar ê  
Hende zî minetdarîye de nefretkar ê

No cehd, no xîret û na pîlîya hîmetî  
Manîyê wegirewtîşê barê minetî

Coka yewbînî girewtîş ra tim bêpar ê  
Tim yewbînan ra cîya, têver de rikdar ê

Bibîyêne mîyanê ma de pêkerdişêk  
Bibîyêne yê ma zî pîyabîyayîşêk

Rûmî, erebî, ecemî bi temamiye  
Hemîne zî ma rê kerdêne xulamîye

45 Helbet ardêne pêser ma dîn û dewlete  
Helbet hasil kerdêne ma îlm û xebate

Pêser ra bîyêne cîya qisa û qalî  
Bîyêne bewlî kesê wayirê kemalî



**SEBEBÊ NUŞTIŞÊ KITABÎ BI NÊ ZIWANÎ  
GERREYÊ DEWRAN Û MERDIMANÊ NÊ ZEMANÎ  
KE YEW O NEZERÊ ÎNAN DE HUNERÊ ZANAYIŞ  
Û EYBÊ NEZANÎ**



Xanî bi xo kemalîye ra bêkema o  
Dî ke meydanê kemalîye tip û tal o

Yanî, ne qabilîyet û hêginîye ra  
Belkî teasub û eşîrperwerîye ra

Bêdalet û înad ci rê bî kul û derd  
**Edetêko neweyo çors rona û rast kerd**

**Meyo safî caverda şimit êyê tortî**  
Maneno cewheran zar û ziwane kurdî

---

**eşîrperwerîye:** Tîya de meqsed "miletperwerî" ya. Çimkî o wext mî-yanê kurdan de nîzamê eşîran hakim bî, kurdî bi nê nîzamî nas biyêne. (notê M. Emîn Bozarslanî).

**Edetêko neweyo çors rona û rast kerd:** O wext hozan û nuştekarê kurdan eseranê xo bi erebkî, fariskî û tirkîya usmanîyan nusenê. No beno edet û bi kurdî nuştîş eksê nê edetî qebûl biyo û çors ameyo diyayîş. Coka Ehmedê Xanî vano o verba edetan vejîyayo, bi kurdkî nušto. (M.E.B.)

**Meyo safî caverda şimit êyê tortî:** "Meyo safî" erebkî, fariskî, û tirkîya usmanîyan a, "tort" zî kurdkî ya. Yanî Ehmedê Xanî vano ey bi nê ziwanan nênušto, bi kurdkî nušto.

5 Ronayî nîzamî, ronayî întîzamî  
Seba miletê xo antî dej û elemî

Wa xelq û alem nêvajo ke "Xora **ekrad**  
Bêmarîfet o; bêesl, bêkok û bêbinyad

Heme miletî bîyê wayirê kitabî  
Tenya kurmancî mendê bêpar, bêhesabî"

Hem zana û famberî nêvajê ke "Kurmanc  
Eşq û heskerdiş qet xo rê nêkerdo armanc

Mîyanê ci de çin o ne yar ne zî dildar  
Zerrî ra bêxeber ê, eşq û meşk ra bêpar

10 Bêpar ê eşq ra, bêpar ê eşqbazîye ra  
Cîya kewtê hem mecazî hem rastîye ra"

Kurmancî ne xag û xam ê, ne zî bêkermal  
La bêkes û bêkus ê, bêhal û bêmecal

Neke naşî û nezan ê, neke cahil ê  
Labelê bêwayir ê, bêkes û sefil ê

Eke bibîyêne yê ma, yewero wayir  
Bibîyêne comerd, bizanayêne rayir

---

**ekrad:** kurdî, miletê kurdan

Îlm û huner û kemal û îzet û îzan  
Şîre, xezele, beyte, kitab û dîwan

15 Ger nezerê ci de bibîyêne qedrê xo  
Sîm û zern zî bibîyêne îtîbarê xo

Mi do alaya şîran û yê sinetî  
Bivetêne ta serê banê kaînatî

Mi do keyfweş bikerdêne Elî Herîrî  
Şa bikerdêne ruhê Melayê Cizîrî

Mi do mesûd bikerdêne Feqîyê Teyran  
O do hetanî peynî bimendêne heyran

Çi heyf ke qewî kesad ê çarşî û bazar  
Çin ê nê qumaşî rê muşterî û tucar

20 Bîlhesa no dewran de kîseyê pereyan  
Bîyo delalî, dost û yarê ma hemeyan

Yanî bi temahkarîya dîrhem-dînarî  
Her yewê xo ma rê bîyê yar û dildarî

Ger ti îlmî tamamen bidê seba **polêk**  
Û ger ti hîkmetî biroşê seba solêk

---

**pol:** pûl, pereyo bêqîymet

Kes nêkeno seyîsê hespê xo **Camîyî**  
Kes nêkeno xizmetkarê xo **Nîzamîyî**

Wexto ke ma dî dewr û dewran bi no reng o  
Mal-milkî ser o tim pêrodayîş û ceng o

25 Kewtî hewesî ver ke ma bibê kîmyager  
Labelê ma hewesê xo de nêşîyî ser

Ma bi însaf gurîyayî, bîyî gewherzan  
Yewbînî ser ra cîya kerd ma vay û erjan

Zerrîya ma çî caran qebûl nêkerd hîle  
Qet xerezkarîye rê nêbîye wesîle

Dîn şî, nêkewt ma dest ne dîrhem ne zî dînar  
Dima neçarîye ra ma bîyî sifirkar

**Sifirê xo yo nimite** ma kerd eşkera  
Kaxido bênuşte bî, ma ci rê kerd dua

30 Duaya ma qebûl bîye, bîye rastîye  
Bîye sebab û caameyîşê hêvîye

Nê **pol-polikî** belkî asenê bêbaha  
Labelê **yewrî** yê, tertemîz, giranbaha

---

**Camî:** Mola Camî (1414-1492), şairêko namdar yê farisan o.

**Nîzamî:** Nîzamî Gencewî (1141-1209), şairêko namdar yê farisan o.

**Sifirê xo yo nimite:** kurdkî qest keno

Bê hîle û bê xurde yê, tam tamamî yê  
Meqbûlê muameleyê xas û xamî yê

Seraser sirf û sade yê, bi kurmancî yê  
Eke bivajê "sipî mendê" zerrnî nîyê

Sifirê ma yo sûr o, bewlî û dîyar o  
Sîm nîyo ke tayê bivajê "kêmeyar o"

35 Wa kes nêvajo pereyê ma "kêmbaha yo"  
Mohr nêdayo piro sultan, bêdemxa yo

Eke darb bibîyêne bi neqîş û nîgar  
Nêmendêne wina bêsedr û bêîtîbar

**Sînaye yo, yar û namgerê kesî nîyo**  
Bêmirad o, wayirê bextê weşî nîyo

---

**pol-poliki:** Şaîr beytanê eserê xo (Mem û Zîne) qest keno. (M.E.B.)

**yewrî:** eksê "dirîyî", yanî tede sextekarîye, dirîyîye, rîya çin a

**sedr:** qîymet, erj, nirx, baha

**Sînaye yo, yar û namgerê kesî nîyo:** Wexto verên de hozan û nuş-  
tekarî dormeyê mîreyan û hukimdarên de ameyêne pêser, eserê xo pêş-  
kêşê înan kerdêne; xeylê kesan zî nameyê înan eseranê xo de nuştêne.  
Ê mîre û hukimdarî zî înan û eseranê înan rê bîyêne ardimkar, madî û ma-  
newî ardim dayêne înan. Yanî eserî bi nameyê mîreyan û hukimdarên we-  
şanîyayêne û qîymet dîyêne. La Ehmedê Xaniyo nemir, nê edetî dima  
nêşîyo, eserê xo yo erjaye pêşkêşê tu mîre û hukimdarî nêkerdo, nameyê  
înan nêrayo piro; tenya seba mîletê xo nuştê û eser pêşkêşê mîletê xo  
kerdo. (notê M. Emîn Bozarlanî)



Nê kaxidê ma yê bê sîye û sitarî  
Nêyê bêderbê qebûlê şah û serdarî

Melûl ê, anegoreyê xeylê aliman  
Meqbûl ê, anagoreyê xeylê hekîman

40 La hakimê zemanî, yê marîfetdarî  
Çi heyf ke goş nêda pira, nêkerd goşdarî

Mîreyo ke nameyê xo yo xeyr Mîrza yo  
Awir û ewnîyayîşê xo sey kîmya yo

Qelbê zexelî keno sey eyna û camî  
Polê sexteyî keno sey zerrnê temamî

Sed barî pol-polikê sifirînê sûrî  
Bi awirê ey ca de benê zerrnê zerî

Bi qehirê xo êyê dîyarî ano war  
Bi îhsanê xo êyê warî beno dîyar

45 Paşayan pêgêno, sey kesanê êsîran  
Azad keno înan sey kesanê feqîran

Her roje bi ardimê xo hezar xizanî  
Her game bi lutfê xo sed rût û rebenî

Keno zengîn û maldar bi destê hîmetî  
Hîkmet o yo ke çi rey nêkeno minetî

Bidayêne ma ser zî reyêk awirê xo  
Biçarnayêne ma ser zî o **îksîrê** xo

Nê **qal-qiseyî** pêro, bîyêne şîrî  
Nê **polikî** pêro, bîyêne zerrnê zerî

50 La çimê ey hîna zêde komelî ser o  
Coka xisûsen zerrî ra seyr nêkerd piro

Comerdîya ey semedê heme komelî  
Ya Reb, ey bike wayirê bext û îqbalî

---

**îksîr:** Madeyêko efsanewî biyo. Kîmyageranê verênan bawer kerdo ke o beno dermanê heme derdan, bi wasitaya ci madeyê zerrn û sifir û sey nînan yewbînan ra ciya benê, bi îksîr sifir û asin benê zerrn û sîm. Ehmedê Xanî dostaniya mire Mirzayî şibneno îksîrî û vano "Eke o reyêk bi-ewniyayêne ma ra, bi ewniyayişê eyê sey îksîrî nê qal û qisayê ma pêro bedilîyayêne biyêne şîrî. (notê M. Emîn Bozarslanî)

**qal-qiseyî:** Şair çekuyanê eserê xo qest keno.

**polikî:** Şair beytanê eserê xo qest keno.



**FÎHRÎSTÊ DESTPÊKÊ KITABÊ XEBERAN  
EŞKERAKERDIŞ Û PESNDAYIŞÊ  
LEQEB Û ESERAN  
BEYANÊ ECZ Û ÎNKÎSARÎ BI HAWAYÊ  
ÎTÎRAF Û ÎQRARAN  
UZIRWAŞTIŞ SEBA NÊ QAL Û QISAYAN**



Saqî deke şûşeyê rengê asîmanî  
Pê mey û şerabê sey ruhê **cawîdanî**

Ke ma ruhê mezgî bikerê tern û teze  
Bi meyê ruhperwerî yew hingê û **lehze**

Saqî, dê hadê deke şûşeyê hêşînî  
Awa ke zerrî kena wayirê îzanî

Awe de biverde ti nê qelbê mehzûnî  
Mest û sermest bike nê aqilê mecnûnî

5 Ey saqî ti deke nê qedehê gewheran  
Bi şîreyê ê mehsereyanê **tahiran**

---

**cawîdan:** ebedî, baqî, daîmî, bêpeynî

**lehze:** vîstike, hele, vista

**tahir:** pak, temîz

Ê durrê xoşawî, **xemrîyê** dawetkarî  
Yaquto helîyaye, **lalê herîkbarî**

Deke ti ê dilopanê sey **durrdaneyan**  
Yanî ereqo ke maneno awa gulan

Zeman zeman ey bide destê meyperestan  
Înanê ke tirşimêk zerrî daya **destan**

Qedehê zerrî biyero neqîşnayene  
Meclisê şayîye biyero ronayene

10 Nê meclisê meyperestanê mudawîman  
Sermest bike newe ra, her dem û her zeman

Beno ke o nan û nîmeto bênîhayet  
Dilopêk bo zî mi rê beno risq û qîsmet

Şayîya meyê qedehê zelalê pakî  
Şênîya engura rezê roşnê roşnakî

Nefsî tamamen bigêro binê tesîrî  
Keyfweşîya zerrî bivejo qatê corî

---

**xemrî:** şerabreng, rengê şerabî, mor  
**lalo herîkbar:** Şaîr seba şerabî vano. Lal, yew kerraya sûra giran-  
baha ya. Şaîr vano şerabo ke sey lalî sûr o û herikîyaye yo.  
**durrdane:** heba durrî, daneya încîye  
**destî:** yar û waşîfîyî qest benê

Yanî wa bikewo ruh û canê mi şewqêk  
Wa biyero werê zerrîya mi de zewqêk

15 Wa tesîrdar bibo nefes semedê mi ra  
Wa hewadar bibo qefes semedê mi ra

Wa zerrî de zelalîye biyero meydan  
Ez bibî hemvengê şalulan û bilbilan

Teyra zerrî ya merda wa bikuwo perwaz  
Bîla perde wa biwano bibo deyîrbaz

Ge-gane binala ez qaydeyê bilbilan  
Ge-gane biwana ez qaydeyê şalulan

Wa "ax"an rayir bikero şodir bi şodir  
Ê bi surrê vayî bibê heval û hogir

20 Wa abibê pindikê zerrî bi ê "ax"an  
Sosinî qisey bikerê biyerê ziwan

Wa bişkokî pel bidê, telî û sincan ra  
Tîm sey gonî sûr bikerê bi hezaran ra

Sûrgulî biberemê bi hesranê şebneman  
Û bilbilî bihuyê, bi rexmê hemdeman

Saqî bide mi mey û şerabê **gulgûnî**  
Bê vengê dawulî bê sedayê **qanûnî**

Qazî û muftî û zebtîyeyî nêvînê  
Keyfweşîye bibo zêde, xemî nêmanê

25 Wa weswese ra bibo pak no qelbo huznin  
Ancî newe ra bibî ez keso yewnayin

Ez bibî sermest, bivajî qalanê vengan  
Îfade bikerî çîyanê reng bi rengan

Bê keyf nêeşkena tebayêk bivajî ez  
Bibî delî-dîwane, durran birişnî ez

Hal-mecal ra bikewî, bidî teber sirran  
Bê qal û qisa zerrî ra bidî xeberan

Sey neyî binalî û bilornî bi ahang  
Sey tutîyan biyerî ziwane bivejî veng

30 Eşkera bibê bi mi keramet û razî  
Berz bibê mi ra meqamî, veng û awazî

Tewirê meqaman zerrî de bibê awaz  
Gulîstan seraser bibo **geweşt** û **şehnaz**

---

**gulgûn:** rengê gule, rengê xo sey rengê gulan

**qanûn:** yew enstrumanê muzîkî

**geweşt:** muzîk de yew meqam

**şehnaz:** muzîk de yew meqam

Sey ney' xorînîya zerrî ra, bi ahengî  
Se tewir veng û seda bivejî, sey **çengî**

Sey **rebabî**, bê keman û bê kemançeyî  
Veng bikewo defê mi ser, bê **tabançeyî**

**Zuhre** meqamê **uşşaqî** pê bihesîyo  
New qatanê asmênî de bireqisîyo

35 Sazê dilê kulî pirodo **berz û nizmî**  
Biceno meqamê eşqê Zîne û Memî

Ez Mem û Zîne xo rê bikerî behane  
Qalanê xemê zerrî bikerî efsane

Perde ra bivejî ez qeyde û meqaman  
Newe ra bidî Zîne û Memî ruh û can

Nêweş kewtê sewdaserî, waştî û yarî  
Ewro sey hekîmêkê zana û zanyarî

Derman bikerî înan ez weş-war bikerî  
Ê bêçareyan newe ra candar bikerî

---

**çeng:** yew enstrumanê muzîkî

**rebab:** yew enstrumanê muzîkî

**tabançe:** Tîya de manaya xo "toqmaqê dawulî" yo. Na çeku fariskî ya.

**Zuhre:** Venus

**uşşaq:** muzîk de yew meqam

**berz û nizm:** muzîk de perdeyo berz û perdeyo nizm qest beno

40 Zerrî ra dirbetin, ê Memê **cîgersojî**  
Zîna ke **xorînîye** ra ancena dejî

Aya peyê perdeyan, wayira îfeti  
Êyê bêsucê bêxetayê bêtometî

Bi terz û uslûb ez înan bikerî namdar  
Wa têver de nas bibê dilbere û dildar

Winî newe ra înan bikerî serfiraz  
Wa biyero temaşe kerdene **nezerbaz**

Wa seba Memî biberme waştî û yarî  
Wa pê derdê Zîne bihuyê sewdaserî

45 Hemderdî bi înan bikerê keyf û sefa  
Bêderdî bi înan biancê derd û cefa

Êyê zere ra pakî, êyê zerrîsafî  
Êyê wayirê rehmî, wayirê însafî

Wa pêro pîya "Helal bo" bivajê ma rê  
"Çiqas weş ardo pêser, çi weş dayo arê!"

Înanê ke hes kerdo, Heq tealayî ra  
Ezel ra Heq tealayî, hes kerdo ci ra

---

**cîgersoj:** cîgera xo sote/veşaye  
**xorînîye:** xorînîya zerrî  
**nezerbaz:** keso ke bi şengîye ewnîyeno



Wa biyerê destane goşdarî bikerê  
Tirşimêk tede xo vîr û vîndî bikerê

50 Tayê înan zerrî ra bikerê goşdarî  
Wa tayê zî zerrî ra biwazê xatirî

Rica û minetê mi semedê xoceyan  
Xeletîyan meşanê rîyê telebeyan

No kitab eger ke baş o, eger ke xirab  
Mi tede anto hezar zor û hezar ezab

Pit û pizez o, meyweyo tern û teze yo  
Ne kêr û nêr o, ne zêde û zîyade yo

Labelê ez nêkewta mîyanê tu reza  
Mi kesî ra teba nêgirewt sey xirxizan

55 No kitab pindê bax û baxçeyê dilî yo  
Masum o, pak û temîz o, rez û eslî yo

Hema neweber o; eger şîrin eger tal  
Sey tutanê sawîyan o, tîfil û mindal

Mi emel ardo bi famberan û halzanan  
Weş vînenê ê, nêşeçiznenê domanan

No meywe eke xag o, eke **newedar** o  
Labelê kurmancî yo, o zî ma rê kar o

No domano pizez, eke nenazenîn o  
La neweber o, çimê mi de zaf şîrin o

60 Eke zîyade ra nebaş û nelezîz o  
La domanek o, çimê mi de zaf ezîz o

Sînaye yo; çi cil û cor, çi kinc û kisvet  
Pêro mal-melalê min o, nîyo emanet

Heme vate û manayî, heme cumlayî  
Pêardiş û werêardiş, heme îmlayî

Mewzûyî, mirad-meqsedî, heme babetî  
Pesn û wesifnayış, îma û îşaretî

Vatiş, mana, salixdayiş, uslûb û sifet  
Qetîyen ne deyn û dîn ê, ne zî emanet

65 Pêro netîceyê fikir û nezerî yê  
Veyvekê neweyî, keynekê ezebî yê

Ya Reb, mede destê nezanan û saxikan  
Na rindekî û delalîya cannazikan

Ez hêvîdar a famber û ferasetdarî  
Do weş bivînê mi, meewnîyê qisûrî

---

**newardar:** eksê awdarî/awinî, hetê awdarîye/awinîye ra kêr

Ûy û şermezar nêkerê mi sey famkoran  
Wa rast bikerê xeletîyan û qisûran

Famberî nimnenê şaşî û xeletîye  
Xerezdarî kenê qîr-wîr, qajî-wajîye

70 Ez wazena êyê wayirê sirr û razan  
Wa pê mi nêkerê tinaz û papizan

Çerçî û etarî ya, gewherî nîya ez  
Xo bi xo deresaya, banderî nîya ez

Kurmanc a, naşî-nezan, koyî û kenarî  
Nê zî qal û qiseyê min ê kurdewarî

Îmza bikerê bi weşikîya hurmetî  
Goşdarî bikerê bi goşê merhemetî


Kîndar û xerezdarî ke kenê goşdarî  
Bibê eybê mi; binimnê, bikerê tarî

75 Merişnê awa rîyî, medejnê şairî  
Wa bivajê qala weşe, vateyê xeyrî

Ecêb memanê, pê şaşî û xeletîyan  
Weş şirove bikerê, mana bidê înan



**DESTPÊKÊ MEQALE PESNÊ HAKIMÊ BOTAN  
Ê WAYIRÊ ÎQBALÎ  
MÎR ZEYNEDÎNO LAJÊ MÎR EVDALÎ  
WESFÊ HER DI WAYANÊ CI YÊ WAYIRÊ CEMALÎ  
ZÎNE Û SITÎ, ÊYÊ BÊEMSALÎ**



Neqaşê pel û rîpelanê hîkayetî  
Serafê kulçe w qalibanê rîwayetî

Bi no hawa ronayî neqîş û nîgarî  
Bi no hawa day piro tît û derb û morî

Vat: Wextê verênî de şahêko muzafer  
Hukm û îdareyê xo de serfiraz, aver

Ronayêne ver de miletan mil û sere  
Esl û fesl ra ereb bî la kurdan rê mîre

5 Textê ci Cizîre de, bext tede dost û yar  
Talihê ci weş, meqamê ci berz û dîyar

Dayêne rûm û ereb û ecemî ferman  
Meşhûr û namdar, bi nameyê "Mîrê Botan"

Pîr û pîrbabî, bawkalî, ced û ecdadî  
Eslê ci şîyêne resayêne **Xalidî**

Ey ra xo pawitêne felekê zordarî  
Kalan ra antbi şimşêrê xo yê **Cebarî**

Tît û xeml û xêzê milkî, **zeynê dînî** bî  
Nameyo weş yê ê mîreyî, Zeynedîn bî

10 Wesifê mîreyîye "**zîn**" bî, seba ey ra  
Tarîfê xeml û xêzî "**dîn**" bî seba ey ra

Eserê egîdîya ê şah û sultanî  
Maseyê deryayî ra ta aşma asmênî

Bi mahîyet, merkez û qutubê na dinya  
Bi şahîyat, remz û îşaretê a dinya

Duştê comerdîya ey de mehcûb bî Hatem  
Duştê egîdîya ey de mexlûb bî Rustem

Hatemî pîlîya lutf û îhsanê ey ver  
Arêdayêne boxçike, kerdêne pêser

---

**Xalid:** Ehmedê Xanî gore bapîrê mîreyanê Cizîra Botan, yanî vano  
ê xalidî yê.

**Cebar:** Yew nameyê Homayî yo, yeno manaya wayirê qewet û qudretî

**zeynê dînî:** yanî ziyetê dînî, xeml û xêzê dînî

**zîn:** ziyet, xeml û xêz; nîmeyê nameyê Zeynedînî qest beno.

**dîn:** bawerî, îtîqad; nîmeyo bîn yê nameyê mîr Zeynedînî qest beno.

15 Aqil û huner û meydan û comerdîye  
Terz û nîzam û dîwan û rayirzanîye

Edalet û dîyanet û dewlemendîye  
Pawitiş û hêrîşkerdiş û serdarîye

Wegirewtbî ey her yewî ra xezînayêk  
Degirewtbî ey her yewî ra defînayêk

Vistêne bi dest her çî, bê zor û bê zehmet  
Ci rê bîyêne bi pare, asan û rehet

Her bêj ra çîyê nadirî, û cewahîrî  
Her reng ra çîyê weşîkî, û zewahîrî

20 Heme çîyê mumkinî, yê arzûkerdene  
Daybî ci Comerdî, û daybî dest vistene

Bi ey, merdim resayêne bi meqsedê xo  
Bi ey, merdim resayêne bi miradê xo

**Heremê** ey dekerde bî bi nazenînan  
Cenetê ey dekerde bî bi **serhorîyan**

Horîyê cenetê ci zaf û gelek bîyî  
Xulam û xizmetkarê ci melekî bîyî

---

**herem:** qesr û qonaxe de qismê keye û kulfetê mireyan û şahan  
**serhorîye:** sereka horîyan, horîya ke serê horîyan a

Labelê azê keyeyê na mîreyîye  
Neweberê bax-bostanê îfetdarîye

25 Di keybanuyî estbî verê ê şahî de  
Di rojî bîyî, verê ê padîşahî de

Yanî di wayî, di wayê semtê nazdarî  
Yê ê keyeyî, yê ê nesilê rezdarî

Yew selwîyêra bax û baxçeyê rastîye  
"Sifî" vajîyayêne ci ra, bi rastîye

Aya bîne zerrî û cîgera mîreyî  
**Nameyê xo nîmeyê nameyê mîreyî**

**Sanikvajî** sergirewte da goşê mi ro:  
A horîye, name "Zîne" nîyaya piro

30 Yewera zaf şîrin a, eynî sey şekerî  
Aya bîne ruh û can a, leteyê zerrî

Yewere esmer a, aya bîne kejike  
Yewere horî ya, aya bîne meleke

A horîye, a perîye; bêhempa bîyî  
Çimkî her di zî nûrê Homayî ra bîyî

---

**Nameyê xo nîmeyê nameyê mîreyî:** Zîne qest bena, yanî "zîn" nîmeyê nameyê mîr Zeynedîni yo.

**sanikvaj:** keso ke sanikan vano, rawî; rîwayetkerdox

Yê înan ser ra kesî nêdîbî rindîye  
Cemalê Homayî ra girewtîbî semtîye

Rî sey gulan û yasemînan, lewî sim-sûr  
**Pûtanê Xulluxî** duşt de ardêne war mûr

35 Her di zulifî manenê têlê sumbulan  
Her di alişkî manenê rîyê sûrgulan

Ê sûrgulê serbestî, sunbulê azadî  
Beşna ci beşna dara selwî û şimşadî

Rîyê ci de bi xo weameybî sûrgulî  
Piro şeqitîyaybî war heme sunbulî

Rindekîya rîyî sey **nuşteyê yaqûte**  
Çalika çeneyî zî sey sêhrê **Harûte**

Rişîyaybî rîyê ci ser miskê boyweşî  
Bi destê faldarêk şanikê rindê başî

---

**pûtê Xulluxî:** Xullux bajarê Tirkmenîstanî biyo, bi rindekîya keynayanê xo meşhûr biyo. Keynekê ci hende rindek biyê ke bi pûtan û heykelan ameyê şibnayene û înan ra vato "pûtê Xulluxî". Ehmedê Xanî dayo zanayene ke Zîne û Sîfî rindekîya kênayanê Xulluxî de deyr nêverdayo, rûmetê rindekîya înan şikito. (notê M. Emîn Bozarlanî)

**nuşteyê yaqûte:** tewirêk nuşteyê alfabeya erebkî

**Harûte:** Yew melek a, senî ke aye bi embazê xo Marûtî sêhr kerdo û sêhrkerdişî ser o mijûl biyê, Homayî ê ceza kerdê, Babil de eştê zereyê bîrêk û ferman dayo ke hetanî roja qiyametî tede bimanê. Vanê sêhr û sêhrkariye înan ra menda û rîyê dinya ra bîya vila. (notê M. Emîn Bozarlanî)



40 Ê şanikî, nuqtayê sipîyê sûrekî  
Hecer û tewafê Kabeyê bimbarekî

Birûyê xo kewanê felekî, yê înan  
Bijangê înan tîrê xofnakî bêguman

Sermayeyê dehşetî bî semedê haran  
Îşaretê ters û xewfê çimanê înan

Ca de heyret keno, desinde beno heyran  
Kam bivîno îma-îşaretê ê çiman

Pê tace çareyê ci aseyêne winî  
Seke perrê Cebraîlê rîyê asmênî

45 Seke nîmeyê asmênî ra vinderto roj  
Kewto xizmetê înan ver, bişewe, biroj

Kamî bidîyêne o dev-rî, o pelegoş  
Aqil sere ra şîyêne, perrnayêne hiş

Gerden, ti vanê qey qedeh, seke şûşe yo  
Destê aşiqan de, fek ra dekerde mey o

Yan maneno şûşeyê **şekerê nebatî**  
Yan maneno serçimeyê awa heyatî

---

**şekerê nebatî:** Şekero ke parzûn beno û sey helwa yeno huşkerdiş, rengê xo zelal o, maneno camî. Seba dermanî yo. (notê M. Emîn Bozarlanî)

**Sergiştan** û nenuganê hinekerdeyan  
Şiknayêne xatirê zerrîyanê weşan

50 Kamî bidîyêne o mîyane, a mîye  
Xorînîya zerrî ra antêne axîye

Çi mehal nîşan bidayêne zend û bazin  
Hinî lazim nêbîyêne gerre û **gazin**

Her çiqas ke di bedenî bî, di can bîyî  
Labelê rindîye de sey cêwîyan bîyî

Tabî nazenîn bîye Sitî, sey perîyan  
La horîye bîye Zîne, sey serhorîyan

Her çiqas ke Sitî estareyo weş bîye  
Bêguman ke Zîne zî rojêko geş bîye

55 Sitî mîsalê aşme şewq û şemal bîye  
Zîne aşma pirrpancêse zaf delal bîye

Têver û têhet de ê her di şewçilayan  
Wexto ke linge eştêne rez û hêgayan

Nalan ginayêne bêgan û heywanan ro  
Talan ginayêne nebat û însanan ro

Kofîyê înan bi gewheran xemilnaye  
Gerdenîyî bi pûl-pelikan rêzilnaye

---

**sergiştan:** serê engiştan, serê pêçikan

**gazin:** gerre, lome, sîtem

Wexto ke xemlê çareyî veradayêne war  
Aşiqan derdê zerrî ra kerdêne qar-war

60 Xeml û xêz, mûrayî-mircan, xişir û zîynet  
Ver û pey, cêr û cor, çep û rast, nohet, ohet

Key ke pê geyrayêne ê her di perîyî  
Kerdêne gêj dergeyan de kesê welîyî

Pîrî, rayberî, şeyxî, melayî, mîreyî  
Derwêşî, maldarî, feqîrî, fiqareyî

Pêro pîya miradwazê cemalê weşî  
Pêro pîya zî heweskarê pêrestîşî

Tayê miradwazê semtîya bêpeynîye  
Tayê heweskarê leşa tala fanîye

65 Labelê pêro zî eynî yê; yew û dostî  
Ferqê mabeynê înan, ferqê mezg û postî



UMÛMEN BEHSÊ QÎYMETÊ QUMAŞ Û SERWETÊ  
PÎLÎYA HUSNÊ HEBÎBAN  
XISÛSEN NÎŞANDAYIŞÊ CEWHER Û BAHAYÊ  
CEMALÊ SITÎ Û ZÎNAN



Dinya de çende ke estê sultan û şahî  
Çende ke dayo înan mal û milk Ellahî

Heme û tamamê xiznayanê Qeyserî  
Heme û tamamê **dexmeya Îskenderî**

Heme cewherê defîneyanê Xaqanî  
Heta lalanê îştraneyê Silêmanî

Her çiqas ke zîyade ra giranbaha yê  
La heme leteyê rindîya înan nîyê

5 Rindî û semtîya rîyê Sitî û Zîne  
Bibî yew deryayê adirê sînayene

Wexto ke eştêne pêser pêlan har û gizm  
Roj ge-ge bîyêne berz ge-ge bîyêne nizm

---

**dexmeya Îskenderî:** Tîya de Îskenderê Makedonî qest beno. Tayê efsaneyan gore, tirba nê hukimdarî de zaf defînayî estê la cayê înan tes-bîl nêbiyo. Ehmedê Xanî seba na defîna "daxme" vato ke na çekuye yena manaya tabute, mezele û tirbe. (notê Kadri Yıldırımî)

Hezar can, zerrî û cîgerî veşnayêne  
Miletî înan ser meseleyî vatêne

Ê têver de roj û aşme bîyî, beramber  
**Muşterîyê** ci no cîhan pêro, seraser

Seydwanê rindekîya ê her di xezalan  
Kamî cewab dayêne vengê ê delalan

10 Zaf tenî sey şêran tayê zî sey **delalan**  
Nêbîyêne mird, pê nalayîş û fîxanan

Bi rojan û bi şewan gelêk nalayêne  
Heta înan reyde melekî kalayêne

Rindekîya ke ci rê çin bo der û sînor  
Nêqedîyenê aşiqî benê qor bi qor

Labelê aşiqî, heweskarî cîya yê  
Tayê feydeperest, tayê zî canfeda yê

Cananan kenê feda, tayê seba canan  
Canan kenê feda tayê seba cananan

15 Tayê sey Tacdînî resenê bi miradan  
Tayê zî sey Mem û Zîne ancenê derdan


---

**Muşterî:** Mars. Na beyte de roj û aşme Sîfî û Zîne yê. Eke aşme û Muşterî (Mars) eynî birc de biyerê têhet, no çiyêko bimbarek hesabîyeno û bawer beno ke kam o wext biyero dinya beno kesêko zerrînerm û îfetin, zerrînizm û comerd. (notê Kadri Yıldırımî)

**delal:** vengdayox, wezîfedaro ke sûke û bazaran, çayanê qelebalixan ra geyreno, bi vengo berz şarf derheqê çiyêk de xebardar keno



## AÇARNAYIŞÊ HEVSAR Û REŞMEYÎ VER BI PEYNÎYA QAL Û VATEYÎ



Ma ageyrin a hîkayeya verêne ser  
Kesê ke tede sewda ra ancenê keder

Tabî zaf zêde bîyî bêhed û bêhûmar  
Tayê giregir, tayê feqîr û xizmetkar

Labelê se xizmetkarê weş û mumtazî  
Se xort û ciwanê qamdergê serfirazî

Her yew bi rindîya xo mîsalê rojêk bî  
Her yew bi vatişanê xo cîgersojêk bî

5 Her yew bi kemalê xo sey **aşmanê sûran**  
Her yew bi cemalê xo sey **sîneyê şahan**

Ê heme aşiq bîyî, ê heme sewdakar  
Heme arzûdar bîyî, heme zî heweskar

---

**aşmanê sûran:** aşma zerde, aşma pirre, aşmapirrrancêse

**sîneyê şahan:** Seba ke şahî madalyayan aliqnenê bi sîneyê xo wa  
û sîneyê xo bi madalyayan xemilnenê û kenê weşik, Ehmedê Xanî ê xortî  
şibênayê sîneyê şahan. (notê M. Emîn Bozarlanî)

Bêguman ke ne bi dîyene û şehadet  
Belkî bi pêhesîyayene û rîwayet

Pêro pîya seba mîrî xizmetkarî bî  
Pêro sîrrê yewbînana ra xeberdarî bî

Pîl û ser û serwerê ê perîsûretan  
Pîr û tac û sertacê ê melexisletan

10 Tacdîn vejîyayêne ci rê, ciwanêk bî  
**Guhderzê** dem û dewranî, pehlewanêk bî

Bin û bineşeyê xo eyan û beyan bî  
Serdefter û serwerê xort û ciwanan bî

Babîyê ey rê vajîyayêne Eskender  
Lakîn ereban ci rê vatêne **Xezenfer**

Çimkî bi dilawerîya xo sey şêran bî  
Ceng de o bedelê hezar cengaweran bî

Di birayê ci estbîyî, her di **cengbazi**  
Her di sey şahînan bîyî, sey teyrê bazî

15 Tim û tim zerrîya dişmenan veşnayêne  
Yew Arif, yewî rê Çeko vajîyayêne

---

**Guhderz:** Şehnameyê Firdewsî de cengawero efsanewî.

**xezenfer:** bi erebkî şêr

**cengbaz:** keso ke weş ceng keno, keso ke usûlê cengî baş zaneno

Emâ ey mîyanê hende xas û xaman ra  
Mîyanê hende bab û bira û maman ra

Xortêk û ciwanêk kerdbî bira seba xo  
Nê nê, mi xelet vat, kerdbî çila seba xo

Roja ke Tacdînî o bira nêdiyêne  
Bîyêne sey şewa ke çila nêdiyêne

Dinya ser o bîyêne ting-tarî desinde  
O birayo sey rojî ke kewtêne dalde

20 Embazê keyfweşîye, şîrîkê xemî bî  
Xerqê derdan û kulan, nameyê ci Mem bî

Mem zî Tacdînî rê paştîgîro tamam bî  
Ne sey bira û sey babîyî, ne sey mam' bî

Her çiqas ke birayê axiretî bîyî  
La seke sey dinya û axiretî bîyî

Tacdîn lajê wezîrê dîwanê mîreyî  
Mem zî lajê nuserê dîwanê mîreyî

Her di xort û ciwanî têver de dost bîyî  
Her di birayî pîya rast û durist bîyî

25 Yewer Qeysê ewroyî bî, yewer zî Leyla  
Yewer Wamiqê dem-dewranî, yewer Ezra



Dostê tamamî biyî, nêbiyî serserî  
Têver de û pîya seke **Mîhr û Muşterî**

Dostiye, destebirayîye, birakîye  
Nêbena pê dirîyîye û difekîye

Birakîye asan nîya, cefakarî ya  
Meqsed û amancê ci zî wefadarî ya

Destberê to ke nîyena wefadarîye  
Caran verê xo mede, a cefakarîye

---

**Mîhr û Muşterî:** Mesnewîyêk a. Hikayeya xo wina ya: Şahê ece-man Şapûr û wezîrê ci bêewlad benê. Rojêk rastê yew derwêşî yenê, derwêş tilsimêk dano înan û vano, domanê şîma benê. Her yewî ra yew laj beno, lajê Şapûrî rê vanê "Mîhr", lajê wezîrê vanê "Muşterî". Her di lajekî şonê eynî mekteb û yewbînan ra zaf heskenê. Her diyan yewbînan ra cîya kenê. Badê, Mîhrî erzenê hepis, seba ke îdam bikero Muşterî zî teslîmê celadî kenê. Sayeyê tayê kesan Muşterî îdam ra xelisîyeno; ey rusnenê Îraq. Mîhr hepis ra vejîyeno, şono ey vînenê; pîya kewenê rayîrê Azerbaycanî ser. Dima Mîhr cayê pîyê xo gêno û beno şah. Nêweş keweno û mireno. Mergê Mîhrî ser o Muşterî deyx nêkeno, o zî mireno. (notê Kadri Yıldırımî ra)

Mîhr û Muşterî, yenê manaya Roj û Jupîterî zî ke Jupîter mîyanê seyareyan de seyareyo tewr gird o.



**DESTANA BEYANÊ NEWROZA SULTANÎ  
NAMEDAYIŞÊ MEWSIMÊ KEYFWEŞÎ Û ŞADIMANÎ  
BI HAWAYÊ TOREYANÊ VERÊNAN Ê KURDISTANÎ  
KE ÎNAN CI RÊ VATÊNE "SERSAL"  
BIMBAREK Kerdêne Sey Roşanê Wîsal'**



Afernayoxê dinya bi feyzê fitretî  
Heme felekî zî bi hawayê qudretî

Bê qalib, bê şekil, bê peyme û bê mîqyas  
Bê alet, bê hacet, bê cetwel û bê meqes

Hende gilor-gilover, hende berz û bala  
Hende pêser o çend qatî, hende **la bi la**

Ronayê, ravisnayê, heme ardê meydan  
Vetê, ramojnayê, û dayê verê çiman

5 Hîkmet o yo ke pêro zî bi kar û bar ê  
Tayê ci peya yê, tayê ci zî espar ê

Ci ra ta-tayê giran ê, ta-tayê lezgîn  
Tayê sist û pist ê, tayê zî zexm û qewîn

---

**la bi la:** qat bi qat

Tayê bextreş ê, tayê wayirê tedbîrî  
Tayê bextweş ê, tayê wayirê kederî

Ci ra tayê katib ê, ci ra tayê ustad  
Ci ra tayê sazband ê, ci ra tayê celad

Tayê şewq-şemalê şewe, tayê rojperest  
Tayê keyf anê, tayê fînenê xemî dest

10 Ci ra tayê xo sey Zîne kej û zerî yê  
Ci ra tayê xo zî sey Memî muşterî yê

Heme roşnîye danê, nûrdar û **munîr** ê  
Tayê xo padîşah ê, tayê zî wezîr ê

Tayê bi hereketo normal û edetî  
Anê dem û wextê wisarî bi taybetî

Kenê newe seba ma, serre û demserrî  
Key ke resayî berê payiz û wisarî

Zanayê kamilê serekê pîrê kalî  
Bi no hawa ma rê vatî hal û hewalî

15 Vat: Edeto verên, û edetê verênan  
Wina biyo, her tim wina ameyo meydan

Wexto ke **şahsuwarê** hetê rojhelatî  
Çarnayêne verê xo, wextê aşma martî

---

**munîr:** roşnin, roşnak, roşndayox

**şahsuwar:** esparo westa, esparo pîl, şîre de roj qest beno

Yanî, key ke kewtêne bircê serê serre  
Biyêne veng-varit, dor-ver, keye û zere

Pêro zere ra vejîyayêne bi teber  
Cinî-camêrd, pîr û kal, pîya û beramber

Wexto ke ameyêne roşanê Newroze  
Seba qedrgirewtîşê a roja pîroze

20 Kerdêne mekan û mesken, çol û çolistan  
Kerdêne vil û vilistan, yazî û yaban

Bîlhesa ezebî, û keynekê **bakîrî**  
Welhasilî kelam, cewahîrê nadîrî

Pêro viraşte û xemilnaye û kildar  
Pêro zî seba seyr û seyranî destûrdar

Labelê ne bi gune û tomet û minet  
Bi usûl û edeb, bi şerîet û sunet

Çimkî amanc û nîyetê înan bî seyran  
Geyrayîş û dîyayîşê deşt û berrîyan

25 Winî bî ke hem yarî hem zî sewdakarî  
Yanî her di hetî dilberî û dildarî

Wa çimê her di hetan bigino yewbînan  
Xo gore bivînê, hemveran û hemserran

---

**bakîr:** bakîra; keynayî



**RAYIRKEWTIŞÊ BAJARÎYAN VER BI DEŞTE  
SEBA SEYRANÊ SERÊ SERRE Û GEŞTE**



Çerxê felekî akerd bext, kerd weş û pîroz  
Reyna û newe ra ard, verê berî Newroz

Goreyê usûl û toreyan, erf-edetan  
Bajarîyan, muhafizan, gencan û xortan

Ca verda bajar, kelayî, keye-keyberî  
Seke cergewan ê, û seke talankerî

Verê xo da bi daran û beran, sef bi sef  
Leqayî seba seyr û seyranî, ref bi ref

5 Esnaf û dikandarî pêro, qij û pîlî  
Kes nêmend bajar de, pîr û kal, qeç û qulî

Tayê bi peyayîye şîyî bax-baxçeyan  
Tayê bi esparîye şîyî dol-doreyan

Tayê pêro pîya, yanî bi şêligane  
Tayê embazan reyra, tayê zî kesane

Wuriştî xo ser, heme xanim û xatûnî  
Bi înan bîyî vilistan, bax û bostanî

Ê horîyan xo rê kerd ca û mesken cenet  
Bê perde, bê destûr, bê riza û bê minet

10 Keynekê ezebî, genc û rihalê çakî  
Ser-çim û bisk-birûyan ra temîz û pakî

Ê keynekê çiçikilorê bakîreyî  
Êyê rihalê tamamê tern û tezeyî

Êyê wayirê dev û rîyê sey qumaşî  
Êyê wayirê vînayîşê weşê başî

Rindekîya xo ramoynayêne yewbînan  
Texmîn kerdêne dergî-hîrayîye înan

Bazirganê eşqî bîyî, ehlê bazarî  
Hem rotoxê rindekîye, hem zî muştêrî

15 Keynekan û lajekanê tern û tezeyan  
Gede-gudeyan, pîr-kalanê seserreyan

Serê serre, goreyê edet û toreyî  
Bimbarek kerd, kerdî şên ê ca û zereyî



**DESTÛRDAYIŞ BI XORTAN SEBA ŞÎYAYIŞ  
SEYRANÊ SERSALÎ  
REXBETDARIYA ÎNAN SEBA BAZARÊ  
HUSN Û CEMALÎ**



**Qendîla** ke roşnîye dana **dêrê şînî**  
**Taqaya Kavirî** kerde roşnak û roşnî

Serê serre ke ancî newe ra bî **mamûr**  
Mîreyî da xortanê tern-tezeyan destûr

Wexto ke destûr dîya seba ê lajekan  
Wuriştî xo ser pêro pîya sey aşiqan

Pêro pîya wuriştî şîyî seyr û seyran  
Heme zî wayirê meqsedan û miradan

25 Labelê ci ra Memo û Tacdînî tena  
Sey keynekan pîya xo viraşt û xemilna

Wexto ke ageyra roj, û verê xo çarna  
Ê her di birayan zî kinc û kol bedilna

---

**qendîle:** roj qest beno

**dêro şîn:** asmên qest beno

**Taqaya Kavirî:** Bircê Kavirî (bi tirkî: Koç burcu) qest beno. Roj 21ê adare de  
keweno nê bircî. (notê M. Emîn Bozarlanî)

**mamûr:** îmarbîyaye, şên, geş

**Îstebreq û sundisî** beşne û bale ra  
Serepêşî, mendîlî, çîtî zî sere ra

Viraştbî înan, bisk û biskekî her het ra  
Ro ver daybî gila-gilangî, nat û wet ra

Her diyan zî bedilnaybî ke kinc û kisvet  
Wa ci rê peyda nêbo, ne zor ne zî zehmet

10 Xemilnaybî xo pê kinc û kolê dilberan  
Kewtbî seyr û seyran, giran û seregiran

---

**îstebreq:** yew tewir qumaş  
**sundis:** yew çeşit qumaş





**RASTAMEYIŞÊ TACDÎN Û MEMÎ BI SITÎ Û ZÎNAN  
DERYAYÊ EŞQ Û SEWDA DE XERQBIYAYIŞÊ ÎNAN**



Her di birayî ke pê kincanê keynekan  
Wexto ke geyrayêne, çarşîyan û sûkan

Xafil ra ecêbêk rî da verê çiman de  
Vîçikêk aqil nêmend sereyê înan de

Dî ke heme zîqaqan heme mehlayan de  
Heme kuçe-kolanan heme pacayan de

Se gencanê tezeyanê sey selwiyêran  
Kincê birîsimênî dayê xo ra înan

5 Panc seyî keynekan ra, panc sey rihalan ra  
Hende zî kokiman ra, pîran û kalan ra

Tewir-tewir camêrdî, her tewir hermetî  
Tayê pê kinc-kolan, tayê viran û rûtî

Tayê serwer ê, tayê pîlê giregirî  
Tayê neçar ê, tayê feqîrê miheyîrî

Lingî warpay, sereyê xo qot, yê tayênan  
Kakate gilor, petikê xo sey çoganan

Sermest ê tayê, yê tayênan hewa-hewes  
Keyfweş ê tayê, yê tayênan teng o nefes

10 Qisey kenê tayê, tayê zî kerr û lal ê  
Vazd danê tayê, tayê zî şaş û medhel ê

**Serexaş** ê tayê, tayê kinc-dirîyaye  
Dengeser ê tayê, tayê aqilpernaye

Bi qîr û wîr ê tayê, bi fixanî û feryad  
Visnayo bendê aqilî, bîyê hurr-azad

Her yewê xo bi qaydeyêk û bi hawayêk  
Her yewê xo cîgerveşaye, bi cefayêk

Şaş mendî di birayî, bîyî heyretkarî  
Bîyî xerqê deryayê fikir û eftarî

15 Tacdîn cayê xo de edilîya, û pers kerd  
Persê xo zî yewerê extîyarî ra kerd

Va: "Ey Xizirê kalê rayirê rastîye  
No çi hal-hewal o, ci rê çin a peynîye?"

Kokimî vat: "Di keleşê çuştê cîhatî  
Kewtê mîyan, anê kok û qirrê miletî

---

**serexaş:** sereşikîyaye, sereşikite "xaş" çekuyêka fariskî ya (notê M. Emîn Bozarlanî)

Çimê kamî bigino ê her di keleşan  
Desinde hal ra keweno, beno perîşan”

Înan vat: “To nêdî, gelo bi çi hawa yê?”

Ey vat: “Di laj ê, zîyade ra zerrîşa yê”

20 Înan vat: “Yê înan şimşêr o yan **şesper** o  
Ecêba tîr-keman o, ecêba xencer o?”

Kokimî vat: “Bi **xemzeyan** û bi awiran  
Xelq û alemî kişenê, sey serê tîran”

Persayêne ke, eger çim biginê înan  
Desinde dest biberê xo, sey qehremanan

Wexto ke kerdêne pers û pûrsê her diyan  
Hetê Heqî ra ê zî vejîyayî meydan

Sey di peykeran ê, her di zî genc-rîhali  
Sey **şahê estareyan**, danê şewq-şemalî

25 Eynî yo hal û hewal, eynî yê lîbasî  
La her di zî no bajar de, xam û nenasî

Hal-hereket ra melek, hal-hewal ra perfî  
Labelê her di zî ne rotox ne muşterî

---

**şesper:** şeşkenar, zemanê verî de yew tewirê gurzan biyo (notê M.  
Emîn Bozarlanî)

**xemze:** ewnîyayişo bidîqet û kişte ra

**şahê estareyan:** roj, şair rojî qest keno / **şabaş:** bexşîş, xelate

Her di birayan ke dîyî ê di keleşî  
Zerrî û canê xo, ci rê kerdî şabaşî

Her di zî xo ra şîyî, bîyî şaş û cindar  
Ne aqil mend sere de ne bîyî hayîdar

Çin bî hiş û aqil, çin bî xîret û taqet  
Kaş bîyêne nata-weta, taket û naket

30 Nêmendbî tede aqil, can ra bibî bêzar  
Tadîyayêne her di, zerrî kerdbî hewar

Ê her di perîyanê rindanê keleşan  
Dî ke di kesî hê kewtê halo perîşan

Leteyêkê aşme yê, la manenê rojî  
Dildar û bengîn ê, her di zî cîgersojî

Bi hal û hewal, **nêçîrê nêmebismilî**  
Bêguman kewtê halê giranê muşkilî

Ver çarna ci şîyî serê ê di nêçîran  
Bala xo daye, rîyê ci yê sey nîgaran

35 Ca de fam kerd ke ê kesê serserî niyê  
Serê eskerê dildaran ê, suwarî yê

**nêçîro nêmebismilî:** Nêçîro nêmebesmele, nêçîro nêmebismîlah; heywano nêçîrkerde ke sere nîme cira biyo; heywano nêçîrkerde ke qirika ci nîme ameya birnayiş û bi no hal hem gane yo hem merde yo. Wexto ke nêçîrvanî heywan serebirnayo, "bîsmîlah" nêmcet verdaya, sere tam cira nêkerdo. (notê M. Emîn Bozarlanî)

Cayê xo de vindertî, ewnîyay bi dîqet  
Ame zerrîya înan ro, rehm û merhemet

Yanî bi rindekîya ê nêmebismilan  
Merhemetêk kewt zerrîya her di delalan

Zerrîyan sirrê xo da yewbînî, a game  
Rîyan zî nûrê xo da yewbînî, a game

Eşkera û kifş o, rayirê pîyayîye  
Ruhan rê çin bîye xamî û cîyayîye

40 Qudretêkê safiyî, yê alemê sirran  
Tavisna adirê zerrîyan û cîgeran

Heskerdişî têver de ê kerdî **girîftar**  
Rindekîye têver de ê kerdî sewdakar

To vatêne qey hem bedenî hem zî canî  
Çar heme pîya hem canî hem zî cananî

Bêguman ke yew ê, hem ruhî hem zî tenî  
Yew û eynî yê, hem canî hem zî bedenî

Eşqo ke zerrî pê bena şîrin û şerbet  
Xerezo ke zerrî pê bena kîn û nefret

---

**girîftar:** bengîn, mubtela

45 Ma gore badê peyda bîyê, nemuhîm ê  
Labelê heqîqeto verên o, qedîm ê

Çimkî eskerê canî ke ameyê pêser  
Afernayê Heqî, pêro bêmergîye ser

Tayê dost û yar ê, tayê zî eks û cîya  
Tayê serehuşk ê, tayê zî aşî û pîya

Ê embazî ke ameyî têver û têhet  
Vernîya ci de nêmend, ne zor ne zî zehmet

Yanî ê her di keleşanê gonîweran  
Wexto ke çimê xo gina ê birîndaran

50 Her diyan pê se zerrîyan heskerd û sîna  
Roniştî, verê her diyan tada û çarna

Biney mendî beşn-bala ra, mendî qaman ra  
Mendî bisk û birûyan ra, mendî çiman ra

Vat: "Ecêba nê her di keynekê kamî yê,  
Ecêba her di zî melekê Homayî yê?"

Her di meyweyê kamcîn bax û bostanî yê,  
Her di pîya gulê kamcîn gulîstanî yê?

Selwîyêrê verê çî awe û çeman ê,  
Her di pîya teyrê kam merg û çîmenan ê?"

55 Bîyî war çiman ra hesirî sey **gulawan**  
Rişîyayî serê rîyê ê birîndaran

Zerrî ê bi no qayde qet nêkerdî hişyar  
Xo de nêbîyî, xo ra nêbîyî xeberdar

Peynîye de zî pê qelema eşq û sewda  
Cemalê ci, lewhaya zerrî ro neqîş da

Waştêne ke bizanê esl û feslê înan  
Çimkî nêzanayêne çi yo neslê înan

Engiştaneyê her di ciwananê çêran  
Vetî bêçîkanê înan ra giran-giran

60 Engiştaneyî bêçîkanê xo ra vetî  
Kerdî bêçîkanê înan qey îşaretî

Înan yaqûtî bedilnayî bi mûrayan  
Elmasî zî bi şûşeyanê **bilûrîyan**

Caverda kay û kelebût, caverda roşan  
Zewq û sefa bedilna bi derdan û dejan

Dî ke tayê xerîbî hê yenê raşteraşt  
Wuriştî cayê xo ra bê zerrî xatir waşt

---

**gulawe:** awa gulan

**bilûr:** krîstal

Mendî her di birayî sey nêçîr û seydan  
Pêra girêdayeyê zincîran û qeydan

65 Wuriştî ke şewe ser o bîya ting-tarî  
Ne roj ne aşme, nêmojnênê sûret û rî

Halê xo halê teyrânê nêmebismilan  
Halê xo halê bêfiran û bêmecalan

Bêhal û gêj û xilmaş ê, dejeno sere  
Sewda dest ra bîyê sersem, veşeno zere

Ginayî çal û çulan ro, bi hezar reyî  
Hetanî ke kerd teber, rayirê keyeyî

Her çiqas ke şîyî û resayî xo cayan  
Labelê anegoreyê ê bextsîyayan

70 Hem biroj hem bişewe, hem şodir hem zî şan  
Kewtbî têmîyan ra; bibî yew, bibî **yeksan**

---

**yeksan:** seypê, eynî, yew





**BÊHIŞÎ Û SERXWEŞÎYA ŞERABÊ EŞQÎ RA  
HIŞYARBÎYAYIŞÊ MEM Û TACDÎNAN  
SER Û SEBEBÊ EŞQÎ RA AGAHDAR  
Û XEBERDARBÎYAYIŞÊ ÎNAN**



Ê her di teyrê şahînê çimgirewteyî  
Yanî Memo û Tacdîno perşikiteyî

Şîbî seyd û nêçîrê zerencan û qazan  
La erzîyaybî înan ser mîsalê bazan

Torrêk lefîyaybî her diyan ro xafil ra  
Hinî nêbibî haydar û xeberdar xo ra

Heta hewteyê Kavirî nêvîyart nêşî  
Ê mîyanê cilan de nêweş û cankêşî

Wexto ke pey de mend o hewte, vîyart û şî  
5 Çimî akerdî înan, biney bîyî weşî

Rojêk pîya têver de wuriştî payan ser  
Bala xo da rî û rûçikê yewbînan ser

Sewda dest ra vurîyaybî, bedilîyaybî  
Reya verêne yewbînan nêşinasnaybî

Verî, yewbînî zana xam-xeşîm û nenas  
Dima, yewbînî zana nas û dost û şinas

Dî ke çokî bê fir, tede nêmando taqet  
Perî şikîyayê, perayîş zor û zehmet

10 **Uskûfê** tarî-zulmetî, dîyayo ser ra  
**Culfûyê** dost yariye, nîyayo ver ra

Ne werdiş ne şimitiş; nêvînenê çimî  
Ne hal ne mecal; nêerzîyenê ver gamî

Mest û serxweş ê, sey çimanê sewdaseran  
Gêj û xilmaş ê, sey kesanê merezdaran

Sey fekê yaran tengela, zerrîyê tengî  
Nalayîşê reyayanê zerrî, sey çengî

Vat: "Ecêba ma kotî de biyî merezdar,  
Wat: "Yan zî ma kamcîn ceng de biyî birîndar?"

15 Se biyo bi ma, çi yo no hal-hewalê ma,  
Çira tikena zerrî, qey bêmeçal ê ma?"

---

**Uskûf, Culfû:** Verî, wexto ke nêçîrvanan teyrê bazî yê nêçîrî qefil-nayêne, seba kedîkerdişî, rîpêşêko çerme ra sey tewreyî antêne sereyê înan, perdeyêko sûr zî antêne sîneyê înan. Bawer kerdêne ke a rîpêşe bazan finena tarî û kena gêj, o perde zî înan musneno embazîye. Nîmeyê maske "uskûf" nîme zî "culfû" biyo. Ehmedê Xanî Mem û Tacdîn teşbîhê bazanê tepîştayan kerdê ke uskûf ancîyayo înan ser, culfû zî nîyayo înan ver. (notê M. Emîn Bozarslanî)

Wexto ke bi no tore fikirîyayêne  
Hal-hewalê xo ser o hizirîyayêne

Tacdînî ewnîya ke destê birayî de  
Gewherêk aseno, mîyanê şewleyî de

Yaqutêko sey dendikana henaran o  
Çik û kosebîyê şewanê tarîyan o

Sey findan beriqîyeno roşnak û roşt o  
**Hekkakî** zî ser o nameyê “Zîne” nuşt o

20 Dest kerd derg bi ê gewherî ke pê bizano  
Rind biewnîyo ci ra, rindarind bivîno

Memî zî ewnîya ke destê Tacdînî ra  
Elmasêko **bêbaha** hetê texmînî ra

Nayo piro û nusnayo nameyê “Siti”  
Ustadêkê ehlê huner û meharetî

Eger ke bibîyêne gewherzanêk, **Buqrat**  
O gîştane texmîn bikerdêne, bi **qirat**

---

**hekkak:** wesatayo ke çîyanê madenî ser o name yan zî nuşteyan  
nuseno. Na çeku erebkî ya (notê M. Emîn Bozarlanî)

**bêbaha:** qîymetê xo zaf giran, çin o ci rê fîyat/baha

**Buqrat:** Hekîmo namdar Hîpokrat (îsayî ra ver 460-370).

Bazarîye bikerdêne sey **Eflatûnî**  
A hele bi heme xiznayanê **Qarûnî**

25 Nêkerdêne heşt ra yewê ê giştaneyan  
Goreyê hesab û kitabê gewherzanan

Şaş û pêşaş mendî pîya her di birayî  
Nê halî ser, xorîn-xorîn fikirîyayî

Zana ke wayiranê nê engiştaneyan  
Çike kerdo, kerdo Sitî û Zîneyînan

Roja ke ageyrabî roj, roja roşanî  
Vurnayê kincî, ameyê cayê seyranî

Senî ke ê pîya, kewtbî dilqê keynekan  
Ê her di zî pîya kewtê dilqê lajekan

30 Her di pîya bîyî, roja **ceşnê** Newroze  
Kerbî roşn heme دنیا, sey aşme û tije

Her diyan a roje weşemirnaybî destî  
Her diyan ardêne kok û qîrê miletî

---

**qîrat:** Weznêko zaf qijek ke se ra diyê gramî yo [0,20043 gr]. Pê zerrn, elmas, yaqût madenê qiyetini yê sey nînan yenê sentiş. Na çeku yunankî ya, eslê xo "qîrat" a la kurdî de biya "qirat". (notê M. Emîn Bozarslanî)

**Eflatûn:** Fîlozofa namdar Platon (Îsayî ra ver 427-347).

**Qarûn:** Cihûdêkê dewrê Mûsa pêxemberî biyo; bi dewlemendîya xo şinasîyeno û nameyê ey biyo nîşanê dewlemendîya pile. Vanê çewres banî bi zerrnanê ey dekerde bîyê; Mûsa pêxemberî zewt dayo piro, Homayî o bi xiznaya ci erd ro cûm kerdo. (notê M. Emîn Bozarslanî)

**ceşn:** festîval, şahî, roşan

Her di bîyî mîyanê bajarî de celad  
Her di bîyî dest ra şarî kerdêne feryad

Ê her di bîyî ke adir verdayo zerrî  
Her di pîya bîyî ke dax kerdê cîgerî

Her di birayan pê texmîn û aqilê xo  
Zana ke kam ê, û çi kes ê qatilê xo

35 Tacdînî sere de estbî hişêk, şîûrêk  
Terefê eşqî ra tede mendbî qisûrêk

Vat: "Wurze xo ser bira mîyanê cilan ra  
Dê bes o hende nalayîş destê kulan ra

Ma şêr ê, ê her di zî pîya di xezal ê  
Şermo giran o, ma înan dest ra binalê"

Mem bibî adir û kila eşqî seraser  
Ci rê vat ke: "Tî xam û xag ê, ey birader!

Mevaje ke Mem xoser o, Mem bi gewde yo  
Sere ra ta binê lîngan, parçe-parçe yo

40 Gewdeyê mi pêro biyo xêze bi xêze  
Xêzan ro nuqtayî bîyê rêze bi rêze

Tesîrê eşqî ra yo, tesîrê sewda ra  
Tayê derg tayê xorîn, tayê hîr û hîra

Heme nuqtayî pîrrê derdan û kulan ê  
Hîna zî ti mi rê vanê, ti qey nalenê!

Zerrî bîya ca û warê adirê harî  
Veşena têde, bi ax û bi întîzarî

Çîyo ecêb nîyo ke ez bibî **hulûlî**  
Û mi dima bimana çîyêko **heyûlî**

45 Eşqo sultanê sultanen bê xerez ame  
**Gewherî** xo nimit wexto ke **erez** ame

No hal û no mehel, no cîsim û no gewher  
Eşqî zeft kerdo pêro yewser û seraser

Çimî, kezebî, hermeyî, paştî û zerrî  
Destî, bazîyî, bêçîkî, doş û cîgerî

Willayî yewerî rê zî nêmando rehet  
Billayî yewerî de zî nêmando taqet

---

**hulûlî:** enkarnasyon, cismanî biyayiş

**heyûlî:** Çîyo sey heyûla. Seba "heyûla" biewnîye cêrnôtê qismê 2. ra. Na beyte de Memî wina vato. Beno ke ez hulûlî yanî enkarnasyonî qebûl bikerî û vajî sewdaya ke sey adirî ameya kewta canê min ê vengî û tede ciwîyena, senî ke ruhêk bikewo bedenêk û tede biciwîyo, a zî mi rê sey heyûla menda. Senî ke fikrêk gore heyûla madeyo verên yê kaînatî yo, kaînat ci ra zêdîyayo û vurîyayo, canê min o veng zî seba adirê sewda amade bî, sewda ameye kewte ci, hem xo rê kerd mekan hem zî vurna." (notê M. Emîn Bozarslanî)

**gewher:** kankilê çîyan, çîyo ke bi sereyê xo esto û eşkeno xo nîşan bido, sey madeyî

**erez:** eksê gewherî, çîyo ke bi sereyê xo çin o, nêşkeno xo nîşan bido, sey rengî

Tîya de Memî zerrîya xo teşbîhê gewherî kerda, eşq zî teşbîhê erezî kerdo. Vato, erez senî ke gewher de xo nimneno, senî ke rengê madeyî keno vîndî, eşqî zî zerrîya ey xo de nimta kerda vîndî, zerrîya ey mîyanê eşqî de nimite menda, hinî tenya eşq aseno. (notê M. Emîn Bozarslanî)

Nêmando têreyde qet yew eleqeyê ma  
Pêro pîya qîrenê vanê 'Aşiq ê ma!'


50 Nêpersenê ti halê mi, ez ha senîn a  
Ser de zî mi rê vanê ez ha nênalena!"

Memî ke vat bi no hawa, derd û dejê xo  
Tacdînî zî hinî nêvet veng û vajê xo

Ê bimanê uca de pê kul û birînan  
Ma verê xo bidê Sitî û Zîneyînan



**AGEYRAYIŞÊ SITÎ Û ZÎNE ROŞAN Û GEYRAYENE RA  
HAYÎDARÎYA DADIKA ÎNAN HAL Û BÎYAYENE RA**



Ê zî tavilî ageyray bi ê lîbasan  
Wa nêgino înan çimê kesanê nasan

Her çiqas ke înan bedilna kinc û kisvet  
La o halê înan nêbedilîyabî qet

Eşq û sewda her di bedilnaybî seraser  
Nêşayêne biyerê, halê verênî ser

Kesî nêvatêne ke Zîne û Sitî yê  
Şarî vatêne qey di kesê ecnebî yê

5 Dadika înan estbîye yewa serreke  
Yemana yemaman, yewa çuşta çalake

Feleko zordar tede nêşiyêne sere  
Heyzebûne bî, nameyê a extîyare

Ameye verê înan ewnîyaye ci ra  
Bi çimê xo dî kinc û kolê ci hê pira



Hê ronîştê; ne werdene ne şimitene  
Vîndî bîyo; **gilarey'** qirike de çene

Yanî ameyo înan ro huzin û keder  
Ê leteyê aşme kewtê halê tengî ver

10 Permilyayê **cewcemê** tern û tezeyî  
Girewto rengê yasemînanê cerdeyî

Alişkê sey gonî bîyê **welik** û gewrik  
Sûrgulî vurîyayê bîyê zer û zerdik

Zana ke yê perîyan, keder û fikar o  
Zerrî kewta tayênan, ginayê sewda ro

Dadîke vat: "Ey gulsosinê merg û çîman  
Hergu yewa şîma roşnîya her di çîman

Wa pawitoxê şîma Homa teala bo  
Wa canê mi şîma rê qurban û feda bo

15 Şîma ke zere de beste yê, pê zincîran  
Tenya ewro wuriştî şîyî seyr û seyran

Şîma qey rew ra caverda ameyî roşan,  
Dê rast bivajê, çi yo no halo perîşan?

---

**gilare:** goştê binê çeneyî

Wexto ke merdim beno xemgîn, sereyê merdimî aver beno çewt,  
çene gilareyê qirike de, yanî goştê binê çeneyî de beno vîndî. Ehmedê  
Xanî tîya de o halo xemgîn teswîr kerdo.

Destpêk senî bîyo, çi tebayî rî dayo,  
Na sersemîye ya, yan xeyalê sewda yo?

Çi yo no elemê şima yê karxezalan,  
Her elem ber û eserê derdan û kulan?

Çi qewimîya, se bî, dê bivajê mi rê  
Teba mi ra nimite maneno ke tirê!

20 Ez do nika bierzî remilan û falan  
Ez do şima rê bivajî hal û hewalan

Yan zî ez do ronî mendîlan û şûşeyî  
Ca de bivejî ez eslê nê meseleyî"

Her diyan vat dadike rê, her çi eşkera:  
"Ma ke vizêr vejîyayî teber, zere ra

Kam ke vejîya rayirê ma ser, bî peyda  
Destadest gina eşq û sewda ro, bî şeyda

Axir ke **cewrê** ma ser de şî, û bî laser  
Fetilîya çerixîya, ame bi ma ser

25 Ma zî hal ra kewtî bîyî şeyda û sermest  
Ageyrayî û ameyî keye, destadest"

---

**cewceme:** vilêka zerda zaf weşik a. (notê M. Emîn Bozarlanî)

**welik:** rengê wele, sey rengê wele

**cewr:** zor, zulm

Dadike bîye nîzdî bi zerrînermîye  
Şîye bi verê her diyan bi rînermîye

Vat: "Şîma rîdekîye de sey perîyan ê  
Her di zî sey horîyan û sey horîyan ê

Ê kam ê ke verê şîma de nêbe muhtac!  
Ê kam ê ke bi waştîşê şîma nêdê bac!

Kesê ke zerrî daya şîma di perîyan  
Rîdekîya şîma ver de benê binferman

30 Eke no bajar ra bê ê kesê delalî  
Ez do nîka şorî tede bikerî qalî

Dê mi ra vajê kam ê, bivînî înan ez  
Qey şîma bitepişî biyarî înan ez"

Înan ci rê vat: "Ey Heyzebûna delale  
Derdê ma ke persena, ey hekîma pîle

Daru û derman to dest ra beno bêguman  
La eger ke yê ma zî bibo, zar û ziwan

Lakîn terîf û salixdayîş bêîmkan o  
Derdê ma rê zî ne daru yo ne derman o

35 Çende ke estê lajek û keynekê **botan**  
Belkî yê heme êlan, yê heme ezbetan

Kes çin o bi rindekîye şinasîyaye  
Xaseten ke defterê ma de nusîyaye

Yanî ma pêro dîyê, vînayê rî bi rî  
Çende ke estê heme kesê ne bajarî

Ewro di keynekanê xerqê rindekênî  
Cêracor daybî xo ra kincê îpegênî

Ê sey **şahê rojhelatî** xemilîyaye  
Ê sey aşma pirpancêse beriqîyaye

40 Xafil ra rastê ma ameyî bî zahirî  
Gindir bî durr ra ê her di kesê nadirî

Mi şîyî ser ke bivînê dê çi kesî yê  
Ma dîyî ke sey ma cîsnê Ademî nîyê

Cîsnê melekan û perîyan ra bîyî ê  
Çimkî ne awe ra ne herre ra bîyî ê

Wexto ke ma dîyî ê ewladê perîyan  
Aqil ma sere ra perra, bîyî perîşan

Ê her di mendêne sey qedehê Cemşîdî  
Ma her di zî mendêne aşme û **xurşîdî**

---

**botan:** yew eşîra kurdan a, hetê Mêrdîn û Şîrnexî de manena, na-meyê xo dayo mintiqaya xo zî

**şahê rojhelatî:** roj qest beno

**xurşîd:** roj, na çeku fariskî ya

45 Wexto ma û ê pîya ameyî hemver  
Çilayî û şûşeyî ke ameyî têver

Şûşe senî ke estare ra gêno **zîya**  
Zerrîyanê ma de zî nûrêk beriqîya

Qendîle zî fitîl zî tabî yê înan bî  
Labelê adir, yê rîyê ma her diyan bî

Don û adirê ma bîyî dîyar, asayî  
Hem zerrî hem cîgerê ma pîya veşayî


Ma veşayî xo bi xo, nêzana çi hal o  
Ecêba hişyarî ya, hewn o, yan xeyal o”

---

**zîya:** roşn, nûr, şewle; na çeku erebkî ya



## DADIKE REYNA PERSENA ESL Û ESASÊ MACERA Ê ZÎ EŞQO KE PÊ TESÎRDAR BÎYÊ KENÊ EŞKERA



Bi nê meseleyî heyret mende dadike  
Her diyan rê vat: "Ey ruh û canê dayike

Şima şîyî seyr û temaşeyê rihalan  
Aqilê şima de çin bî eşqê xezalan

Çîyo ke şima vanê bêmana yew çî yo  
Meylê şima bi cenîyan qet mumkin nîyo

Meylê merdiman her tim bi merdiman beno  
Meylê cenîyan her tim bi camêrdan beno

5 Keynekî bi keynekan caran benê tucar!  
Bê pereyê lajekan nêbeno no bazar

Lajî eynaya cemalî xoser û **zat** ê  
Keynayî **eksê** nûrî, tabî û **sifet** ê

---

**zat:** Çîyo ke bi sereyê xo esto û xo nîşan dano; madde, gewher.  
Tîya de manaya xo wina ya. (notê M. Emîn Bozarslani)

**eks:** eysayiş, akîs, olan

**sifet:** Çîyo ke nêeşkeno bi sereyê xo estbo û xo nîşan bido, estbî-

Eger ke zat nêbo sey erezî yo sifet  
Eke gewher nêbo erez hîç û bêqîmet

Erez bi gewherî beno qewîn û saxlem  
Aşme rojî ra gêna roşnîya xo her dem

O meylo ke tede nêbo rîyê lajekan  
Wa rîyê perîyan bo, wa rîyê melean

10 O do bi çi hawa şima bikero bengîn,  
A Leyla do senî şima bikero Mecnûn?

Eger ke rastê Mecnûnî nîyero Leyla  
Eyla a do senî meyl bido yewna Leyla!

Eyla gulî caran bi gulan benê aşiq  
Eyla Ezra caran xo bi xo bena Wamiq!

Ger Xusrew nêbîyêne esparê **Şebdizî**  
Şîrîne qet bîyêne şeker bi Perwîzî!

---

yayîş û nişandayîşê xo de muhtacê zatî yo, muhtacê madde û gewherî yo. Sey rengan ke bi sereyê xo nêşkenê xo nişan bidê; gereka maddeyêk ser o bo, serê gewherêk de bo. Tîya de manaya xo wina ya.

Na beyte de mana wina ya: "Lajî eynaya rindekîya zatî yê, bi sereyê xo rindekîya madde û gewherî nişan danê. Keynekî zî eks û eysayîşê roşnîya sifetan ê, gereka eşqê lajan sey roşnîye bido înan ro ke o eşq sey çîrûskêk înan de biberiqîyo û roşnîye bido. Bê lajan eşq rîyê keynekan ra nêasen. (notê M. Emîn Bozarslanî)

**Şebdiz:** Nameyê estorê Xusrew Perwîzê mêrdeyê Şîrîne. (notê M. Emîn Bozarslanî)

Ferhadî nêkerdêne war hesrê goninî  
Çim nêginayêne bi **espara Gulgûnî**

15 Mîyanê hende camêrdan û mêrdekan de  
Mîyanê hende rihalan û lajekan de

Zerrîya şima qet nêgipena kesî rê  
Şima xo şaş kerdo, bîyê gosirmet **erê!**

Kesê xam xeşimî, ne nâme yo ne nişan  
Zerrîya şima bi înan bîya perîşan

Çîyo ke şima vanê bincaran nêbîyo  
Yê şima xeyal o, yan zî şima hewn dîyo!"

Nê qal û qisayî ke goşdaritî Zîne  
Ginaye ver ro sedayêka zaf xorîne

20 Wina cewab da bi dadika extîyare:  
"Ez vana to de nêmendo aqil û sere

To vat 'Ez do ronî mendîlan û şûşeyî  
Şima rê bivajî eslê nê meseleyî'

---

**espara Gulgûnî:** Şîrîne qest bena.

Gulgûn estorê Şîrîne yo, efsane gore Şebdiz û Gulgûn eynî estore ra bêbabî bîyê. Dayika înan çol de xo sawito heykelê estorêk ra, ber gi-rewto; ê bîyê. (notê Kadri Yıldırımî)

**erê:** seba cinîyan xîtabkerdişêk, mesela, seba camêrdan zî vanê "ero"



Çîyo ke ma vanê bêmana yew çî yo  
Pêro rast o, xeyal nîyo, ma hewn nêdîyo

Eke merdimî bîyê ê, eke melekî  
Eke keynekî bîyê ê, eke lajekî

Aha, nê her di engîştaneyê înan ê  
Ma xo reyde ardî, hem delîl hem nîşan ê

25 Madem ke ti fehm kena qûm û remilan ra  
Dê bizane wayiran, nê giştaneyan ra!"

Dadika çimzerda efsûnkara tanaze  
Vat: "Dê biyarê înan, dê hadê bi leze!

Ez do biweşanî emşo qûm û remilan  
Bivejî heta şewdir wayiranê înan"

Engîştaneyê gişta xo hema vet Sîfî  
Da bi destê efsûnkar û sêhrbaza wextî

Heyzebûna sêhrbaze ra wina vat Zîne:  
"Zerrîya mi bîya awzêmêka gonine

30 <sup>30</sup>Wexto ke awzême bilqena û kel dana  
Wexto ke girêyena, gama ke pêl dana

Efkarê zerrîya zare, o keno teber  
Key ke ez dana, hesiranê goninan ver

Ti ke na zerrîjare ra gêna bena ey  
Rew ancî biya, nêbo ti biffînê erey

Bizane ke o yo hêvî û hedûra mi  
Engîştaneyê Silêmanî yo seba mi”



**REMILDARÎ RA RICAYA DADIKE QEY FALÎ  
SEBA ZELALKERDIŞÊ HEQÎQETÊ NÊ HALÎ**



Dadika hîlekara fenaya yemane  
Xo resna verê remildarî roja bîne

Çend hebî zerrnî xo dir berdî seba kalî  
Wina îzeh kerdî ci rê hal û hewalî

Ey rê vat: "Di lajê mi estê, di masûmî  
Di bêpîyê yetîmê bêkes û mehrûmî

Roja ke pîroz bîyêne ceşnî û roşan  
Ê zî bi hewesê mindalan û domanan

5 Her di pîya wuriştê şîyê seyr û seyran  
Cazûyan verê înan çarnayo bi çolan

Ewro wexto ke ageyrayî û bî peyda  
Bîyê delu û dîwane, sersem û şeyda

Vejiyayî ameyî bê libas û viran  
Ge-gena qîrenê kenê feryad û fixan

Xo ra şonê, bi o qayde, xeylê manenê  
Wexto ke yenê xo, deluyê deluyan ê

Nê gîştaneyî tey bîyî, girewtê xo dest  
Merdim vano qey, pê bîyê serxweş û sermest

10 Ey haydarê îşaretan, kifşkarê razan  
Bêçare ya ez, ti yê çare û çarezan

Xebera xeyrêne bivaje, bike îhsan,  
Çi yo derdê domananê minê bêkesan?

Gelo bêhişî ya, gêjî ya, yan zî sewda,  
Senî merez o, çi yo derman, çi yo dewa?

Ey murşîd û rayber, ey bextweş û çarezan  
Ancax ti ma rê akê beran û keyberan

Raz û sîrrêk esto nê engîştaneyan de  
Kifş û bewlî yo çimê şima zanayan de

15 Dê bivaje wayirê gîştaneyan kam ê  
Gelo cin û melek ê, însan û merdim ê?"



## ÎZEHETÊ REMILDARÎ SEBA BÎYENE Û HEDÎSEYÎ EKSÊ VATIŞÊ DADIKE ZELALBÎYAYIŞÊ MESELEYÎ



Ê warisê zanayîşê **Danyal pêxember**  
Senî ke bale daye şekilê falî ser

Dî û zana, hîna pîzeyê dayikan ra  
Hîna verê bîyayîşê ê keynekan ra

Keyf û şayîye pîya têhet de vînayî  
Tacdîn û Sitî pîya pêhet de vînayî

Elem û keder pîya pêhet de vînayî  
Memo û Zîne pîya pêhet de vînayî

5 Qasida fêlbaze rê wina vat faldarî:  
“Meqsed bi hîle û xurde, bi zem û zûrî

Eyla, çaran seba merdimî beno hasil  
Rayir şaş bo, merdim senî reseno menzîl

To vat her di lajê mi delu dîwane yê  
To nêvat ê keynayî Sitî û Zîne yê!

**Danyal pêxember:** Pêxemberêkê cihûdan o. Vanê remildar bîyo û  
falbêjîye ey ra menda. (notê M. Emîn Bozarslanî)

Roja ke ê şîyê cayê geşt û seyranî  
Rayir ra dîyê di kesê awir-heyranî

Dîyê sey selwîyêran di lajê qamdergî  
Ronîyayo qîyamet, **kewtê halê mergî**

10 Ca de û hema; yê nê di rojan, yê nînan  
Zerrî kewta ê her di aşman, kewta înan

Ê bêhiş kewtê bi eşq û sewdaya nînan  
Nê sersem kewtê bi husn û semtîya înan

Nê her di bîyê nêweşê belayê eşqî  
Ê zî bîyê teyšanê Kerbelaya eşqî

Nê gîştaneyê lajan ê, verê nînan de  
Gîştaneyê nînan zî hê verê înan de

Senî nînan dayê xo ra kincê lajekan  
Înan zî dayê xo ra lîbasê keynekan"

15 Şeyxê remildarî rê wina vat dadike:  
"Mi de guman nêmend, ronîya delfîl çike

Labelê, dê bivaje mi rê, ê çi esl ê,  
Rindarind dîyar bike hela, ê çi nesl ê?

---

**kewtê halê mergî:** Kesê ke kewtê halê mergî Tacdîn û Mem ê.

Ecêba begzade, ecêba giregir ê,  
Ecêba esker, ecêba feq û feqîr ê?”

Ey vat: “Ger ronîyo bazarê sînayeyan  
Ronenê tede şênayan û terazîyan

Eke pêqasîye nêbo, nêbeno bazar  
Yewbînan ra razî yê, muşterî û tucar

20 Bîlhesa lajekê ke dîyê nê her diyan  
Yewer sey durrdaneyan, yewer zî sey durran

Yew begzade yo, mîreyan ra yo neslê ci  
Yew katibzade, wezîran ra yo eslê ci”

Seba zelalkerdîşê ê di kesan, tayna  
Pîre çend qisayê bînî eştî ver, reyna

Vat: “Zerrîbeste û mubtelayê her diyan  
Aşiq û bengînê Sîtî û Zîneyînan

Nêhûmarîyenê, karê hesaban nîyê  
Ca nêbenê tede, karê kitabana nîyê

25 Şeyxê mi, ti zanenê ke tîya Cizîr a  
Hemeyê xo pîl û giregir, **kurdemîr** a

---

**kurdemîr:** mîreyê kurdan

Hewlîye bike ti, biwedare perdeyî  
Dê bivaje kam ê, nê her di ferîşteyî

Sozê ma bo ke ez tenya bivînî înan  
Ez şorî biyarî to rê çewresna zerdan"

Şeyxî vat: "Dê ti şore bivîne **uşaqa**n  
Teftîş bike kuçe û kolan û zîqaqa

Seba kamî ke vanê bêhal û nêweş o  
O bêhal û nêweş to rê delîlo weş o

30 Xo nîşan bide sey hekîman û tebîban  
Ti rasterast vînena ê her di hebîban

Wexto ke bivînê ê her di ferîşteyan  
Qumaş ra muşterî, beno eyan û beyan

Dest de engîştaneyî estê, ê her diyan  
Ser o yo nameyê Sîtî û Zîneyînan"

Wurişte dadike, sey Hekîmê Luqmanî  
Dekerdî kîseyê xo daru û dermanî

Qutîya dermanan, şûşe, neşter û kîse  
Eştî hermeyî ser, a hîlekara pîse

---

**uşaq:** xizmetkar, xulam. Na çeku bi tirkî ya. (notê M. Emîn Bozarslanî)



35 Eştbî pistanê xo çend hebî zî kitabî  
Bi dirûv mendêne hekîmêkê ecnebî

Tavilî xo resna sermîyan û serekan  
Bîye heval û hogira dostan û yaran

Înan vat: "Tî ça ra yena, senî kokim a?  
Winî aseno ke hekîmêka tamam a"

Aye ci rê vat: "Rast a ke ez yew hekîm a  
Xaseten di nêweşîyan ser o alim a

Kena weş û war ez, hîna zêde di janan  
Hem derdê bedenan û hem zî derdê canan"

40 Înan ci rê vat: "To ma rê salix nêdayo  
Derdê canî yo ke vana, senî teba yo?"

Aye vat: "Înşalah şîma nêvînenê ey  
Tayê elametê ci kifş nêbenê çî rey

Derdêko bêderman o, qet nêdano mecal  
Merdîm nêxelisîyeno ci ra, hal bi hal

Wa dûr bo şîma ra o derd, gelî rihalan  
Sey virsikî yo, virsikê rîyê şepalan

Wexto ke virseno o, bilusk û virsik o  
La çin o çeçê ci, bêçîk û bêçîqlîk o

45 Kulan nêano meydan, bêderb û bêkul o  
Nameyê ê derdê harî; zerrî ya, dil o

Adir û kile nano zerrî w cîgeran ra  
Gonîya zerrî rişneno her di çîman ra”

Înan vat: “Ti ameya bi xeyr û weşîye  
Di embazê ma ançê a nêweşîye

Hewlîye bike ti, her diyan bike derman  
Bike weş û war biwuriznê serê payan

Ti se vajê, ma do bi o hawa bikerê  
To çi waşt ma do tavilî eda bikerê”

50 Kokime hema xo resna verê **merîzan**  
Wexto ke dîqetê xo da ê di ezîzan

Hema ver çarna qilawuzan û embazan:  
“Dê şîma tenya biverdê, min û merîzan

Ka ez teşxîs bikerî **merezê** her diyan  
Dima ez do bivajî derman û daruyan”

Embazî vejîyayî teber leyê ci ra  
Kokime tenya mende ê nêweşan reyra

---

**merîz:** nêweş, merezdar

**merez:** nêweşîye



**TÊREYDE QISEYKERDIŞÊ XORTAN  
Û PÎRA HEMRAZA YARAN  
HAYÎDARBIYAYIŞÊ AYE  
BI HAL HEWALÊ SEWDASERAN**



Nêweşê derd û kulê eşqê xirabhafî  
Ewnîyayî leye de nêmendê hevalî

Ronişta verê înan de pîrêk û kalêk  
Qama ci ya qulûze manena hîlalêk

Hêdî hêdî fek ra çekuye vejîyena  
Hesirî rişîyenê çîman ra, bermena

Înan vat ci ra: “Ey dayikê, ti çi kes a,  
Qey bermena, qey wina milçewt û bêkes a?”

5 Dadike vat: “Bi sereyê Sitî û Zîne  
Tena seba şîma bermena na rebene

Xaseten verê Sitî û Zîneyînan ra  
Ameya bixelisnî şîma birînan ra

Nê engîştaneyî yê şîma her diyan ê  
Mi girewtî û xo reyde ardî, nîşan ê

Bigîrê înanê xo, bidê yê her diyan  
Bi xirabîye mevejê nameyê înan

Ez qasid a, ameya şima her diyan ver  
Mi meşeqznê, destveng meşirawê pey ser"

10 Wexto ke da kokime ser înan goşê xo  
Keyfî ver ra kerd vîndî aqil û hişê xo

Senî hişyar bîyî qet nêedilîyayî  
Hema maçî kerdî hem destî hem zî payî

Reyna û reyna şîyî pêş û dest û payan  
Hezar reyî lew na pire ra ê her diyan

Pê şaş mende dadîke bi hesretê pîlî  
Seba **hîcranê** înan kerdî war **kakilî**

Vat: "Qet xem mekerê ey kesê ehlê dilî  
**Mizgîne** şima rê bi destê Heqê pîlî

15 Eger ke biyero werê, dest bido Homa  
Ez do efsûnêk bikerî semedê şima

Şima çar heme eynî mekan de ca bibê  
Biyero werê miradê şima, şa bibê

---

**hîcran:** cêrabîyayîşê yaran, cîyakewtişê waştîyan  
**kakil:** (mecazen) hesirê çiman ê girdelayî  
**mizgîne:** mijdiyane

Dê name û nîşanê xo eyan bikerê  
Sirr û razê zerrîya xo beyan bikerê

Ke ez abigeyrî pê ê engîştaneyan  
Ez efsûn bikerî Sitî û Zîneyînan

Erey nêmanî ez seba xeyr û sewabî  
Rew ra şorî ez înan ra vajî cewabî

20 Engîştane bêçîka xo ra vet Tacdînî  
Da bi destê a cazuya wext û zemanî

Mem fikirîya, ger nêbo tey engîştire  
Nêşekeno bikero deyx û îdare

Ey vat: "Dayê, ti meewnîye mi qisûrî  
Gelo kamî canê xo dayo bi destûrî!

No gîştane eger name eger **tilism** o  
Ruh û canê mi o yo, bedenê mi cîsm o

Dêka delale, ti qasida a hebîb a  
Bê şik û bê guman derdê mi rê tebîb a

25 Ti bi qandê sedeqeyê sereyê Zîne  
Nê engîştaneyî mi rê zêde mevîne

---

**tilism:** tilsim

Wexto ke ti şîya, ey dêka wefadare  
Nê qisayanê Memî biresne a yare:

'Ti şah û sultan a, Mem parsek û reben o  
Lutfê şah û sultan qey her kesî beno

Mem yew bende yo, nîyo layîqê **wîsalî**  
Bes o ey rê xeyalê sûretê delalî

Razî yo Mem bi xeyalê ê cemalê to  
O zî biyaro tenyayîya burcalê to

30 Ax û zarê zerrîya Memî ra biterse  
Ge-gane zî hal û hewalê ci biperse"

---

**wîsal:** pêresayîşê yaran, piyabîyayîşê waştîyan



## AGEYRAYIŞÊ DADIKE BI VERÊ SEWDASERAN ÎNAN RÊ VATIŞÊ NAME Û HALÊ BIRÎNDARAN



Ê her di fidanê dara 'er'era şenge  
Roniştê sey xuncayan, zerrî bîya tenge

Ameyê pêser, sere veradayo xo ver  
Paweyê dadî yê, aqil şîyo aye ser

Bîyê serxweşê meyê xemî her di pîya  
Bîyê paweyê meyê demî her di pîya

Nişka ve ra ewnîyayî ke a tebîbe  
Ha wet ra yena bi sîmayêka ecêbe

5 Sitî û Zîna ke aqil şîyo sere ra  
Hema çeng bîyî, verarde besnaye pira

Înan vat: "Ey dadikê, ti bi qandê Heqî  
To dîyî yan nêdîyî ê her di melekî?"

---

**dara 'er'ere:** darêka weşika bariye, sey selwîyêra yabanî zî name  
bena (notê M. Emîn Bozarlanî)

**şeng:** şên, keyfweş, keyfin

Falê to se vat, to ê perîyî ca kerdî,  
Yan kerdî zereyê şûşeyî xo dir ardî?

A tîra ke zerrîya ma pê qûle bîya  
To doz nêkerd ke kamî eşta, yê kamî ya?" .

Dadike vat: "Bi emrê şima yê ezebî  
Ez sond wanena, yew derbe nê, hezar derbî

10 Ez nika leyê ê her di gencan ra yena  
La zerrîya mi bi halê înan veşena

Çi wext û mehal ke 'Siti' û 'Zîne' vanê  
Se tewir hesiranê goninan varnenê

Dayê qurbanê şima bo, bi nê kemalî  
Ê her di genc û rihalî bi ê cemalî

Şima senî weçînayî ê di mumtazî?  
Tam şima gore yê, ê semtê serfirazî

Sond bo bi nameyê Homayê ezîmşanî  
Ê her di gencî durr ê, şekilê însanî

15 Peyda nêbenê kesê sey înan cîhan de  
Çin ê melek sey înan rîyê asmênan de

Ê her di rihalî, tam hemverê şima yê  
Ferq nêkeno, eger parsek eger **mîrza** yê"

**mîrza:** mîrzade, lajê mîreyî



A qaside zerrî û can ra bîye delal  
Ê zerrîbesteyî ver de bîyî kerr û lal

Her diyan zî kerd vîndî aqil û hişê xo  
Wexto ke da aye ser dîqet û goşê xo

Welhasilî kelam esl û feshê macera  
Çîyo ke dadike vato kerdo eşkera

20 Seke adir reseno çîyêkê neftinî  
Kile ci ra perrena asmênê hewtinî

Sewda adir a, beden zî sey koyê Tûrî  
**Zerrî dara mîyanê adirî, sey nûrî**

Qefsing çiladane, qeseba bena çila  
Can don û zeyt o, fîtilê ci derd û bela

Zerrî şûşe ya, mîyanê ci de a çila  
Sirr lete yo, mîyanê tamamî de vila

Sitî û Zîne sere ra ta binê lîngan  
Veşayî bi adirê zerrî û cîgeran

25 Her diyan vat: "Zerrîya ma rê embaz ti ya  
Maya delale, seba ma çaresaz ti ya

---

**Zerrî dara mîyanê adirî, sey nûrî:** Meqsed, a dara ke Homayî nûrê  
xo tede nişanê Mûsa pêxemberî dayo. (notê M. Emîn Bozarslanî)

Ma her di sey leyekan ê, baxçewan ti ya  
Ma her di kerr û lal ê, zar û ziwan ti ya

Eger ke helêk ti nêpersê hal û hewal  
Eger ke gamêk ti nêbê xemwer û heval

Ma do sey pelê verê vayî heba bibê  
Ma do sey pûş û palaxî berhewa bibê

Dayika delale, ti zanêna halê ma  
To ra qederî zî çin o tu mecalê ma

30 Yew Tacdîn yew zî Mem o, to nameyî dayî  
Ê perwane yê, perrê înan ma veşnayî

Ê her di zî nika bi ax û întîzar ê  
Belkî ma her diyan ra dahîna neçar ê

Lez şore Tacdînî ra bivaje na fine  
Waşitîya to Sitî ya, yê Memî zî Zîne

Mizgîne şima rê, ma bi şima qebûl ê  
Ma zî şima ra dahîna zêde melûl ê

Eşqê şima dest ra qut biyo hevsarê ma  
La perdeyê şermî birnayo rayirê ma

35 O perde seba şima xalî û kilîm o  
Bêperdeyîye qey şima halo qedîm o

Waşfî û qasidî, veyve û silayîye  
Hetê şîma ra her çî tîmsalê rindîye


Eynî wîna tembîh bike her di hebîban  
Xeberdar bikerê melayan û xetîban

Wa tayê kesî qey şîma bibê ricakar  
Wa tayê kesî seba ma bibê duakar

Belkî Homayî wîna nuşto qederê ma  
Belkî asan beno miradê ma û şîma”



## ŞİFABEXŞİYA TEBÎBE SEBA NÊWEŞAN ŞEFQET Û MERHEMETÊ MÎREYÎ SEBA REBENAN



Weş wext o seba nêweşanê arzûdaran  
Bîlhesa zî seba înanê sewdaseran

Dermanê weşîye û daruyê şîfayî  
Yanî xebera weşe, mizgîna wefayî

Nika ke biresayêne ê delalan ra  
Bixelisîyayêne ê, derd û kulan ra

A pîre kewtbî dilqê **Aristotelesî**  
Bi hîlekarîye daybî xo ra lîbasî

5 Ancî kewte sûretê hekîm û tebîban  
Desinde xo resna bi verê ê hebîban

A mizgîne, senî ke ma vatbî, resnaye  
Zerrîya her diyan yewna qayde veşnaye

Labelê her di bi ê adirî geş bîyî  
Merdimî vatêne qey nêweş nê, weş bîyî

---

**Aristoteles:** Filozofê yûnanan Aristo (Îsayî ra ver 384-322)

Seke ê her diyan bi destê Eflatûnî  
Girewtê werdê hem dermanî hem macûnî

Wuriştî xo ser ê, şîyî verê hevalan  
Verê tayê wêretan, û tayê rihalan

10 Ênan rê vat, hal û mesela û macera  
Wuriştî xo ser pêro, keyf û eşqî ver ra

A xebera weşe ke eşnawite Ênan  
Hema dinya û alemî rê kerde îlan

Çend kesê alimî û çend kesê adilî  
Çend kesê nêwendeyî, çend kesê cahilî

Pêro wuriştî şîyî bi verê mîreyî  
Bi no hawa kerd behsê hal û meseleyî

Vat: "Ey walîyê mal û melal û miletî  
Ey hamîyê dîn û dewlet û edaletî

15 Tî yê sersî û versîya îhsanê **Yezdan**  
Ewro ma ser o şah û padîşah û sultan

Şah ê; nezer û ewnîyayiş ra sey kîmya  
Mah ê; eser û elamet ra roşn û zîya

---

**Yezdan:** Homa, Heq Ellah

Her çîyo ke to silayî kerdo, ezîz o  
Her çîyo ke nêkerdo, pîs û natemîz o

Heme çi to çirax kerdo û to geş kerdo  
Eger ke halxirab bo zî, to halweş kerdo

Tacdîn her çiqas ke mîrza û begzade yo  
Nîsbet bi to, parsek û kole û bende yo

20 Ma pêro ameyî ke to rê bikê dua  
Ma pêro ameyî ke to ra bikê rica

Tacdînî zerrî daya ci, Sîfî wazeno  
O bende û kole ar keno, şermayeno

Ê bende û koleyî, ti bikerê azad  
Xortêko delal o, xo rê bikerê damad"

Mîreyî vat: "Oyo ke şima dîyo maqûl  
Bêguman ke hetê ma ra zî beno qebûl

Ça yo wekîl, biyero bibirno marreyî  
Ça yo mela, biyero biwano xutbeyî

25 Mareyê Sîfî bibirîyo; mêrde Tacdîn  
Wa bextê înan bibo weş, **qebûl û amîn**"

---

**qebûl û amîn:** Yeno zanayîş ke wekîlê Tacdînî vato "qebûl" û bi no hawa birnayîşê marreyê Sîfî bi Tacdînî qebûl kerdo. Haziran û goşdaran zî vato "Amîn" û bi na çekuye veyveke û zamayî rê bextîyarîye nîyaz kerda. (notê M. Emîn Bozarslanî)

Çekoyî hema xo eşt lînganê mîreyî  
Lew na pira û qebûl kerdî nê vateyî

Şeyxî, giregirî, mîreyî pêro pîya  
Pîlî, axayî, fiqareyî pêro pîya

Heme bi fekê xo ci rê bîyî senakar  
Hem bi dilê xo ci rê bîyî duakar

Mîreyî vat: "Dê bîcenê def û ribaban  
Hadê biyarê heme şerbet û şeraban

30 Ma bironê meclisêkê şayîye ewro  
Zîra ma nêzanenê meşte yan zî bîro

Belkî her wext ma sey nikayî weş nêbenê  
Belkî ma mirenê, belkî ma nêweş benê

Şewî awr ê, gelî heval-hogîran awr ê  
Homa bizano, ê do xo dir çi biyarê

Şîn û keyfweşîye, sey cêwîyan ê her di  
Çerx û felek, xidar û bêeman ê her di

Ge zulmetî nîşan danê, ge zî roşnîye  
Ge şîwanî nîşan danê ge zî şayîye

35 Wexto ke bena peyda gama şîmitene  
Şîma do aye dest ra medê ramitene

Çayê ke wext û zeman şimşêr û kalme yo  
Caran nêvano no mela no zî mîre yo

Ewro seba razîbîyayîşê Tacdînî  
Mi zî bigîrê mîyanê xo sey **xwazgînî**

Hende zeman ra yo ke bende û xulam o  
Xulamîya xo de bêqisûr û tamam o

Tacdînî ma rê kerdo hende kar û xizmet  
Keyberê ma da anto hende zor û zehmet

40 Şert o, anegoreyê şerîetî wefa  
Lazim o, ma zî biacê seba ci cefa

Ma do ewro bigîrê xo ser kar-barê ey  
Ma do ewro bi xo bibê xizmetkarê ey

Camêrdo winasî bo kam bi zerrî û can  
Canê xo rayirê ci de nêkeno qurban!

Hezar û yew sereyê mi zî estbê eger  
Ez hemîne mîyanê rojêk de bi defter

Eke nêkerî qurban û feda tek bi tek  
Wa mîreyîye zî mi rê nêbo bimbarek”

---

**xwazgîn:** waştex, o ke şino keyna wazeno



45 Tacdîno ke bi xo xizmetkarê emîr bî  
**Çeşnîya** ci tim û tim dest de, **çeşnîgîr** bî

Bi kilmekîye, bi şefqetê xo o emîr  
Wurişt seba Tacdînî bi xo bî çeşnîgîr

Mîreyî rona meclisê xo de sifreyêk  
Seke asîman rafiste bo sey perdeyêk

Roj û aşme, ê gilorê rîyê asmênî  
Merdimî vatêne felekê corîn û cêrênî

Ê lengerîyê sîmênî, êyê zerrnênî  
To vatêne felekê corên û cêrênî

50 Her sehena girde sey bircêkê asmênan  
Sey qutîyanê gewheran, qapaxê înan

Ê tepsî û tasikî, kasikê **fexfûrî**  
Sey estareyan danê roşnayî û nûrî

**Ê bizêkî, ê kavirê riyê asmênan**  
Kerdî buryan û kebab, semedê meymanan

---

**çeşnî:** Zemanê verî de tasikêka qijkeka sey koçike bîya. Verî ke werd bidê mîreyî, kesê nîzdîyê ci bi na tasike her werdêk ra wenê û tehm kenê. (notê M. Emîn Bozarlanî)

**çeşnîgîr:** 1.keso ke bi çeşnî werdê mîreyî tehm keno 2.keso ke pewtîşê werdî îdare û kontrol keno (Tîya de meqsed manaya diyine ser o yo) (notê M. Emîn Bozarlanî) / **fexfûr:** porselen

**Ê bizêkî, ê kavirê riyê asmênan:** Bircî qest benê. Bircê Bizêkî (tirkî de Oğlak Burcu) û Bircê Kavirî (tirkî de Koç Burcu)

Sey embaran bîyî, ê tepsî û kasikî  
**Serlod** kerdbî qey nefsê yewerê çilekî

Tewir bi tewir werdê rûninê şîrinî  
Her çeşît ra xida û çerezê rengînî

55 Ê meşrebayî, ê şûşe w qedehê çînî  
Gêrayêne boyna bi naz û nazenînî

Û sey seyareyan kerdêne seyr û seyran  
Û kamî bidîyêne tey mendêne heyran

Narincî, turincî, leymûnî û henarî  
Cenet ra bîyî, ê meyweyê neweberî

**Fanîz** û **nebat** û **qend** û şeker yew het de  
Awa gulan, **zebad**, misk û ember yew het de

Tayênan tengiznayêne made û pîze  
Tayênan mezgê xo kerdêne tern û teze

60 Buxirdanî gêrayî bi **ûd** û emberan  
Canî heme bîyî xerqê boya etaran

Sazbendî, deyîrbazî û kesê vengweşî  
Dayê xo ra kincê qumaşweşê rengweşî

---

**serlod:** lewan ra dekerde, sey lode pêserkerde

**fanîz, nebat, qend:** çeşîtê şekerî yê

**zebad:** donêko boyweş, sey miskî yo (notê M. Emîn Bozarlanî)

**ûd:** qirşikê ûdêran o. **Ûdêrî** (dara ûdî) rojhelatê Asya de benê. Tole  
û kolîyanê nê daran kenê qirşik û buxûrdanan de veşnenê, boya ci weş a.

Tayê bîyî hemveng bi veng û sewtê sazan  
Tayê bîyî hemsenc bi pesn û medh û nazan

**Muxnîyî**, kemanî, ûdî, tembûrî pîya  
Çengî, dawulî, zirnayî, sentûrî pîya

Hem uşşaq hem **newa** hem **îraqî** hem zî **ewc**  
Bi rastîye zî pîya bîyêne çut û zewnc

65 Tewir tewir meqamî awaz û ahengî  
Bi mucîze û keramet bê perde vengî

Wexto ke bîyêne berz neyê gerdenî ra  
Vejiyayêne merdim dîn û îmanî ra

Saqîyî şewişîyay bi awa enguran  
Sazbendî xo ra şîyî bi vengê sentûran

Wazanî, fizûlî, deyîrbazî, dengbêjî  
Pêro bibî kesê mestê serxweşê gêjî

Yanî bi înadê felekê hewtsereyî  
Bi no hawa ronîya sifreyê veyveyî

70 Qeleme kewte destê xetatê felek' ra  
Şûro difek kewt destê celatê felek' ra

---

**muxnî:** yew enstrumanê muzîkî yo  
**uşşaq, newa, îraqî, ewc:** meqamê muzîkî yê

**Nahîd** ame war, kewt govende, xo reqisna  
Aşme şîye **Bircê Çarpencike** xo nimna

**Keywan** şî û bî vîndî, **Bircê Satilî** de  
**Bercîsî** zî xo nimna **Bircê Maseyî** de

Dinya heme bîye kelebut û şayîye  
Felekê kalî rê mende bextsîyayîye

Ey dest ra teba nêame neçar mend êdî  
Neçarîye ver da piro şî hêdî hêdî

75 Çerxê felekê kalî, oyo **rengsemawî**  
Rehwan bî asmên ro, sey meqamê **rehawî**

Alem pêro bî keyf û kelebut seraser  
Hem azad û kole hem bajarî û koçer

Pêro bîyî xerqê nîmet û keyfweşîye  
Pêro bîyî ehlê kelebut û şayîye

---

**Nahîd:** Zuhre, Venus, estareyê rojî/aşme  
**Bircê Çarpencike:** tirkî de Yengeç Burcu  
**Keywan:** Saturn, Zuhal, Sekendîz  
**Bircê Satilî:** tirkî de Kova Burcu  
**Bercîsî:** Muşterî, Jupîter  
**Bircê Maseyî:** tirkî de Balık Burcu  
**rengsemawî:** kewe, mawî, rengê asmênî, rengasmênî  
**rehawî:** yew meqamê muzîkî

Arêdîya sifre û wuriştî mîreyî  
Saqîyan zî çarnayî qedeh û şûşeyî

Mîreyî dawet kerdî û veng da her diyan  
Ey vat: "Zama Tacdîn o, Memo ti yê **şoşman**"

80 Her di xemilnayî cêracor bi lîbasan  
Bi edeb maçî kerd pêşê mîreyî înan

Roniştî a roje, şîmit pêro û pîya  
Dem û wextê xo, vîyarna pêro û pîya

---

**şoşman:** keso ke veyve de beno hevalê zamayî, zamayî û veyveke  
rê rêberîye keno



VEYVEKÎYA SITÎ SEBA TACDÎNÎ  
RONÎYAYIŞÊ ŞAYÎYE SEBA KEYFWEŞÎYA Ê XEMGÎNÎ



Wexto ke sey veyveka newîye xurşîdî  
New qubeyê mîsalê qedehê Cemşîdî

Bi rîyê xo beriqnayî pêro sey cîla  
Pêro kerdî sey zerrnan, kerdî zer-zerdela

Dadike û berbûrîyî û xizmetkarî  
Êyê karê xo de mahir, marîfetkarî

Şîyî ke bixemilnê Sîtî, Zîne-înan  
Nazende bikerê, ê her di nazenînan

5 Ewilî dîqetê xo da bisk û birûyan  
Vîna ke talan û wêran kenê zerrîyan

Gama ke dîyî ê birûyê sey kewanan  
Sey **rastîqî**, bî sing û sîya rengê înan

---

**rastîqî**: boyaxo sîya ke cinî sawenê birû û porê xo ra. Xemilnayoxî şîyê ke seba veyveyî Sîtî û Zîne bixemilnê û bikerê weşik la vera weşîkîya înan de neçar mendê, sey rastîqî bîyê sing-sîya.

Wexto ke çimê xo gina rîyê tezeyî  
Şermî ver ra bîyî sûr, bîyî sey **xazeyî**

Nêşayêne bi surmeyê reşî qet'îyen  
Biherimê çimanê ahuyanê **Xuten'**

Seba kêmyêk sere ra ta binê ligan  
Hezar reyî geyrayî piro, giran giran

10 Lakîn her di ahuyan ra yê ahuyêk zî  
Çin bî tede yew kêmane hendê muyêk zî

Mîsalê serê muyêk mîyane xaseten  
Çiyêko sanikkî bî, ne can bî ne beden

Bi ters û xewf û fikarê şikîyayene  
Qet teba piro nêame girêdayene

Tu kes razî nêbî, pira bivîno kember  
Vatêne şikneno keno zayî û heder

Îcab nêkerdêne nenug û dest û pence  
Hine bibê bi emeg û zehmet û rence

15 O neqîşo ke eger Heq bo neqaşê ey  
Kes nêşeno bibedilno esla û çi rey

---

**xaze:** boyaxo sûr ke sawenê alişkan ra

**Xuten:** Tirkîstanê Rojhelatî de nameyê bajarêk û mintiqayêk o. Bi weşikîya ahuyanê (xezalan) xo meşhûr o. Ahuyê a mintîqa bîyê sembolê rindîye. (notê M. Emîn Bozarslanî)

Vurîya rengê înan û mendî bêhêvî  
Dest de mend fît-vît, ginayî sine ro lewî

Beşn û bala her di dîlberan ra zîynetî  
Roşnîya xo dayêne nohet û ohetî

Pîroz kerdî tacî înan bi sereyê xo  
Û beriqnayî ê bi nûr û cemelê xo

Çareyê her di tacan, oyo sey lewheyan  
Resimkerde bî, bi zîwer û mucewheran

20 Nûro ke cemelê ci ra bîyêne vila  
Şewle dayêne dorme sey lamba û çila

Ê elmas û yaqûtî, ê zumrud û durrî  
Ê bisk û birûyî, perçemo ting û tarî

Sey kitabê şairan bîyî şairane  
Mewzûyî tede ronîyayê **xane xane**

O nûr û cemalo arizî, oyo zatî  
Nusxayê sêhrî bî, nusxayê mucîzatî

Heme beytî ameybî pêser bîbî dîwan  
Ayetî zî ameybî pêser bîbî Quran

---

**xane xane:** beyte bi beyte



25 O huner, hunerê ê **Westayê Mutleqî**  
Kamî dîyêne vatêne “Şukir bi Heqî”

Bî tamam amadebîyayişê veyvekan  
Dima zî merasîm kewt çarşîyan û sûkan

Her çeşît ra xeml û xêz, lîbasê rindekî  
Her çeşît ra mucewher û çiyê weşikî

Se carîyeyî, di seyî bendeyî şîyî  
Êyê **lîbasxercinê zerbendeyî** şîyî

Deveyî qetar-qetar, durrî qentar-qentar  
Yaqûtî bar bi bar, zerrnî **xewar** bi xewar

30 Humaritişê ci karê hesaban nêbî  
Nuştiş û qeydkerdiş karê kitaban nêbî

Karê aqil û fikirî nêbî hende cêz  
Binê barî de nêmendbî deveyan de hêz

Ê debdebeyî rona heyecan û hewes  
Bîye zeze-mele wurişt payan ser her kes

---

**xane xane:** beyte bi beyte

**Westayo Mutleq:** Homa, Heq

**lîbasxercin:** keso ke neqşê lîbasê ci surmeyin ê

**zerbende:** kincê ke bi layê zerrnhelî (bi tirkî “yaldız”) ameyê deştiş

**xewar:** yew peymê giraniye biyo, qasê hîrê sey kîloyî biyo (notê M.

Emîn Bozarslanî)

Cenîyan camêrdan û heme bajarîjan  
Xo xemilnaybî heme pîlan, heme qîjan

Mîsalê behran pêl bi pêl pêlîyayêne  
Seba seyr û seyranî xilxilîyayêne

35 Nişka asa **Koyê Cudî**, mîsalê berî  
Ver çarna uca **keştîya Nuh pêxemberî**

Yanî o **qonaxo** ke Sitî tede bîye  
Qesra ke perîya ê wextî tede bîye

Texteyî taşîyayê **sendelûsêran** ra  
**Perwazî** vîrazyayê **abenusêran** ra

Textêk ronîyayo seraser mucewher o  
Delal delal ronişta a **Belqîsa** ser o

---

**Koyê Cudî:** Banê zamayî (Tacdîn) qest beno

**keştîya Nuh pêxemberî:** Texterewanê veyveke (Sitî) qest beno.  
Ehmedê Xanî metaforê tofanî bikar ardo. Qelebalixê dormeyê veyveke şî-  
bênayo pêlan, texterewanê veyveke şîbênayo gemîya Nuh pêxemberî,  
banê keyeyê zamayî şîbênayo koyê Cudî.

**qonax:** texterewanê veyveke qest beno

**sendelûsêre:** darêk a, texteyê xo req û boyweş ê (notê M. Emîn  
Bozarslanî)

**perwaz:** texteyê kêmver û tenik ke dîyenê dorê çerçewaya beran û  
pencerayan ro

**abenusêre:** darêka a, texteyê xo zaf huşk, rengê qehweyî de, eke  
cîla bibo zaf weş beriçiyeno

**Belqîsa:** Şabanûya Seba ya, şîya leyê Suleyman pêxemberî û tay  
zewicîyaya. Ehmedê Xanî Sitî şîbênaya Belqîsa, textê Sitî zî şîbênayo  
textê aye. (notê M. Emîn Bozarslanî)

Destê xo bestê verê xo de xizmetkaran  
Kemberzerrnênan û engiştanegewheran

40 **Sey Asefê Berxîyayî** hezar lezgînan  
Hemalîye kerdêne, şad bî dilê înan

Wegirewtbî sereyê xo ser înan o text  
Û remnayêne yewbînan dest ra wext bi wext

O texterewan sey kelek û gemîyan bî  
Deryayê ci zî deryayê ademîyan bî

Behro ke bikewo vayî ver, do pêl bido  
O do bixuşîyo û zerrî ra kel bido

Wina ronîyayo cayê heme aşiqan  
Perwane û findî tede benê têmîyan

45 Sofî û mela û şeyx û feqîr û paşa  
Pêro zî kewtbî seyr û seyran û temaşa

Înanê ke xeman dest ra kerdêne feryad  
Nêmend ci ra yewero ke nêbîyo dilşad

Verê beran de komî, şemateyêk tede  
Û yê heme koman zî temaşeyêk tede

**Asefê Berxîya:** Wezîrê Suleyman pêxemberî biyo. Wexto ke Bel-qîsa kewta rayir û verê xo dayo Suleyman pêxemberî, hîna ke rayir de bîya, Asafî textê aye bi keramet girewto berdo leyê Suleyman pêxemberî. (notê M. Emîn Bozarlanî)

To vatêne qey veyveke bîya ruh û can  
Ê zî bîyê beden, dima bîyê rayirwan

Sazî ruh û can danê merdeyan sey **sûrî**  
Dawilî, zirnayî, sentûrî û tembûrî

50 Bi awaz û tew-tewleme, bi gazegazan  
Dilê goşdaran bîyêne mest bi nê sazan

Pêro pîya ke ci ra vejîyayêne veng  
Seraya felekî ey ser o bîyêne teng

O kay û kelebut, a keyfweşîye, o bext  
Nêdîyo çiman ne tu zeman û ne tu wext

Gemîya felekî ya ke meleke tede  
Pêlan ke daye xo ver û girewte berde

O veng, hayleme, saz û awaz û ayînî  
Gamêk ra tepîya şî resayî Tacdînî

55 Tacdîn bi xo mîsalê şahêk, padîşahêk  
Mem zî kîştî ey de mîsalê aşmêk, mahêk

Ronişte bîyî şaneşînêka berze de  
Giregirî zî ameybî pêser dorme de

---

**sûr:** Fîtika ke Îsrafil seba qîyametî ceneno, o wext, heme merdeyî  
benê gane, mezel ra vejîyenê û şonê meydanê mehşerî. (notê M. Emîn  
Bozarlanî)

Qey temaşekerdişî wuriştî payan ser  
Hemîne tebexî dayê her di destan ser

Tebexê destî mendêne rîyê asmênan  
Tebexê destî yaqût û zumrudê **kanan**

Înan ê tebexî şaneşîne ra cor de  
Rokerdî, rişnayî, textê nîgare ser de

60 Zîra ê heme dekerde bîyî, pir bîyî  
Zîra ê heme mucewher bîyî, dûrr bîyî

Dizd û yaxmekarê xiznayan bîyî maşa  
Xizanî heme zî bîyî mîre û paşa

Se qatî zêde hêvîya temakaran ra  
Bêxeyrê arêdayişê çimvêşanan ra

Derya û gumrah, comerdîya comerdan ra  
Derya û gumrah, çikûdîya çikûdan ra

Xizanî pê pereyan bîyî kesê mestî  
Bîyî îflaskerde tolaz û **zenperestî**

65 Xizanî, parsekî, dewlemendî, zengînî  
Keyfweşî, pozxinî, zerrîweşî, xemgînî

---

**kan:** ocaxe, ocaxa madenî, cayo ke ci ra maden vejenê  
**zenperest:** cenîperest, cenîdost, camêrdo muhtelayê cinîyan

Êdî nêbîyêne yewbînan ser ra cîya  
To vatêne şah û sultan ê, pêro pîya

Ferq nêmend tede pêro bîyî yew û eynî  
Pêro bîyî dost, verare şîyî yewbînî

Hasil, o qefle ke vejîya ame û rest  
Ê der û dorî, koşk û serayî bîyî mest

Bengînî, heskerdoxî, sermestî, serxweşî  
Çengcenî, fekbazî, yarîkerî, vengweşî

70 Çiqas ke estê, bengîn û serxweşê Botan  
Pêro zî kewtê kayî ver, erzenê lotan

**Bêrite**, govende, kay û sema û sazi  
Delalî, lewşekerî, şîrin û dilbazî

Genc û xortê ezebî, lajekî, keynekî  
Wildanî, horîyî, perîyî û melekî

**Paçgulî, pirêngulî, kefi-yasemîni**  
Qalweşî, şeker-şerbetî, ziwansîrinî

Kulikê xo çewt, kemberî zerrnên û zîya  
Rî sey tîja aşme, bisk-birûyî, sing-sîya

---

**bêrite**: yew tewirê govende ya, têver de deyîran vanê û kaykenê

**paçgulî**: keso kê paçê xo, gomlekê xo gulgulîn o

**pirêngulî**: keso pirênê xo gulgilîn

**kefi-yasemîn**: keso ke kefiyeya xo rengê yasemînan de yo

75 Sey sîman beden, sey yasemînan alişkî  
Sey sayan çeneyî, sey henaran çiçikî

Mîyaneyî sey layan, gilayî sey maran  
Êyê çarêsserreyî, birûyî sey çaran

Êyê ezebî, êyê tern-tezeyê semtî  
Genc û rihalê cênigê ci sey zumrutî

Tayê înan vengweş ê, tayê înan weşreng  
Tayê înan lezgîn ê, tayê înan zî leng

Pêro pîya, bi rexmê ê felekê kalî  
Pêro pîya, bi rexmê ê qulûzê bulî

80 Kênekê sivikî, lajekê can-ciwanî  
Mîsalê **Hewt Birayan**, mîsalê **Perwînî**

Tayê deyîrebend ê, tayê zî çerxdaxox  
Tayê silsîlebend ê, tayê zî geyrayox

Komê înan mîslê komanê estareyan  
Beriqîyayî bi hewt rojan û hewt şewan

Veyweyê ê waştîyan, yê Sifî û Tacdîn  
Wina xemilna înan, kerd rengîn û zengîn

---

**çare:** yew tewir çarşewe/şale

**Hewt Birayî:** Hewtekî. Komêka estareyan a. Di komikan ra yena pê; her yew kome de hewt estareyî estê. (notê M. Emîn Bozarslanî) Tirkî de vanê "Büyük Ayı" û "Küçük Ayı"

**Perwîn:** Yew koma estareyan a, vakurê asmênî de ca gêna û hewt estareyan ra yena pê, ci rê vanê "Sureya" zî. (notê M. Emîn Bozarslanî)



**MEQALEYA TAKEWTIŞÊ FINDA CEMALÊ YARAN  
DEMÊ PÊRESAYIŞÊ MIRADWAZ Û SEWDASERAN**



Mîsalê veyveka newîye pake **gerdûn**  
Bi rojî nîya zamayî ro, rengo gulgûn

Wedart perdeyê tarîfî her ca kerd roşna  
Xem û keder, mîsalê zulmetî kerd fena

Wextê serê şewdirî, yê roja hewtine  
Adir resayo bi neftî, kesî vatêne

Germîya adirê nizdîbîyişê yaran  
Wedaritêne leşa aşiqan ra dûman

5 Bêguman ke bireso pê, adir û hewa  
Helbet merdim pê beno fena û berhewa

O eşq û o hewa ke pîya bîyî dildaş  
Helbet ke zerrî û canî danê bi şabaş

Sebr tede nêverdabî adirê hîcranî  
Veşnaybî û kizirnaybî ê her di canî

---

**gerdûn:** kaînat



Behrê eşqî girêya, nata-weta pêl da  
Sebr û sebat û aram qet tede nêverda

Waştî û waştîye adirê eşqî dest ra  
Hema vaje can dayêne hesretî dest ra

10 Dadike, xemilkarî, dost û yarî pîya  
Şoşman, Tacdîn, û heval û hogirî pîya

Dî ke ameyo wextê veyvek û zamayî  
Edetan gore xo ca ra werizîyayî

Têver de buxûr û eterê boyweşîye  
Têzere de mey û şerabê serxweşîye

Şûşe û qedehî, **eyax** û şerabdanî  
Misk û ember, ûd û zebad û buxûrdanî

Awa gulan, çeşît bi çeşît boye, bîne  
Welhasilê kelam, her çî, la ra derzîne

15 Heme çîyê eşq û keyf û zerrîweşîye  
Heme çîyê zewq û sefa û keyfweşîye

Hende çî rona û amade kerd ke înan  
Merde pê bîyêne candar, bêşik bêguman

---

**eyax:** zamanê verî tasa şimitişê meyî bîya, na çeku tirkî ya. (notê M. Emîn Bozarlanî)

Rindarind xemilna înan cayê veyveke  
Ber û dêsî, pencerayî teke bi teke

Wuriştî pêro pîya heme xizmetkarî  
Tayê eqrebayî tayê zî dost û yarî

Yew finda ke **zerrnkilkerda** bîye cêracor  
Mîsalê rojî kerdêne roştî nor û dor

20 Girewta bi sereyê xo ser, bi reqasan  
Arda mîyanê **meclisê kesanê xasan**

Finde bi **ziwanê halî**, bêqîsa bêqal  
Wina beyan kerd Tacdînî rê, hal û hewal

Vat ke: “Ey aşiqo bêqerar û bêsebir  
Eger ke sey mi kewto canê to zî adir

Hadê biwurize şore leyê veyveke  
Tenya meverde aye, payan maçî bike

Finda to menda sey to, bi ax û întîzar  
Hesretê to aye rê bîyo adiro har

---

**zerrnkilkerde:** çîyo ke dayo awa zermî ro, yanî bi zerrnawe kil kerdo  
**meclisê kesanê xasan:** Meclisê Tacdînî qest beno.

**ziwanê halî:** Ziwanê ke halê çîyêk ra yan zî kesêk ra fam beno; ziwano ke halêk ra yeno zanayîş, seke hal ra yeno zanayîş, ci rê wina vajî-yayo. (notê M. Emîn Bozarlanî)

25 Dê bes o hende veşayişê to sey mûman  
Û sey mi varnayişê hesiranê çiman

Eke aşiq ê, biperre sey sîsperikan  
Bide canê xo sey qurbanan û boraqan

Ti, ey nîyetdar û heweskarê tewafî  
Ti, ey rayirwanê ca û warê tewafî

O Kabe û o qibleyê karê miradî  
Bi emrê Homayî ho to ra bîyo nîzdî

O Beyt û Hecer û Meqam û Hucre pêro  
Şiyiş û ameyiş, tewaf û umre pêro

30 Homayî semedê to ê kerdê muqeder  
Pêro semedê to bî pîroz û muyeser

Eke aw ê, şore leyê dara vîyale  
Eke şêr ê, dê şore leyê a şepale

Tacdînî bi eda, bi sûretê **şemale**  
Mana û meqsedê xoşbera şepale

Zana û tede vet ey, bi îzan û îdrak  
Dima zî wurişt cayê xo ra çust û çalak

---

**şemale:** mûme, finde

Dostê xo yê xem û keyfweşîye Memo jar  
Ey reyra wurişt xo ser, ci rê bî sîlehdar

35 Destê xo destê ci de, dil zî dilê ci de  
Bî dergewanê ci şimşêr zî milê ci de

Kewt zereyê seraye Tacdîn bi no hawa  
Berî ver de mend Mem, bi nîyaz û dua wa

Çayê ke na pêrabestene zaf xewfin bena  
Dişmenîye aşiqan rehet nêverdena

Zîra yê heskerdoxan, û yê heskerdeyan  
Bêguman estê dişmen û reqîbê înan

Înan ra tayê dêv ê, tayê zî perî yê  
Tayê zî kesê munafiq ê, ademî yê



**RESAYİŞ BI KABEYÊ MIRAD Û TEWAFÎ  
CAAMEYIŞÊ MEQSED Û MERAMÊ ZÎFAFÎ**



Wexto ke bi edeb şî verê berî zama  
Peyê perdeyan û xêlîyan ra a **şema**

Wurişte şîye ver bi ci bi naz û eda  
Pêşo derg bi nazdarîye xo dima kaş da

Ameyêne resayêne binê lîngan por  
Bi dest kerdîbî rast, ver çarnabî nor û dor

Sîmaya ci sey **Beytul-Eqsa** şewle dana  
Qendîla felekî pê ci beriçiyena

5 Mestê meyê derdê hîcranî, yê vizêrî  
Arzûdarê meyê wusletî, yê şewderî

Verê verkan goreyê edetê **mubahî**  
Dest derg kerd bi gerdenî, mîsalê surahî

---

**şema:** mûme, finde. Sifî qest bena

**Beytul-Eqsa:** Quds de camîya pîle. Destpêkê îslamîyetî de qeb-  
leyê musulmanan biyo, dima Kabe kerdo qible. (notê M. Emîn Bozarlanî)

**mubah:** caîz; dînê îslamî gore çîyo ke emir nebîyo û nêameyo qe-  
dexekerdîş zî, merdim biwazo keno nêwazo nêkeno, gunê û sewabê xo çin o

Şimit a surahî ra şîrin û şekerlew  
Şimit şûşeyêk ê şerabî ra lewalew

Serxweşîye ke def kerde meyê xalisî  
Boye kerdî sûrgulî, sunbul û nêrgizî

Ge nêrgiz û alalî, ge-ge zî sûrgulî  
Ge rihan û menefşeyî, ge zî sunbulî

10 Kerdêne têmîyan ra, besnayêne pêra  
Ge gaz kerdêne ge zî lew nayêne pira

Winî zaf lew nayêne yewbînan ra înan  
Lewpanayîş de dore nêdeyne yewbînan

Elmasî, cewherî, sipîyîya didanan  
Bîyî sûr, bîyî sey alalan û mircanan

Pêl da derya û dengizê eşqî coşîya  
Destî gerden de, lew bi lew, têver de pîya

Bi ê şerabî ameybî piro gêjîye  
Payanî ra ameybî piro bêhişîye

15 Nêşqayêne ronişê aşiqî êdî  
Semedê secdeyî gêr bîyî hêdî hêdî

Her di pîya reyna ke secde ra rast bîyî  
Têver de xeylê zeman şa û sermest bîyî

Lewanê yewbînan ra remnayêne şeker  
Yewbînan rî de sûrgulî ardêne pêser

Kerdî şeker û şerbet xo rê heme gulî  
Wexto bestîyayî pêra her di dilî

Hîrê rojî, hîrê şewî bi dil peyapey  
Her di teyşanan şimit o şerbet û o mey

20 Çiqas ke meyê xalisî ra şimit û werd  
Ancîna zî teyşan mendî qet nêbîyî mird

Bi şayî û keyfweşîya şerab û meyî  
Têver de ginayî adir ro û veşayî

A çenedelale didansedefe, Sitî  
Bi nîyetê zîfafi girewt xo ver waştî

Pêşîyayî bi yewbînan ro, dest da bi dest  
Têver de erd ro gindir bîyî, har û sermest

Ge cîya mendêne ge pilosîyayêne  
Ge vindertêne ge-ge zî hejîyayêne

25 Ge-ge bîyêne çut, ge-ge bîyêne cîya  
Ge-ge bîyêne tek, ge-ge bîyêne piya

Tîrê sey didanê filan, ver da hedefî  
Amanc pak û temîz û safî, sey sedefî

Amanc ke serê tîre rê bî ca û mekan  
Durrî bedilnayî bi mircananê sûran

Tîre peyser ancîyaye nesil mend tede  
Bi zerrî û bi can, nesil verda Sitî de

Pêsero û pêsero, çi şan û çi şewder  
Adirê eşq û sewda ra ameyî têver

30 Ê her di serxweşan, ê her di sewdaseran  
Têdima kerdêne vik-veng tewrikê tîran

Şewê ting û tariyî û rojê felekî  
Têver de zerrîweş bîyî her di melekî

Ê her di pîya mîsalê di kîmyageran  
Merdimî vatêne qey pêanê gewheran

Her di can û cesedî têmîyan de bîyî  
Her di nefsi pîya eynî beden de bîyî

Ronîyabî legen ronîyabî mesîne  
Verdayêne zereyê ci fine bi fine

35 Têzere de ê mîsalê şit û şekerî  
Têmîyan de mîsalê Heyat û Kewserî

Çin bî ci rê hewnê şewe, çin bî rakewtiş  
Qet nêameyêne vîr werdiş û şimitiş



Bî tamam o hewte, bi zîfaf û bi gerdek  
Haydar nêbî halê ci ra tu kes û yewek

Zor berd bi kul û derdan, weşî û sihetî  
Xemî remayî şîyî bi kerbê wusletî

Wexto ke kewtî roja heştine, bî şewder  
**Ridwanî** caverda cenet, vejîya teber

40 Hîna berî ver de bî Mem, ancî sey verî  
Û ancî sere dabî serê yew kemerî

Ancî verê berî xo rê kerdbî ca w mekan  
Bi roj û şewan uca de bîbî dergewan

Tacdîn ke vejîya teber û asa ber de  
To vatêne roj vejîyayo Memî ser de

A game zaf ame keyfê xo, bî şadiman  
Bî berz sereyê xo, resa rîyê asmênan

Eger ke dostêkê to beno, wa wina bo  
Û eger ke wina nêbeno, wa qet nêbo

45 Seba dostanê duristanê muwafiqan  
Sed xisimanê xayînanê munafiqan

Qurban bike û qet mevaje eman-yeman  
Se kenê ti bi xisimanê bêwefayan!

**Ridwan:** Melekê cenetî, tîya de Tacdîn qest beno

Qurban bike ti mevaje kam o, senîn o  
Senî beno wa bibo, esla ferq nêkeno

Bizane ke dostê to to rê tim bira yo  
Tim û tim to rê çim o, daîma çira yo



**HÎLEKARÎ Û FINETÎYA BEKIRÎ  
SEBA KE QEHIRÎYENO TACDÎNÎ RA  
KE WA MÎRE ZÎNE NÊDO MEMÎ NÊ SER Û SEBEBÎ RA**



Wexto ke Heqî çinbîyîş ra kerdo îcad  
**Kewn û mekanî** rê ronayo bin û binyad

Her çiyê rîyê erdî her çiyê rîyê alemî  
Candar û bêcan hetanî benîademî

Goreyê sifet û kar û emelî eşya  
Taşto û viraşto heme çî fer û cîya

Afernayê, têver de dayê şinasnayîş  
**Tezad** kerdê, û têver de dayê zanayîş

5 Rîyê erd û asmênî û çerxê felekî  
Mal û milk, ca û mekan, însan û melekî

Roşniye, tarî û zulmet, kufir û îman  
Dinya, axret, cenet, cehenem, adir û can

---

**kewn û mekan:** kaînat, mewcûdiyet

**tezad:** zid, eks

Awdar, zik-ziwa, germ-qîyale û serdo sext  
Mîre, parsek, feqîr, bextsîya û ehlê bext

No adir, no hewa, na awe û na herre  
Bişewe, biroj, tîje, versîya kemere

No hîcran û wuslet, na keyfweşîye, no xem  
No merg û cuyan, kay û kelebut û matem

10 Tayê mîsalê nûrî yê, tayê adir ê  
Tayê helîm û selîm, tayê zaf xedar ê

Ê xeyrwazî, zerrîweşî, rast û duristî  
Ê rîsîyayî, fuzûlî, pîs û pilintî

Êyê kila cehenemî, êyê ezaban  
Êyê layiqê cenetî, êyê sewaban

Ma ti nêvînenê, pêro zid û tezad ê  
Hîkmet çi yo, çira wina eks û înad ê?

Nêbo zidbîyayîş, nêbo tezadbîyayîş  
Mumkin nêbeno cîyakerdiş û musayîş

15 Yanî goreyê îcabê afernayîşî  
Mîreyo kamilo wayirê bextê weşî

Wezîfedar kerdbî seba xo dergewanêk  
Fuzûl û fesadêk, kutikbab û pîntînêk

Tim û tim verê berê ey de **qapucî** bî  
Tim û tim qelaker, qelaş û **qehwecî** bî

O bi neslê xo merdimê Botan nêbî  
Belkî zem-zûr ra kewtbî, lajê buxtanan bî

Vanê ke ca û mekanê ci **Mergever** bî  
Seraser fitne û fesad, seraser şerr bî

20 Nameyê ê kesê munafiqî **Bekir** bî  
Belkî zî **Belûqîyayî** ra xirabêr bî

Ziwançepel, fêlxirab, dirî û îblîs bî  
Fekwazan û hîlekar, oyniker û pîs bî

Şagirdê bêyewmîya ê pîsî şeytan bî  
Heme kar û gureyê ci zem û buxtan bî

Sey gulyabanîyan bî, û yewero mirdar  
Yewero lanetî, qefçilêko rîyakar

Mîreyî rê eşkera, wina vat Tacdînî:  
“Mîreyê mi, bike teber nê dergewanî

---

**qapucî:** dergewan (Ehmedê Xanî vato “qapuçî”)

**qehwecî:** qehweviraştex (Ehmedê Xanî vato “qehweçî”)

**Mergever:** Yew mintiqaya Kurdistanê Rojhelatî ya, pabesteyê Ur-  
mîye ya. (notê M. Emîn Bozarlanî)

**Belûqîya:** Yew cihûdo mîtolojîk o, bi xirabîye, zexelîye û fendanê xo  
şinasîyeno, no rî ra bîyo nîşanê xirabîye û zexelîye. (notê M. Emîn Bo-  
zarlanî)

25 No caran layiqê verê berê to nîyo  
Kutikê verê keyberê cehenemî yo

Çiqas ke kutik û deregewanî bira yê  
La kutikî hîna sadiq ê, biwefa yê”

Labelê mîreyî Tacdînî rê vat wina:  
“Qey ez bi kerdena Bekirî nêzanena!

Ma beg û mîreyî mîsalê arêyan ê  
Her tim çerixîyenê sey perwaneyan ê

Lazim beno ma rê her daîm arêwanêk  
Şert û ferz o ma rê tim û tim dergewanêk

30 Ma karê hukmatî kenê û ma kenê dewr  
Karê ma ge-ge edalet o, ge-ge zî cewr

Çiqas ke Bekir **weledzîna** yo, pîntîn o  
La arêyê ma zî bi ey çerixîyeno

**Zumreyê** zaliman, xidaran, ardimkaran  
Yê **sûbaşîyan**, muhafizan, dergewanan

---

**weledzîna:** ewladê zîna, keso ke netîceyê zîna de ameyo dinya

**zumre:** taîfe, kome, grûbe

**sûbaşî:** Mesûlê bajarî. Na çeku tirkî ya, wextê Usmanîyan de demêk seba mesûlanê bajaran ameya bikar ardiş. (notê M. Emîn Bozarslanî)

Ê heme arêyê ma zaliman çarnenê  
Zad û teneyê zulimkarîye tehnênê

Arêyê ma gerçî **weqfa** xas û amî yo  
La boxazê ci pirrê zadê heramî yo

35 Yew citêr şono rameno kurêk û xele  
No zî ano cuwenê ma de keno cele

Tenya no nîyo edet-toreyê mîreyan  
Dîqetê xo bide berê fiqareyan

Verê berê înan de kutikî lawenê  
Ê kutikî eynî dergevanan manenê

Şahê bênîyazê textê rîyê asmênî  
Seba sazkerdişê kar û barê cîhanî

Çende ke rawuriznayê şah û sultanî  
Des qatê înan zî peyda kerdê şeytanî"

40 Mîre nêvîyart kelpê xo ra; da îzehat  
"Bekir tim û daîm ma rê lazim beno" vat

Tayê mîreyî tajîyêkê xo, yew dele  
Nêbedilnenê bi estorêka kihêle

---

**weqf:** mal û milko ke seba xeyrî ameyo abirnayiş, êdî malê şexsî nîyo, yanî milko arizî nîyo, her kes eşkeno ci ra îstifade bikero.

O pîso lanetîyo xirabin û kîndar  
Yanî, o Bekiro zerrîsîyayo mirdar

Tersayêne o, ters û xewf bî ci rê Tacdîn  
Her tim zerrîya ci de estbî xerez û kîn

Wexto ke bi bextweşîye, keyf û şayîye  
Bîbî veyve û ronîyabî silayîye

45 Sey şeytanî bî nîzdî her kesî ra dûrî  
Bi meqsedê xapênayîşî, zem û zûrî

Tenya mîreyî rê wina vat, ey bi dizdî:  
"Mîreyê mi, to mift û belaş daya Sîfî

A gewhera tacan, taca gewheran bîye  
A taca zîynetan, zîyneta tacan bîye

A layiqê tac û textî ya, zaf hêca ya  
Rindek û delal a, bîaqil û zana ya

Kîsra bi keder o, seba vînayîşê ci  
Fexfûr bi ax-wax o seba sînayîşê ci

50 Qeyserî do a lajê xo rê biwaştêne  
Xaqanî do ci ver de destî bibestêne

Îcab nêkerdêne ke to a wina ercan  
Lezabez payan ser bidayêne înan"



Mîreyî vat: "Ez caran dana, hey ecemî!  
Bi tac û textê Qeyserî, Tacdîn û Memî?"

Roja şer û cengî, roja pêrodayişî  
Tacdîn û Memî ardî, di sey qizilbaşî

Ê pêro bi zirxan û zendan û **binperan**  
Girewtî ardî bi şimşêran û **şeşperan**

55 Fexfûr kam o ke, ez se kena bi Xaqanî!  
Ez înan nêdana bi nîmeyê cîhanî"

Melûnî dî ke mîre qet nêbeno îqna  
Dest kerd bi zem û zûrî ey, mesela çarna

Ci rê vat: "Baş o heqîqetê xiretkaran  
Goreyê ci bo, sedaqetê xizmetkaran

Roja ke şimenê şerabê derd û kerban  
Wexto ke wenê goştê **selwayan**, kebaban

Senî ke şayîye de, wextê sefayî de  
Lazim o tengîye de, wextê cefayî de

---

**binper:** zamanê verî de yew çeşît sileh

**şeşper:** zamanê verî de yew çeşît sileh

**selwa:** Yew tewirê teyrana, tirkî ci ra vanê "bıldırcın", wexto ke cihûdî Misir ra vejîyenê, çolistan de vêşan manenê, Homayî goştê na teyre ra dayo înan. Tewrat de wina vîyareno: "*Şan de selwayî ameyî, dorê ordîgehî girewt. Serê sibayî derûdorê ordîgehî de qir kewtbi.*" (Misir ra Vejîyayiş: 16:13)

60 Ganî peyda nêbo tede bedilfıyayış  
Ganî meyero meydan tede vurfıyayış

Xizmetê xo de her tim bibê rast û durist  
Xebata xo de qetfıyen nêbê sist û pist

Lazim o ke yew û eynî bo zewq û sefa  
Ganî yewbînan bigêrê rastî û wefa

Ema awe de şona başîya camêrdan  
Bi nelayıqan û xayînan û namerdan

Namerd munasibê başî û malî nîyo  
Cahil û ciwan layiqê kemalî nîyo

65 Peymê cahil û ciwanan mey û şerab o  
Wextê serxweşîya înan zî zaf xirab o

Ci rê zaf aqil lazim o, sebir û sebat  
Qey ke cahil pê meyî xo nêkero berbat

Mîreyê mi, qey to nêdî **lajê Eskender**  
Qerifnayo bend, hed ra vejîyayo teber

To daya ci Sitî, o resa miradê xo  
Ey Zîne daya Memî, nêzano hedê xo”

---

**lajê Eskenderî:** Tacdîn qest beno. Eskender nameyê pîyê Tacdînî bîyo.

Mîreyî vat: "Çi caran mi ra nêkerdo pers  
Ecêba duştê mi de nêmodo tede ters?"

70 Ey vat: "Ma ti nêzananê ke o wina yo  
Hem ciwan û pehlewan o, hem zî mîrza yo

Meydan veng dîyo, hevsarê xo felitnayo  
Se keno bikero, musteheq û rewa yo

Tersê mi o yo ke kîn û qureyîye ra  
Îsyan bikero badê dayîşê Zîne ra

Beno ke o dewaya mîreyîye biko  
Do bivajo 'Xalid seba mi zî kalik o'"

Mîreyî vat: "Zerrîya mi ra bibî derbaz  
Ke ez Zîne bi Memî bikerî serfiraz

75 Sond wanena ez bi ruhê ced û celalî  
Hetanî bireso ruhê Xalidê kalî

Na dinya de nesilê Ademî ra çi kes  
Wa nêwazo Zîne û qet nêkero hewes

Camêrdo ke wazeno, bido sere û can  
Ha ci rê Zîne, dê wa bivejîyo meydan!

O keso ke bi sere û ruhê xo mird o  
Wa bê ters biwazo aye, eke camêrd o!"

---

**Xalid:** Bapîrê mîreyanê Cizîre yo.

Şahî bi hetê xo yê zere û teberî  
Mîsalê kile benê, manenê adirî

80 Teberê ci weş û delal o, roşn û nûr o  
La zereyê ci veşneno, adiro sûr o

Eke rehme kerde, merdimê sey rojî yê  
Eke qehr bikerê, kesê **cîhansojî** yê

Bincaran şima înan ra mekerê bawer  
Wazenê pî û laj bê, wazenê birader

Dormeyê înan de bibê kesê mizirî  
Xelase bena ancax bi destê Xizirî

---

**cîhansoj:** cîhansojnayox, cîhanveşnayox, keso ke cîhanî yanî dinya dano adirî ver, veşneno.



**BÊUMÎDÎYA ZÎNE BEXTEWARÎYA WUSLETÎ RA  
DERDMENDÎYA AYE RÎYÊ HÎCRAN Û HESRETÎ RA**



Tacdîn û Sitî ke bîyî bextewar û şad  
Restî miradê xo, hîcran ra bîyî azad

Mem mend kuncê tenyayîye de, tenya û ferd  
Ne heval û hogir, ne dost û yar, ne hemderd

Eke hemdemî nêbê semedê deman ra  
Eke hemderdî nêbê semedê xeman ra

Xemgînî do bi çi hawa bikerê sebir  
Keyfweşî do bi çi hawa bivînê huzir

5 Xeman û şayîye rê lazim ê embazî  
Derdan û deman rê zî lazim ê demsazî

Hêvî û hedura aşiqan hemrayî ya  
Çîyo ke nîyeno antene tenyayî ya

Têver de zerrî bena sakîn, yê hemqalan  
Bitaybetî zî yê hemderdan, yê hemhalan

Hem Sitî û Zîne, hem zî Memo û Tacdîn  
Îdare kerdêne pîya, biyêne teskîn

Zîne ke derdan ver kerdêne feryad fixan  
Vengê Sitî ci rê biyêne daru derman

10 Eke Memî zerrî ra kerdêne nalenal  
Tacdîn zî ey rê biyêne hekîm û heval

Sitî û Tacdîn her di pîya dilşa biyî  
Zîne û Memoyî ra her di cîya biyî

Memo û Zîne mendî yewbînan ra cîya  
Mendî bêmeqsed, nêbî miradê xo pîya

Çewres rojî ne werd ne zî hewn bî yê Zîne  
Qet aye ra kêrnêbîyêne bermayene

Gonîya zerrî ci rê biye xida, werdek  
Hesirê çiman zî biyî şerbet, şimitek

15 Şew û rojê aye pêro bi eynî hawa  
Derdê hîcranî dest ra halê xo tim wina

Biroj bermayêne şewe antêne keder  
Zîna sey aşme heliyabî bîbî heder

A aşma pîrrpîncêse bîbî sey hîlalan  
Rî û rûçiko delal bîbî sey xeyalan

Hevalan û hogiran, hemveran, embazan  
Dostan û yaran, nazenînan û hemrazan

Tim vatêne Zîne rê bi zerrîveşnîye:  
“Ey selwîyêra bax û baxçeyê pîlîye

20 Ti vila newa ya, pelgo teze ya, şên a  
Çira wina tim û tim hesiran varnena?

Gerçî waya delale to ra bîya cîya  
Ema weş şîya bi **hemserê** xo şa bîya

Aye uca de xo dayo hetê şênîye  
To tîya de xo dayo hetê xemgînîye

Êdî zerrîya xo ra biqewirne xeman  
Bide vayî ver înan sey por û perçeman

Bike helqa bi helqa ê porê şewrengî  
Abike mîsalê gulan rîyê gulrengî

25 Por bibo xeleke bi xeleke, abike  
Çareyê xo pê ê xelean tacdar bike

Ê biskanê xo yewbînan ra cîya bike  
Ê porê xo şane bike, berhewa bike

Wa sunbul û gulî pêro aşîna bibê  
Wa rîhan û menefşeyî ta bi ta bibê

---

**hemser:** mêrde (bi tirkî “eş”)

Verade biskan cor de bi serê hîlalan  
Pê ci sewdaser bike Meke de **bîlalan**

Ancî cêra bike biskan, bike şerabwer  
Abike gilayan biverde Kabeyî ser

30 Wa xelq û alem, xerb û şerq ra hetanî Şam  
Mîsalê hecîyan bipêşo xo ra îhram

Têver de pêbîya ti biskan û birûyan  
Rindekîya to bibo rindekîya Quran

Wa bibê rîpelê zerrnhelî ê alişkî  
Rêz bibê ser o ayetê cenabê Heqî

Wa qefleyê kafiran û yê musulmanan  
Tesdîq bikerê bi hukm û qerarê Quran

Ê xemzeyan, ê awiranê gonîweran  
Înanê sey tîran, înanê sey xenceran

35 Bincaran mede înan ti, destûr û ruxset  
Çin o tede qey Heqî rehme û merhemet

Destûr bide ti ê biskanê wêrankaran  
Wa hukm bikerê bi şahan û hukimdaran

---

**bîlalan:** Bîlalê Hebeşî. Hozanî tiya de sewdaserî şibênayê Bîlalî.  
Yanî kesê ke sey ey bawermend ê, wa ê zî bibê sewdaserê to û bi eşqê to  
bibê sewdaser. (notê M. Emîn Bozarslanî)



Wa abibê perdeyî verê ê gulan ra  
Ti biewnîye bêsebrîya bilbilan ra

Abike pindê fekî binawne didanan  
Wa pê binalê hezar nuştoxê destanan

Serxweş bike bi pelegoş û goşareyan  
Serssem bike cindar û gêc û ewareyan

40 Meywer bike melayan bi cîlwe û nazan  
**Bişirawe şeyxan verê garana xozan**

Destûr bide bisk û birûyan, ê gilayan  
Xeberdar bike heme kesê **ehlê halan**

Wa murşîdo ke kerdo vîndî rêçe w rayir  
Çolistan de nêbo çarpayêko bêwayir

Terk û înkâr bikero xeletê mutleqî  
Û wa îqrar bikero bi sûretê heqî

Hinî terk bikero tecelîyê celalî  
Qîm pê biyaro bi tesewurê cemalî

---

**Bişirawe şeyxan verê garana xozan:** Ehmedê Xanî tîya de qale  
ano Şeyxê Sen'anî ser û ey ano vîr.

**ehlê halî:** Derwêş û sofîyê ke cezbe înan gêno û bi cezbe kewenê.  
(notê M. Emîn Bozarslanî)

45 Wa bi wucûd û mewcûd **fena fillah** bibo  
Wa bi na rindekiye **beqa billah** bibo"

Înan kerdêne hende şîret û nesîhet  
Ancî zerrîya Zîne nêbîyêne rehet

Eksê şîret û nesîhetî, eksê **pendan**  
Dahîna zêde kewtêne bela û bendan

Eşq adiro sûr o, pufkerdiş o nesîhet  
Sirr zî perde yo, lomekerdiş o fezîhet

Çende ke a pepûke rê vatêne înan  
Hende zîyade ra Zîne bîyêne poşman

50 Hesiran nêdayêne çimanê ci firset  
Ax û waxî nêdayêne fekê ci muhlet

Nêameyêne dest ra qet mijulîyayiş  
Ne vînayiş û dîyîş, ne zî ewnîyayiş

Şîretkaran ewnîya ke waiz û şîret  
Fayde û tesîrê ci nêkeno qet û qet

---

**fena fillah:** keso ke mewcûdîyetê Homayî de çin û fanî bîyo (notê M. Emîn Bozarlanî)

**beqa billah:** keso ke her çî de pîlîya Homayî vînenê û bi Homayî beno nemir (notê M. Emîn Bozarlanî)

**pend:** nesîhet, şîret

Pêro şaş û mat mendî ke Zîna delale  
Çi ser-sebeb ra hende kena nalenale

Înan winî texmîn berdêne ser ke Zîne  
Seba Sitî ra bîya wayira birîne

55 Ewnîyayî ke qalê xo kewtê vayî ver  
Birna veng û vaj înan, wuriştî payî ser



**HEMDERDÎYA ZÎNE BI XEMAN  
BI SEBEBÊ NÎFAQ Û BÊÎTÎMADÎYA HEMDEMAN**



Zîne mende tenya xeman reyde bîye çut  
Xemî ameyî pêser, înan rê wina vat:

“Ey dost û hevalê kesanê perîşanan  
Şima yê, umîd û deyxê derdgiranan

Şima yê, hemderdê zerrîya ma derdinan  
Şima yê, hemperdeyê sirrê ma rebenan

Şima yê, hemrazê zerrîya dilbirînan  
Şima yê, doşek û balişnaya xeminan

5 Seba veyşanan hemkaseyê sifreyî yê  
Seba derdinan zî hemşûşeyî meyî yê

Sewdaserî bi şima resenê cemalî  
Rayirwanî bi şima resenê celalî

Na zerrîya wêrane bîya xir û xalî  
Bê şima kes nêperseno hal û hewalî

Bi çi hawa ke seba xo rê kenê mamûr  
Şima bi keyfê xo yê, Zîne dayo destûr

Dewlemendîye bi şima wa, na dinya de  
Sereberzîye bi şima wa, a dinya de

10 Mi rê xemî lazim ê, xemî wefadar ê  
Caran nêvanê nê tal ê yan cefadar ê

Xemî tenya nêverdanê roja reşe de  
Keyfî yenê dîyar tenya roja weşe de

Her di cîhanî pîya, dinya û axîret  
Xemwerîye nêbo, çin o tede tu qîymet

Yanî bi şima beno weş û keyfweş no dil  
Bê xiznaya şima ci ra çi beno hasil!"



## HÊRSINÎYA ZÎNE SEBA SITÎYA PERÎYE RÎYÊ AYE RA SÎTEMKARÎYA ZÎNA HORÎYE



Zîna horîye arde verê çimî Sîfî  
A perîye rê nê çend qiseyê xo vatî:

“Ey ti ya ke seba zerrîya Zîne can a  
Qey dîyar û dîyişî roşnîya çiman a

Ti ya Zîne rê hemcefa, hemkeyf, hemderman  
Ti ya Zîne rê hemeste, hemposte, hemcan

Ti ya Zîne rê hemşîre, hemcîhet, **hemser**  
Ti ya Zîne rê hempîze, hemhalîn, hemper

5 Ti ya **teb’ê** xo bi teb’ê Zîne mutabîq  
La bextê xo bi bextê Zîne namuwafîq

Bext to de bîyo yar, hezar û hezar şukir  
Heqî dayo to, to ke waştö bi çi tewir

---

**hemser:** tîya de manaya xo dost û yar  
**teb’:** xû, tebîet, mîzac

Hezar û hezar şukir ke bî weş bextê to  
Talih geyra û berz ra ronîya textê to

Bextê Zîne gerçî, zaf zêde ra reş ame  
La no qismet pê ci zaf zêde ra weş ame

Parekerdişê xeman qey Zîne ra bîyo  
Teqdirê Homayî yo, qeder wina bîyo

10 Şayîye seba Sitî, xemî seba Zîne  
Tacdîn seba Sitî yo, Mem zî seba Zîne

Seba ke xem bi rî û sûretê Memî yo  
Semedê Zîne zî xem **domdarê** xemî yo"

---

**domdar:** xelef, camgirewtox, çîyo ke yew çî teqîb keno û ey dima  
yeno



**FINDA HEMRAZE DIR QISEYKERDIŞÊ ZÎNE  
TIM HESIRÊ GONINÎ RIŞNAYENE**



Zîne ge-ge finde xo rê kerdêne demsaz:  
“Ey dost û yar, ey hemwar, ey embaz, ey hemraz

Her çiqas ke kile de veyşena ti sey mi  
Labelê vengê xo nêvejena ti sey mi

Eke to zî sey mi xeberî bidayêne  
Zerrîya Zîne do hende nêveyşayêne

Mabeynê derdê min û to de zêde yo ferq  
Ti nê ferqî bipersê; xerb ra hetanî şerq

5 Rojhelat ti ya, û adirê to zahir o  
Rojawan ez a, û yê mi zere adir o

Yê mi tim û tim veyşenê damarê canî  
Yê to teba nêveyşeno, xêncê ziwani

Kile sereyî ser ra ya, zerrî de **piling**  
Canê Zîne pilingî reyde kewto bi ceng

---

**piling:** tîya de manya “kozir”î de



Şewleyêk sereyê to ser ra ho aseno  
Eşqêko bêser û ber ho ci ra vareno

Bêguman o şewle semedê to ra ziwan  
Bêguman, na kile semedê mi ra zîyan

10 Kila zerrî tesîr kerdo bi sereyî ser  
Û bêçare mendo vayo reş hukmê ci ver

Gerçî ti tena bişewe manena hişyar  
Sipêde ra şona hewn a hetanî **êvar**

Hem bişewe hem biroj, hem şewdir hem zî şan  
Zîne veşena wina, her dem û her zeman"

---

**êvar:** şan



**ŞALULÎYA ZÎNE PERWANEYÎ REYRA  
PERWANEYÎYA AYE DÎWANEYÎ REYRA**



Zerrîya xo ya birîndare dest ra Zîne  
Canê weşî ra biyêne bêzar ge-gane

Endîşe nêkerdêne adirê xeman ra  
Perwane kerdêne embaz, seba deman ra:

“Ey mîrçikê halînê hesret û hîcranî  
Ey bilbilê baxê veşayeyê wêranî

Ey delîlê sewdaseranê raştikên  
Ey betalkerdoxê dozanê qestikên

5 Merdene bexş kenê canê xo erjan-erjan  
La demê mergî de lerzenê, lerzan-lerzan

Nêqefilîyenê bi vayê heskerdene  
Naşî w nezan ê, wazenê merg û merdene

O lez û ecele to rê qisûro pîl o  
O recif û lertzayiş zî uziro pîl o

Qet nêvindenê ti, bêtebat ê, bêsebir  
O rîwal ra hema xo erzenê bi adir

Naşîyê şermo giran, eybo tamam o  
Kamilî kesê naşîyî rê vanê 'xam o'

10 Qey kesê kamilî veyşenê bi çi caran  
Çi caran benê mergdar bi nûr û adiran?

Gane manenê kamilî sey **semenderan**  
Beno canêko şewledar bedênê înan"

Zîna sey ferîşteyan, Zîna nûraniye  
Zîna ke duştê rojî de aşma sipîye

Nêverda ne erd, ne zî asmên ra yew hurdî  
Şîye verê ci, hemîne ra vatî derdî

Eger ke bibîyêne kesê xerezkarî  
Dûrî vindertêne, çarnayêne ci ra rî

15 Endîşe kerdêne aye, îns û canan ra  
Sirrê xo vatêne seba bêziwanan ra

Behro ke ginaybî piro, behrê xemî bî  
Neqîşê dil û canî, xeyalê Memî bî

---

**semendere:** 1.yew heywana sey gumgumokan a 2.yew candara sanikan a, bawerîya verênan gore adir de nêveysaya, bi no qayde vera êş û dejan de bîya sembolê xo pêt girewtîşî. (notê M. Emîn Bozarlanî)



**MECNÛNÎYA MEMÎ EŞQÊ LEYLA RA  
WAMIQÎYA EY DİRDÊ EZRA RA**



Mem zî bi xeyal û xêcelê rîyê Zîne  
Yanî bi arzûya dîyîşê a canane

Tede nêmendbî hiş seraser bîbî sewda  
Bibî mecnûnê mecnûnan, bengîn û şeyda

Sere de zor berdbî hişdarîye dehşetî  
Zere de zor berdbî hîsdarîye wehşetî

Ne eşkayêne webigêro barê kulan  
Ne zî eşkayêne bigeyro baxê gulan

5 Wexto ke nêbî mirad, dûrî mend Zîne ra  
Nizdîyê rehetîye, dejê birîne ra

Seke di merdimê bêçareyê teyšanî  
Qey fira awe bibê kesê perîşanî

Xafil ra cor de bivarno rîyê ezmanî  
Awa zeng-zelala serçimeyê cuyanî

Yewer bişimo bigêro miradê zerrî  
Oyo bîn teyšan bimano eynî sey verî

Teyşanêk verê xo bido cuya daîmî  
Teyşano bîn zî bimiro hele û gamî

10 Tacdînî girewt miradê xo, bi zerrîşa  
Mem xem û kederî rê mend, adir de veşa

Derd û xeman dest ra nêbîbî sere-asan  
Qet sebrê ci nêameyêne bi çî kesan

Cayêk de nêbîyêne rehet zereyê xo  
Qet bi kesêk nêbîyêne îdareyê xo

Wexto ke şîyêne bi huzbarê mîreyî  
Seke lingî girêdayê bi reseneyî

Tim û daîm bi nalayiş, bi ax û waxî  
Adir verdayêne bi seray û qonaxî

15 Çî wexto ke bişîyêne leyê Tacdînî  
Memo pepûk bi dilê xo yê dirbetinî

Nêşayêne bikero îdare û suhbet  
Nêşayêne bikero sebir û muhabet



## MUXATABÎYA MEMÎ BI ÇEMÊ CIZÎRE QALÊ EY SEBA SEWDAYA BÊNEZÎRE



Bajar ra dûrî kewtêne bi neçarîye  
Royê Cizîre dir kerdêne hemserîye:

“Ey ti yê ke sey hesiranê mi rewan ê  
Bêsebir û bêsebat ê, sey aşiqan ê

Caran nêvindenê, çin o to rê vindertiş  
Yan sey mi to zî kerdo vindî aqil û hiş?

Bincaran çin o semedê to ra qerarêk  
Bêguman zerrîya to de zî esta yarêk

5 Ecêba ti çi çi anê vîrê xo her dem,  
Kaleka Cizîre de çira benê sersem?

No bajar ke yar o to rê, ci ra hes kenê  
Bîyo miradê to, senî ke ti wazenê

Tim û daîm hê zerrîya to de xaneyî  
Destê to ho gerdênî ser o, sey **nuşteyî**

---

**nuşte:** hemayil, musqa

Qet nêtersenê Heqî ra, nêkenê fikar  
Şukir nêkenê her roje, hezar bi hezar

Hende kenê hewar û gazîye, nalenê  
Çemo, ti êdî Homayî ra çi wazenê!

10 Çi riwal ra bîlasebeb ti kenê feryad,  
Çira eware eware ti şonê Bexdad?

Eger ez bibermî yan bikerî nalenal  
Eger ez bimirî yan bikerî kalekal

Mem se bikero ey rê eyb nîyo, rewa yo  
Çîyêko maqul zî semedê ey fena yo

Bîye zerrîya Memî ro ti derbaz bibe  
Ti serçimeyê çimê ey de nîya bide

Çira derdê zerrîya ey mendo bêderman,  
Qey hesirê ey herikîyenê sey çeman?

15 Ey aqil pernayo, êdî dîwane yo Mem  
Xo dest ra vejîyayo êdî Dicle yo Mem

Hem Westanî de, hem Nêrgizî û Seqlan de  
Hem Derwaze de, hem Omerî û Meydan de

Ti nê cayan de her tim kenê seyr û seyran  
Memî zî verê xo dayo bi yaz û yaban



## QISEYKERDIŞÊ MEMÎ VAYÎ REYDE HEWADARÎYA EY HEWAYÎ REYDE



Ge-gane qisey kerdêne **sebayî** reyde  
Bîyêne embaz û hêmderd hewayî reyde:

“Ey cîsimo letîfo sey nefesê canî  
Verê to de akerde yo, berê bedenî

Ez hêvî û umîd kena ti bê vindertiş  
Biney dejnenê lînganê xo bê nazkerdiş

Dê ti xo bierze **suxbera seadetî**  
Verê a dara **Sîdre**, aya nîhayetî

5 Ewilî şo û maçî bike a **suxbere**  
Dima bivejîye huzbarê a dîlbera

---

**seba:** Vayo honik ke corê rojhelatî ra yeno. Xeylê sewdaseran û hozanan sey çimeyê îlhamî dîyo, ci rê vato ke arzûyanê ma bibere biresne yare; bi no tewir no va bîyo nişanê sewda. (notê M. Emîn Bozarlanî)

**suxbera seadetî:** Şêmûga bextewariye. Zîne qest bena.

**Sîdre:** Dara riyê asmênî ya. Wexto ke pêxember şîyo mîrac, verê na dare de Homayî dir qisey kerdo. Seba ke tu mexlûqî na dare nêdîya û nêeşkayo bivîno, coka ci ra vato “Dara Sîdre ya peynîye”. (notê M. Emîn Bozarlanî)



La bi zerrînzîzmîye, bi hurmetkarîye  
Hezar mertebe bi rêz, bi rûmetdarîye

Duayan bike aye rê giran û giran  
Qet ci rê teksîr meke goynayîş û pesnan

Hurmeto pîl nîşan bide, bike îhtîram  
Destan verê xo de bibeste, bide selam

Badê aver bierzîye, lezgîn û çapik  
Wa zerrîteng nêbo, o teb'ê xo yo nazik

10 No name ke **hubrê** xo gonîya zerrî ya  
No rîpel ke bîbika çîmanê Memî ya

Verê cemalê ci ra meleqne perdeyî  
Tenya bide destê ci, nê waştîşnameyî

Bincaran surrê xo meverde bi **nîqabî**  
Wexto ke a yare wanena nê kitabî

Terefê mi ra bivaje; banûşaha mi  
Terefê mi ra bivaje; qiblegaha mi

Çîmkî nûrê Heqî ra ya ti, bêemsal a  
Çîmeyê Kewserî ra ya, zeng û zelal a

---

**hubr:** murekeb

**nîqab:** perdeyo tenik ke cinî sey peçe ancenê rîyê xo ser

15 Çimkî ti dîyarkera ruhê Îlahî ya  
Mem xizan û parsek, ti sey banûşahî ya

Ti bibe kesa rast û edaletperwere  
Derheqê ey de bivaje xebera xeyre

Bi ê çiman, êyê ke dost ê, êyê ke yar  
Ge-gane zerrîya Memî de bibe dîyar

No toreyo qedîm o, qey hukimdarên ra  
Bi no hawa ewnîyenê gunekaran ra

Willayî guneyanê xo Mem nêzaneno  
La yew zerrîya ci estbîye, o zaneno

20 A zerrî perîyan ey ra berda, remnaya  
Xeylê wext o ke tede nîya, abirnaya

Hîna ke ey reyra bîye, nêberdbî kesî  
Wayira sewda bîye, wayira hewesî

Belkî qusîrin bîye, belkî kerdbî îsyân  
Labelê bi qisûr aferîyayo însan

Zêde yê sucê xo, hezar reyî suçdar a  
La versîya porê to aye rê sitar a

Eke ti qehir bikerê, ci rê rewya yo  
Eke efû bikerê, lutfêko hêca yo

25 Bi no qayde bivaje vayo, bike leze  
Keleyê xo bibirne erd ro, biwerize

Ey vayê sebayî, ti bi Xizirî kenê  
Wexto ke leyê a yare ra peyser yenê

Xo vîr ra meke biney herre o mekan ra  
Bîya ti xo reyde, ez kena xo çiman ra

Herra ê dergeyî mîsalê **tûtîya** ya  
Bigê bîya xo reyde, mîsalê kîmya ya”

---

**tûtîya:** Yew dermanê dejê çiman bîyo. Kurdkî de bîyo sembolê çiyê zaf hêcayî ke peyda nêbeno. Mesela, vanê “Filan çî bîyo tûtîya, peyda nêbeno.” (notê M. Emîn Bozarlanî)



**MUCADELEYÊ MEMÎ DILÊ KULÎ REYDE  
CENGÊ PERWANEYÎ BILBILÎ REYDE**



Memî ge-ge girewtêne xo ver dilo jar:  
"Ey xayîno bêbext û rezîlo şermezar

Ça yo o ad û wad, ça yo o soz û peyman  
Ça yo o qewl û qerar, ça yo sondo giran!

To vatêne, to reyde keso sadiq a ez  
To vatêne, to reyde tim muwafiq a ez

Vatêne, to reyde nîmeyê dilî ya ez  
Vatêne ke wayirê tehemulî ya ez

5 Wele to ro bo ke, êyê wefayî nîyê  
Çin o to de deyax, êyê cefayî nîyê

Sextekar û zexel ê, zerrî ra neyar ê  
Hilekar û çepel ê, zêde ra mirdar ê

Tî, ey tufîyo musayeyê şîrinîye  
Tî, ey tuto musayeyê nazenîniye

Oxro ke ti yarê rojanê weşan bîyê  
Oxro ke ti **qelpê** rojanê reşan biyê

Dilo, senî însaf o ke ti nê bedenî  
Teriknenê şonê, tenya verdenê tenî

10 Cano sey bilbilî, kewto hepisê tenî  
Mendo bi sereyê xo tenya sey **Bêjen**

No senî însaf o ke teriknenê canî  
Berî ser o ca danê sey heps û zindanî

Sirro ke to reyra yo, feyzê canî ra yo  
Şewleyê erdî zî rîyê asmênî ra yo

Meşo ti wina bê çilaya canî, dilo  
Rayir nêzanenê, her ca tarî yo, lêl o

Yare seba to meqsed û mirad a eke  
Canî mîyan de nimate ya a rindeke

15 Çimkî ti, ey dil, yew nimûneyê zatî yê  
Çimkî ti, eynaya sûretê sifetî yê

Mekewe keyf û kayî dima, eman yeman  
To ra hêvî û umîdê xo nêbirno can

---

**qelp:** sexte, çîyo ke eslî nîyo

**Bêjen:** Pehlîwanêko mîtolojîk o, warizayê Rustemê Zalî yo. Diş-  
menan o qefîlnayo eşto bîr. (notê M. Emîn Bozarlanî)

No şîyayîşê to beno **xaricîtiye**  
Terkkerdişê to zî beno **rafizîtiye**

Xaric mebe ci ra, seba ke bibê daxil  
Terkê canî meke, seba ke bibê wasil

Rafizîtiye meke, ti dil ra sunnî yê  
Çi yo no halê to, qey nê canî ra nîyê!

20 Winî bike ke, bibê ewlado wefadar  
Merdimanê kamilan ra bibe hayîdar

Her çiqas ke ti şîyê verê berê doste  
A ha mi het de, uca de yo tenya poste

Beşna ke to sînaya, to rê dar û sêdar  
Poro ke to çîvnayo, la û mergo xedar

Cezbo ke to remnayo, leyê ci de yo can  
Arizî yo, sirro ke ci rê benê qurban

Bawerîya xo meya bi bisk û birûyan  
Talan kenê dilê to mîsalê **hindûyan**

---

**xaricîtiye:** Mîyanê musulmanan de mezhebo ke sey yew hereketê siyasî seserra yewine ya Hicrî de vejîya meydan, û o wext ra nat, bi şeklê cîya-cîya dewam kenê.

**rafizîtiye:** sey çekuye yena manaya "terkkerdox, cîyabîyayox, ca-verdayox", la manaya sosyalî de, heme grûbanê xaricîyan û umûmen mezhebê sey îmamîye, îsna'eşerîye, batinîye û gulat-i şîa ra yeno vatiş

**hindû:** Şarê Hindîstanî. Tîya de bisk û birûyê yare qest benê. Çimkî zamanê verî hindûyî bi talankarî û şelênayîş şinasîyayê, coka sewdaseran bisk û birûyê yare şibênayê hindûyan û vato sey hindûyan zerrîya sewdaseran talan kenê. (notê M. Emîn Bozarslanî)

25 Caran mebe pabendeyê torê gilayan  
Caran mebe sersemê kemanê birûyan

Gerçî ti Îbrahîm Xelîl ê, ey belakêş  
Gulîstanî to rê benê adir û **atêş**

Mîsalê to ra bi se hezaran bilbilî  
Bikerê fîxan, kêmi mekerê wilwilî

Mîsalê perperikan ver bi gul û vilan  
Ke her tim veşenê bi dax û derd û kulan

Dilo ti kewtê verê hewa û hewesî  
To nîyet ardo bi keyf û kay û reqesî

30 Labelê ez hekîmê eşqê sadiqî ra  
Xeberdar a qey to, çîyê muwafiqî ra

Parêz o çîyo cazib o seba dilî ra  
Teqwa ya, çîyo weş o hetê ekilî ra

Çîyo ke eks û muxalifê hewayî yo  
O bi xo derman o to rê, sey şîfayî yo

Mi pers kerdo Hekîm Loqmanî ra bêguman  
Xisûsiyetê şerbetan û yê loquman

---

**atêş:** adir, na çeku fariskî ya, fariskî ra dekweta tirkî

Çîyo ke şîrin û şerbet o, dej û jan o  
Çîyo ke tal û cal o, daru û derman o”

35 Hende ke tedir qîsey kerd û vajirîya  
Dilê dilî ci rê veşa û kizirîya

Kelegermê **suweyda** ra dûman bî peyda  
Girewt xo ver ca û mekanê eşq û sewda

Xo da teber dilê ci ra dû û dûmanî  
Bîyî sîya sereyê ci de mezg û vînî

Eynaya xeyalî bîbî tarî, lêl û boz  
Eynaya aqilî girewtbî gemar û toz

Seke hewrêk qîyame ro vejîya bi ser  
Rîyê asmênî de kom bî û ame pêser

40 Xorînîya cîgeranê ci ra ê hewrî  
Gonî verdayêne çîman ser sey laserî

Laserê cîgeran zêde ra, gurr ra ame  
Seke çemê Arasî ser ra, **Kur** ra ame

Welhasilî kelam, derd û kulê dilî ra  
Laserêko gurr bîyêne berz, ey milî ra

Çemê Ereban û Ferat û Amuderya  
To vatêne rabîyê heme hîrê pîya

---

**suweyda:** merkez qelbî, heme damarê qelbî a noqta de resenê pê  
**Kur:** Çemê Kur/Kura. Mintiqaya Serhedî de çemêk



Gerçî hesiranê çîmanê Memê jarî  
Kerdbî kewe verê çemî de sipîndarî

45 Çolistan seraser heme bîbî bax-bostan  
Qerax seraser heme bîbî gul-gulîstan

Ê jarê bêdilî uca de mekan girewt  
Ê bilbilî uca xo rê **aşîyan** girewt

Dilê ê bilbilî bi hewa bî, bi hewes  
Coka beden ci rê bîbî zindan û qefes

Çi ke estê perr û baskê ci, şikîyaybî  
Heme xêz û xetê rîyê ci rişîyaybî

Beşna Memî ya sey daranê senawberan  
Qulûz bîbî mîsalê daranê 'er'eran

50 Rîyê ci yo ke verî ra tern û ciwan bî  
Bîbî zerd-zimêleq, sey rîyê merdeyan bî

Eynaya rîyî bîbî yê zeng û zengarî  
Neqîşê sey **Erjengî** bîbî ting û tarî

Eşqî kerdbî nêweş, tede nêverdabî hal  
Xo dest ra vetbî sewda, verdabî bêmecal

---

**aşîyan:** halîn

**Erjeng:** Eserê Manî (216-276) pêxemberî yo meşhûr ke bi resimanê  
weşikan xemilnayo.

Alişkan de nêmendbî, ne gonî ne rengêk  
Nêginayêne ver ro, ne qisa ne vengêk

Destpêk ra çemî ver de nêweş û bêhal kewt  
Tam çewres rojî sey cesedî bêmecal kewt

SS Aqil û fikir û şîûrê însanan ra  
Hîs û hereket û qewetê heywanan ra

Qetîyen nêmendbî ci ra nişanêk rêçêk  
Memê pepûkî ra hendê hurdiyê xîçêk



**ŞİYAYİŞÊ MÎR ZEYDÎNÎ BI SEYD Û NÊÇÎRAN  
AZADÎYA MEMÎ Û ZÎNE BI ŞIKÎYAYİŞÊ ZINCÎRAN**



Seydwanê seydê rindekîya hedîseyan  
Hal û hewal bi no qayde ma rê kerd eyan

Vat: Rojêka weşe, bi mewsim û bi eyam  
Dewrê felekî yo teng, hinî bîbî tamam

Viraşttoxê alemî bi karê qudretî  
Rîyê erdê şiyayî kerdbî sey cenetî

Sey xemilkaran dinyaya kokima kane  
Kerdbî sey veyvekêka newîya ciwane

5 Cêvî-cerdeyî, kef û kaşî, ko û deştî  
Der û dorme bîbî leteyêkê **behiştî**

Baxê cenetî ra bîyî heme baxçeyî  
Awa Kewserî ra bîyî heme çimeyî

Koyan mîsalê Tûrê pêxember Mûsayî  
Şewq dayêne bi nûrê Homa tealayî

---

**behişt:** cenet

Layî, robarî mar bîyî, ejderha bîyî  
Çîyê keweyî sirdar bîyî, **Esa** bîyî

Her dare bi hîr û bereketê wisarî  
Şewle dana bi nûr û cemalê **Wayirî**

10 Her gule manena kelawa koyê Tûrî  
Mîsalê adirê kildarê bêqisûrî

Her teyra serê şewdirî bi xo **Kelîmêk**  
Her tutî û qumrîye mîsalê **nedîmêk**

Her xurmeyêre nîda kerdêne têdima  
Sey a **Dare** vatêne "Ez Homa ya Homa"

Hargûşî, xezalî, ahuyî, heş û vergî  
Zerencî, qanzî, bettî, qulingê mildergî

Kerî bi kerî bîyî koyan û deştan de  
Ref bi ref bîyî cayanê sey behîştan de

15 Yanî goreyê îcabê wext û zemanî  
Fîrset kewtbî dest seba şayî û seyranî

---

**Esa:** Esaya Mûsa pêxemberî

**Wayir:** Reb, Heq, Homa

**Kelîm:** Unwanê Mûsa pêxemberî yo. Yanî "qiseyker", keso ke qisey keno. Seba ke Mûsa pêxemberî koyê Sîna de Homayî dir qiseykerdo, no unwan dîyayo ey. (notê M. Emîn Bozarlanî)

**nedîm:** embazê suhbetî, keso ke tey xoşebere bena

**Dare:** Dara ke Koyê Sîna de verê çîmanê Mûsa pêxemberî de adir girewto.

Wextê ci amebî, bikerê seyr û seyran  
Wurzê şorê nêçîrê xezalan û teyran

Ê mîreyê ke dayêne felekî ferman  
Vat: "Serê şewdirî ra heme şarê Botan

Bibestê sîlehan û gurzan û şimşêran  
Her kes ma reyra bo, seba seyde û nêçîran

Kamo ke hazir nêbo qey seyde û nêçîran  
O do bimiro pê qeyde û bend û zincîran

20 Heme cizîrijan heta destê şewdirî  
Înan baş dî tedarikê seyde û nêçîrî

Fecrî ke ramojna înan rî û elamet  
Ronîya heme bajar de qîr û qîyamet

Egîdan helîyî, baz-başokî akerdî  
Çêran pilingî, tajîyî xo reyde berdî

Merdîm û çarpayî, kutik û cinawirî  
Bajar ra vejîyayî camêrdê cizîrî

Damî, şêr û pilingî, însan û heywanî  
Domanê hurdîyî, arêwan û rezwanî

25 Welhasilî kelim, qebîlaya însanan  
Terikna keye û keyber, bajarê botan

Heme bajarîyan verê xo da seydegeyan  
Zereyê kesî nêveşa pê bêguneyan

Kokê ci ard, heywanê koyî pêro kiştî  
Eştî pêser, mîsalê celeyî kiriştî

Wehş û heşî, xezalî, qaz û sîqulingî  
Kiştî tayê, yê tayênan zî bestî lingî

Canşenikan, genc û rihalan û lezgînan  
Espanan û qehremanan û pehlewanan

30 Cinawirê rîyê erdî dayî şûran ver  
Teyrê asmênê keweyî dayî tîran ver

Ê delalanê semtanê sey şahlewendan  
Ê suwarîyanê wayiranê kemendan

Çoganê destî, bi çanqılan û gopalan  
Eştêne bi vileyê askan û xezalan

Suwarîyanê sey şêran girewtî çekî  
Gonî de verdayî zaf pilingê belekî

Zaf zêde ra xezalî seyd û nêçîr kerdî  
Zaf zêde ra pilingî qeyd û zincîr kerdî

35 Nêeşkayêne xo reyde biyarê înan  
Peyda nêbîyêne ci rê ne ca ne mekan

Êyê kiştêyî xo rê berdî fiqareyan  
Êyê tepîştêyî xo rê berdî mîreyan



**DESTANA BAXÊ CENETÎ YÊ MÎREYAN Û SERDARAN  
KE BÎYO CAYÊ YEWBÎNAN DÎYAYIŞÊ  
HER DI DILDARAN  
Û BÎYO ÇIMEYÊ ROŞNÎYE SEBA HER DI GULÎZARAN**



Baxê Mîr Zeydînî estbî, baxêko weşik  
Baxê Îremî ra çin bî ferqê ci bêşik

Sey koşkanê cenetî darê girdê kûrî  
Sey horîyanê cenetî teyr û tuyûrî

Seba şutişê destan û lingan û çiman  
Awa Kewserî qet teksîr nêkeno Ridwan

Resenê bi meqamê Sîdre selwîyêrî  
Sey ferîşteyan ê sulunê dor û verî

5 Sey Memî bî dilê daranê senewberan  
Eşq ra bîbî parçe parçe beşna 'er'eran

Narinc û turincê xo sey Zîna rebene  
Bîbî zip-zerd bi derdê eşq û sînayene

Sayî, beyî, xurmayî, mirûyê bostanî  
Lewî, çimî, çeneyî, henarê pistanî

Şimşadî, çinarî; yew bîyî qametê xo  
Sîya xo weşik, zêde ra bî hîmetê xo

Sey şûşeyê zerrnênê fek ra dekerdeyî  
Rihan û menfşeyê tezeyê neweyî

10 Merg û çîmenî, velg û vaşî, gul û vilî  
Çemê cenetî, hênîyê sey **Selsebîlî**

Mîsalê xulasayê kitabana, o baxçe  
Sey qisimanê pîlan û qijan, her parçe

Seke bi edeb, edîbêkê munecîmî  
Seraser heme baxçe, mîsalê teqwîmî

Helênaya cîwa; xêz kerdo pê cedwelî  
Awe mird werda, sey gonî sûr kenê gulî

Rihanana û sunbulan girewto der û dor  
Bi rengê înan xemilîyayo cêr û cor

15 Her yewe hukm beyan kerdêne cîya-cîya  
Kerdêne eşkera bexto sipî û sîya

---

**Selsebîlî:** hênîyê cenetî





**XELISÎYAYIŞÊ ZÎNE ZINCÎRANÊ AXYARAN RA  
TENYAYÎ Û QALÊ AYE BI PEL Û DARAN RA**



A ahuya seydgeyê tip û tenatîye  
A banuya qonaxê nasî û dostîye

Sertaca askanê deşta derdan û kulan  
Leya sermesta baxçeyê vilan û gulan

Girêdayîya qeydanê sewdaya hare  
Seyd û nêçîra Memî, Zîna birîndare

Nîya da ke bajar de taxî, heme banî  
Bîyê vik û veng, heme kuçe û kolanî

5 Tenya û xalî yê, heme bax û bostanî  
Bêmerdim û bêperî yê, hewş û eywanî

Zanayêne ke zeman her tim bêeman o  
Vat: "Dê hadê zerrîya mi, ecêb zeman o

Eyam weş o, dê ma xo rê bişorê seyran  
Seyr bikerê dor û ver, helîyan û teyran

Peyda nêbeno min û to rê keso hemderd  
Çimkî zafê merdiman bêxem ê, û bêderd

Ma teyrêk eşnawito, teyrê baxçeyan o  
Sîya yo bextê ci, mîsalê qijeyan o

10 Labelê zar û perîşan o, bêmecal o  
Sermestê rîyê sûrgulan o, zaf bêhal o

Bi rojan nêbirneno feryad û fixanî  
Şewa tariye de weno gonîya canî

Her tim feryad û fixan o yê ey, wilwil o  
O hemvengê min o, nameyê ci bilbil o

Hal û hewal ra fam keno, hemderdo rast o  
Dermanêkê derdê mi verê ey de esto

Zerrîya mi, dê ma bişorê pinanî ra  
Hîna ke nêbîyê ma can û cuyanî ra

15 Belkî bi nesîhetan belkî zî bi pendan  
Keno azad ma, akeno qeydan û bendan”

Nê qiseyî zerrîya xo rê vatî aye  
Herikîyaye zereyê baxî sey vaye

Kes bi aye nêbî hayîdar û xeberdar  
Ne dadike, ne xalayike, ne xizmetkar

Meqsedê ci ne mey û şerab ne şayîye  
Arzûyê ci biney xelwet û tenyayîye

A perîye ameybî uca ke o mehal  
Xeman ver mirdîya xo bikero nalenal

20 Her alale sîneyî ser o bîye daxêk  
Her tolebisk bi veşnayene bî çiraxêk

Darî can û bedenî rê bîyî sey barî  
Gulhenarî zerrî rê sey adirê harî

Tenya ke mende, yew kerra girewte erd ra  
Destê ci de bîye sey zengilî a kerra

Ge-ge dayêne sîneyê sey mermerî ro  
Adir ginayêne dilê dar û berî ro

Wexto ke ewnîyayêne awa çeman ra  
Awa gonine şîyêne her di çiman ra

25 Baxçe bî cayê eşq û sewdaya bilbilî  
Bi gulawanê çiman awe dayî gulî

Beşna ke sey senewberan a, bi rastîye  
Rîyo ke sey tîja rojî yo, bi roştîye

Sey koneyî dayêne piro, kuwtêne erd  
Sey kermeyî dusnayêne pêra, toz û gerd

Herre "ax" kerdêne, kemerî nalayêne  
Daran "wax" kerdêne, pel û gil kalayêne

"Ya hû" vatêne tim û tim, derdê dilî ver  
Eynaya felekî kerdêne sîya û qer

30 Milçewt kerdî bi rengê xo, heme sûrgulî  
Bêveng kerdî bi vengê xo, heme bilbilî

Bilbilî nêşayêne tede bibê hemveng  
Sûrgulî nêşayêne tede bibê hemreng

Zereyê baxçeyî de xeylê wext geyraye  
Derdê zerrî gulanê zerdan ra vat aye:

"Ey şimayê ke sey aşiqan vurîyayê  
Sey Zîne bîyê zipîzerd, permilîyayê

Pelê şima se nîyê, hezar bi hezar ê,  
Çira şima zerd û zeîf û wina jar ê?

35 Ecêba şima zî sey mi mendê bê Memî,  
Ecêba coka sey mi bîyê xerqê xemî?

Bilbilî bi gulanê sûran benê meşxûl  
Şima zî sey Zîne mendê tenya û melûl

---

**Ya hû:** Ey o, manaya ferhengî de "ey o" ya la sey çeku bîya yew çekuya derwêşan û sofîyan. Wexto ke ê zikir kenê û kewenê tewhîd, veng danê Heqî û vanê "Ya hû", yanî "Ey o; ey Heq. (notê M. Emîn Bozarslanî)

Coka wina nêweş, zêde ra kederdar ê  
Coka wina hezîn, sîne ra birîndar ê

Semedê mi ra delîkêko baş ê şima  
Çin o mabeyn de ferq, eynî yo hewalê ma

Yew waya mi estbîye, eynî sey sûrgulêk  
Resaye miradê xo, dî xo rê bilbilêk

40 Aye verdayo mi rê bilbil û şalûlêk  
Mehrûm û perîşanêk, pepûk û melûlêk

Ez zî menda perîşan û bîya ehlê derd  
Bi hesreta ê bilbilî, bîya zipîzerd

Alişkê min ê sim-sûrê erxewanî  
Bîyê zipîzerd, sey pûşê wextê hamnanî

Bi arzuyê zerrî reyêk ey bivînî ez  
Ax û wax nêkena, Xizir bo ke hinî ez”



## XIZIRO KE BEXTÎ KENO WEŞ Û TENGE DE RESENO HÎS DEKENO ZEREYÊ MEMÎ KE ŞORO YARE BIVÎNO



Her çîyo ke qewimîyéno, çi xeyr çi şer  
Bê hîskerdene nêbeno û nêşono ser

Eke biresê yewbînan waştî û yarî  
Bê hîskerdîş peyda nêbenê wext û warî

O hîskerdîş pêro îşaret û nîşan o  
Belkî zî bi destê Xizirê Kalî beno

Vana o wext to rê zerrîya bêtebate  
Dê game na game, saete na saete

5 O deryayo xorîn, koyo vewrino giran  
Oyo ke sewda dest ra bîyo per-perîşan

Yanî Memo nêweşo reben û bêmecal  
Oyo ke helîyayo, tede nêmendo hal

Roja ke bajar teriknabî şarî pêro  
Sewdaya xeyalê Zîne ameye piro

Memo ke kewto derdê eşqê giranî ver  
Bê nêweşîye kewto halê yemanî ver

Yew xelxeleyî girewt xo ver, dilo xemgîn  
Nêbîyêne keye de teselî û teskîn

10 Xo nêgirewt Memî, vejîya teber ber ro  
O hîsê Xizirî bî, ame gina ver ro

Derey Xizir çi bî? Şewqê zerrîya bele  
Derey, o şewq çi bî? Eşqê zerrîya bele

A zerrîya bele Memî rê bîye rayber  
Kaş kerd xo dima o pepûk, girewt berd aver

A Zîna şewanê girananê tarîyan  
Zîna feryad û fixanan, aya zarîyan

Xizirî rê duayî kerdêne her hême  
Wa bivejîyo biyero waştî, a game

15 Nişka ra dî waştîyo derdwer ho ameyo  
**Nêweşe dî, Îsa pêxember ho ameyo**

Zîna pepûke bi şayî û keyfweşîye  
Kewtî tēmîyan dest û lingî, xo ra şîye

---

**Nêweşe dî, Îsa pêxember ho ameyo:** Çimkî bawerîya Îsa pêxemberî gore, Îsa pêxemberî nêweşî kerdê weş û merdeyî kerdê gane. Ehmedê Xanî tîya de Mem şibênayo Îsa pêxemberî. (notê M. Emîn Bozraslanî)

Sey gulêk mîyanê merge de bêhiş kewte  
Eşqê bilbilî ra dil bî lete bi lete

Vejiya ame Mem, temaşeyê gulan kerd  
Temaşeyê rihanen û yê sunbulan kerd

Ey vat: "Erê gulê, ey gula nazenîne  
Çi wext ra to girewto rengê rîyê Zîne?

20 Ey sunbulê, boya to zaf delal a, zaf weş  
Rihanî to duşt de şeqizîyaye, rîreş

Şima esla emsalê porê yare nîyê  
Bêhaviî û bêhûde yê, û fuzûlî yê

Bilbilo, gerçî ti ehlê hal û halzan ê  
Perwaneyê sûregulanê sey findan ê

Zîna mi sûrgula to ra başêr û geşêr  
Bextê mi bextê to ra xirabêr û reşêr

Bilbil ez a, aqubetê to başîye ser  
Qey nameyê xo vejenê bextreşîye ser?

25 Gule tenya nîya, estê bi se hezaran  
Gulîstanî akenê tim wextê wisaran

Ê waştîyê ke mîsalê înan gelêk bê  
Wazenê horî bê yan wazenê melek bê



Ê nêbenê ser û sebebê kul û derdan  
Çayê ke pê ci girewte yo rîyê erdan

La eger ke yew bo yare, bênimûne bo  
Peyê perdeyan de sey **Enqa** û Zîne bo

Aşiq do bi çi qayde bikero îdare,  
Merg û sebir ra teber çi yo ci rê çare?"

30 Wina vat hewalî ra Memê bêxeberî  
A game dîqetê xo da bi hetê verî

Zîna ke dî sed periyî ci rê xizmetkar  
Horîya ke vistbî dilê ey adiro har

Sey gul û gulsosinan ginaye erdî ser  
Bêhiş kewte tesîrê daruyê sewda ver

A Zîna durra sedefan de nimitîye  
Memê perîşanî ke duştê xo de dîye

Xewirîya ca de, gina verê lingan ro  
Seke resayê selwîyêre, awe û ro

35 Ame wisar, pindikê gulan aşkawîya  
A reste bilbilê xo biyî çut û pîya

---

**Enqa:** Teyrêka mîtolojîk a, tenya sanikan û tayê şîiranê klasîkan de qalê ci beno. (notê M. Emîn Bozraslanî)

Aye vat: "Ecêba no hewn o, yan xeyal o,  
Ecêba hewno rastkên o, yan betal o?"

Hezar xeyalan dima, peynîya peynîyan  
Boya perçeman, boya gerden û gilayan

Zîne ke resnaye verê pîrnika Memî  
Keso merde kerd gane, aye bi temamî

Ame xo ke Mem, ho verê destê Zîne de  
Destê xo yo yew zereyê destê Zîne de

40 Mendî her di xeylî wext têver de kerr û lal  
Ne himayîş ne gimayîş, ne qîsa û qal

Ewilî bi destan kerd îşaret û nîşan  
Dima fekê ci abî, tedir geyra ziwan

Çende qal û qiseyî yewbînan rê vatî  
Hende zerrî û cîgerê yewbînan sotî

Çende şeker û şerbet rişna yewbînan ser  
Hende lewê şîrinî dayî yewbînan ver

Çende têver de qedehî werdî şimitî  
Hende newe ra lewî maçî kerdî litî

45 Çimî, lewî, sîne, vile, gerden û doşî  
Çare, gepî, çene, vinî, peleyê goşî

Zerrî ra wazenê yewbînan, nîyaz kenê  
Ge-gane maçî kenê, ge-ganê gaz kenê

**Kefsatanê** tanîya bedenê yewbînan  
Boye kerdêne pîya gerdenê yewbînan

A Zîna ke bi rîyê xo sey şemayan a  
Bi şewq û şemal wa mîsalê lambayan a

Sey perperikanê şewe, Memî bi zahir  
Can û bedeno şîrin eştêne bi adir

50 Ge-ge bîyêne geş adirê sînayene  
Hinî çî endîşe nêmend semedê Zîne

Her di bi ê halî mendî eyan û beyan  
Ne perde û purde ne zî xêlî û orxan

Zereyê baxî de înan dîye serayêk  
Mîsalê eynaya Cemî, cîhannumayêk

Wuriştî xo ser verê xo da şaneşînan  
Xo da bi hetê erdî, her di nazenînan

Sere ra hîcr û hîcran kerdêne hîkayet  
Newe ra hes û hesret kerdêne rîwayet

55 Ge sey hewran ameyêne piro bermayiş  
Ge sey pindan ameyêne piro huyayiş

**kefsat:** keso ke zaf zêde ra bîyo teyşan

Înan pêsero kerdêne qeza û sunet  
Ferzo ke maçîkerdiş bo; çi yo ke minet!

Her çiqas ke nêmendbî hinî zor û zehmet  
Ancîna kê m nêkerdêne tedbîr qet û qet

Gerçî yewbînan ra hêvîdar, hêvîdarêr  
Ancîna zî zêde nêşîyêne devacêr

Eşqê dilan zaf û zêde bî, qor bi qor bî  
Wusletê înan bi usûl bî, bi sînor bî

60 A sewdaya ke sînorê kemalî ra ya  
A awa ke serçimeyê zelalî ra ya

Helbet zanena usûl û edeb û arî  
Helbet qebûl nêkena pîsî û gemarî

Têhet de waştî û waştîye, bax bostan o  
Ma êdî merdim Xizirî ra çi wazeno!

Bi taybetî ke eşq û sewda bibê serdest  
Bi eşq her di hetî zî bibê mest û sermest

Dahîna çi çî bivajî, nêzanena ez  
**Daha ne söyleyeceğini dilim bilmez**

---

**Daha ne söyleyeceğini dilim bilmez:** Na misra bi tirkî ya, vana:  
"Hîna çi bivajo, ziwanê mi nêzaneno"



SEYD RA AGEYRAYIŞÊ MÎRE Û MÎRZAYAN  
BI MEYÊ WUSLETÎ SERXWEŞÎYA MEM Û ZÎNAN  
WEXTÊ ŞANÎ DE AMEYIŞÊ MÎREYÎ RA  
BÊXEBERÎYA ÎNAN



Ey saqî dê bitepişe mi, **ez bi dest a**  
Nêşimito mey û şerab, la ez sermest a

Wexto ke şimit mey û şerab Mem û Zîne  
Ameyî bi zıwan dirbete û birîne

Gerçî ma sewdaserî heme meyperest ê  
Labelê ma bi meyê "**elest**"î sermest ê

O mey cîya yo, û sey meyê sûrî nîyo  
O mey bi cemalê Wayirê alemî yo

O mey eşq û sewdaya **Yarê Pakzati** yo  
5 O mey meyê gûşeyê baxê sifetî yo

---

**ez bi dest a:** Ez ha kewena, ez ha kewtîşî ser o ya, ez nêşkena xo bigêrî, hema hema kewena. (notê M. Emîn Bozraslanî)

**elest:** No hetê ayetêk ra îşaret o. Tede vajiyeno, gama verêne ke Homayî mexlûqî xuliqnayê, înan ra persayo vato: "Eleste bî Rebbîkum!" Yanî "Qey ez Homayê şima nîya!" Mexlûqanê bawermendan vato: "Belê, ti Homayê ma yê." Înanê ke bawer nêkerdo, vato "Nê, ti Homayê ma nîyê." Bi no hawa çekuya "elest"î bîya nîşanê gama verêna verêne. (notê M. Emîn Bozraslanî)

Saqî bide ey ra qedehêk, Heqî kenê  
Meyo ke vizêr ra ma mîyan ra çarnenê

Her fir û qurta ke ez tehm bikerî ci ra  
Keyfê ci weş o, heta peynîye qey mi ra

Karê "çend" û "senîn"î nîyo, keyfo saf o  
Esrarêko bêxeyal o, û bêtarîf o

Serxweşîya vizêrine daf bikerî ez  
Hewnê şîrinî ra çîman abikerî ez

10 Sey Memî nêbî bêhayî û bêxeber ez  
Wexto ke vejîya ame mîre, lez û bez

Emro mîsalê roje bibo şan û êvar  
Hîna zî halê xo ra ez nêbî xebardar

Zîna hewesê dilê pepûkê bêkesî  
Bigêrî hema binê eba û lîbasî

Mîre vejîya ame bi ordî û esker  
Bi dawul û zurna, bi hayleme û **mehter**

Defî, nefirî, zengilî, tembûr û sazî  
Esparî, peyayî, borîcanê gaz-gazî

---

**Yaro Pakzat:** Heq, Homa, Ellah

**mehter:** Na çekuye "mîhter"ê fariskî ra bedilnîyaya. Çend manayê  
xo estê, yew manaya xo "tîpêkê muzîkî" yo, tîya de meqsed no yo. (notê

15 Her di xezalê pabendeyê eşq û sewda  
Bîyê kerr û lal, nîno înan veng û seda

Qet nêhesîyayî ke o çî zing û ting o  
Qet goşdarî nêkerd ke o çî qayde veng o

Mîreyî vat ke: "Abikerê ê xezalan  
Ling girêdaye veramedê ê şepalan

Verabidê zereyê baxçeyî sey teyran  
Wa her roje seba ma bibo seyr û seyran"

Înanê ke tepîştê xezal û hargûşî  
Ci rê kerdê ca û halîn; verardî, doşî

20 Ardî heme veradayî zereyê rezî  
Senî ke şîwaneyî kenê gêwe pesî

Mîreyî verê xo çarna ro emirberan:  
"Xeberdar bikerê hevalan û hogiran

Ma baxçe de hebêk bikerê îstîrehet  
Nêmendo çokanê ma de qewet û taqet

Ê ameyî verê berê qonaxê pîlî  
Ewnîyayî ke her ca bîyo xir û xalî

Labelê berê teberî û yê zereyî  
Pêro akerde yê, sey **qureyê texteyî**

25 Desinde dekewt zerrîya ci şik û guman  
Zana ke no çiyêk rê îşaret û nîşan

Mîreyo zanaye, arif û seregiran  
Xo da ra binê çengan, Tacdîn û Bekiran

Ard a qesra ke tede bîyî Mem û Zîne  
Goş na ser ke yeno vengo berz û pistîne

Mîre şî ser ke Memê rebenê rebenan  
Paştî daya **balişnayanê bendzernênan**

Anta bi xo ser ê perîşanî ebayêk  
Lêlê şanî yo, ne mûme ne zî çilayêk

30 Mîreyî vat: "Kam o nê wext û zemanî de  
Bê destûr se keno nê ca û mekanî de?"

Senî ke Zîne eşnawit vengo şinasî  
Tavilî xo eşt binê kincan û lîbasî

Cayê xo ra rast nêbî Mem, nê qalî vatî:  
"Nêçîrê to zerrî û cîgera mi sotî

---

**qureyê texteyî:** Qureyê texteyê miradan. Tewirêkê falî yo, yew texteyê taybetî ser o ameyo eştiş, wexto ke çend perrê texteyî akerde bîyê, no nîşanê başîye qebûl bîyo û bawer bîyo ke miradê wayirê falî yeno ca. (notê M. Emîn Bozraslanî

**balişnaya bendzerrnêne:** balişnayê ke bendê ci zerrnên o, pê bendê zerrnhelî ameyo deştiş.



Mîreyê mi, ti zanenê ez nêweş bîya  
Hetanî vizêr zî bêhal û bêhiş bîya

Mi eşnawit ke şar û xelqî bi mîreyî  
Verê xo dayo bi seyde û nêçîrgeyî

35 Sebrê mi nêame bi mitêl û nivînan  
Wurişta xo ser ez bi nê kul û birînan

Neçar menda ez, kerd terkê keye û banî  
Haydarê xo nîya ameya nê mekanî”

Mîreyî vat: “Çin o nêweşan rê şert û qeyd  
La to nê baxçeyî de çi kerd nêçîr û seyde?”

Memî vat: “Ez to rê vajî, ti bike bawer  
Xiziro Kal mi rê bî ardimkar û **yawer**

Mi dîye mîyanê baxçeyî de xezalêk  
Labelê xezale nêbîye a, şepalêk

40 Ahuyêka sipîye bîye, çimê xo reş  
Bisk û birûyê aye sîya, boya xo weş

Por û bisk û perçeman ra **miskê Tatarî**  
Tim û daîm varayêne bi hezar barî

---

**yawer:** ardimkar, destyar

**miskê Tatarî:** Misko ke xezalanê Tatarîstanî ra virazîyeno. No misk zaf maqul bîyo û bi boya xo ya weşe şinasîyayo. (notê M. Emîn Bozraslanî)

Çolistanê Xutenî seraser bibo misk  
Nêkeno porê ci ra yew muye û yew bisk

Her çiqas ke sipî bîye, çimbelek bîye  
La bi nezerê mi horî û melek bîye

Senî ke ti ameyî tîya; pinhan bîye  
Ema ameyîşê to ra ver eyan bîye"

45 Qiseyanê Memî ra fam kerd ke Tacdînî  
Zîne ameya het bi dizdî û pinhanî

Tacdînî vat: "Goş medê ci, Mem budela yo  
Xo ver ra qisey keno, ey aqil pernayo"

Qala Tacdînî ser o êdî nêşîyî ser  
Bîyî arê giregirî, ameyî pêser

Ronîyayî findî, mey û şerab wazîya  
Meclis û dîwanêko şehane ronîya



## WURIŞTIŞÊ TACDÎNÎ DÎWANÊ Ê DEMÎ RA VEŞNAYIŞÊ BAN Û KEYEYÎ RAYIRÊ MEMÎ RA



Tacdîn ewnîya ke meclis zêde ra weş o  
Keyf û kelebut o, werdiş û şimitiş o

Tenya Mem tengezar o, zêde ra melûl o  
Hetê ey ser kaş bî, vat: "Bira no çi hal o?"

Bi remz û tarîf persa, fek anêkerd ema  
Memî cewab da ci, bi îşaret û îma

Destê xo peyser kaş kerd huçikê eba ra  
Çiyêko ecayîb nîşan da û mojna ra

5 Tacdînî dî di gilayê miskê tatarî  
Sey **şahmarê** seremûrayin û tacdarî

Pilosîyayê têro pistanê Memî de  
Mem zî mendo mîyanê heybet û xemî de

Zana ke zêde ra xirab o hal û hewal  
Wurişt şi keye Tacdîn, tavilî û derhal

---

**şahmar:** şahê maran

Wexto ke bi xezeb kutkutna ber û keyberî  
Sîtî hema şik berd çiyêkê ecêbî ser

Aye vat: "No çi halê to yo, ey **Tehemtan**  
Çi yo no ecele, ça yo neyar û dişmen?"

10 Vat: "Biwurize Sîtî, wext mi ser o teng o  
Ewro yê ma û nê keyeyî şer û ceng o

Tutê xo xelas bike, terk bike keyeyî  
Keye yê min o, bigê verê xo gedeyî

Sermayeyê cuye, sermayeyê weşîye  
Yanî Memo û Zîne bi dilgiranîye

Mendê alange de pîya, halê xo yeman  
Qesdê mi o yo ke ez bixelisnî înan

El-alem tefêneno adirî bi awe  
La ez do bifênî bi adirî awe"

15 Sey zerdeştîyan keye da bi adirî ver  
Qet vengê xo nêkerd, dest da fekê zerrî ser

Wexto ke kile girewt xo ver keye û ban  
A game gina piro hayleme û fixan

---

**Tehemtan:** Mêrxas, qehreman, egîd. Tehemtan, unwanêkê Rus-  
temê Zalî bîyo. (notê M. Emîn Bozraslanî)

Heme qewm û qebîlayî, êl û eşîrî  
Erzîyayî seba weberdişê adirî

Xebere ke girewte mîre û xulaman  
Xalî kerdî înan qonax, meclis û dîwan

Ê ke erzîyayî qey gazî û hewarî  
Yara xo rê wina vat Memê gumanbarî:

20 "To dî la, Tacdînî bi çî qayde eda kerd  
Mûsayî ma rê deryayê xeman ziwa kerd

Ti şore herema seraye, dê hadê lez  
Xo resnena hewarê ey, nika hema ez"

Zîne wurişte û şîye xelwetê xasî  
Yê Tacdînî nêmend ne cilî ne pelasî

Cil û cor, çîyê erjayeyî, defînayî  
Mal û milk, durr û sîm û zerrnî, xizînayî

Pêro semedê birayî dayî sotene  
Coka name bi hewlîye yeno vatene

25 Mebe bengînê malî ey merdimo **namweş**  
Bengînîya ci to kena kesêko beleş

Seba mal û milkî mebe beqçî û haris  
Çimkî to dest ra gêno mîraswer û waris

---

**namweş:** keso ke nameyê xo weşîye ser vila biyo

Arêdayişê ci to rê barê zehmetî  
Terkkerdişê ci to rê adirê hesretî

A roja ke ti şonê huzurê Homayî  
Destê to de çin benê mal û xizînayî

A dinyaya ebedîya weşê, o cenet  
Ey mufliso ke wazeno bigêro axret

30 Uca nêkeweno to dest rehet û asan  
Do bivajê tîya nîyo cayê muflisan

Usûlê ci maneno usûlê cîhanî  
Belaş nêdanê kesî piranêkê nanî

Eke wazenê can bibo rehet û asan  
Bincaran malê xo mede destê warisan

Hîna nêdayo heqê kefenî warisan  
Malê to ser o yewbînan kenê perîşan

Hîna ke weş ê, ti serf bike heme malî  
Bide rayirê emelê weş û delalî

35 Serf bike mal û milk sey Tacdînê comerd  
Xo rê pê bigîre nameyeko ebed

Yan zî pê bigê embazêkê başî xo rê  
Xizînayan ra başêr o, o embaz to rê



**BI AGAHDARKERDIŞÊ DIRÎYAN Û DIŞMENAN  
PÊHESÎYAYIŞÊ MÎREYÎ BI EŞQ Û SEWDAYA  
MEM Û ZÎNAN**



Padîşahê wîlayetê zerrîdarîye  
Seresparê eyaletê sewdaserîye

Wexto ke sitargeyê xo ra vejîyeno  
Textê zerrî de ca beno û ronîşeno

Qet qebûl nêkeno semedê xo perdeyan  
Alaya xo ke kerde eşkera û eyan

O sey şahê estareyanê asmênan o  
**Asmênê çarine** ra şewq û şewle dano

5 Peyê hende qatanê rîyê asmênî ra  
Peyê hende meknanê rîyê erdî ra

Peyê hende unsûran ra, hende hewran ra  
Peyê hende dêsan ra, hende dîwaran ra

---

**asmênê çarine:** Verî însanan bawer kerdêne ke roj tebeqeyê çarine yê asmênî de yo, coka Ehmedê Xanî zî vato "asmênê çarine". (notê M. Emîn Bozraslanî)

Helbet her roje roşnîya xo kena dîyar  
Helbet ma ser o alemî keno şewledar

O şah û sultano ke “eşq” ci rê name yo  
Roj ci rê nîsbetêko tamam, nimûne yo

O zî qet nimate nêmaneno çi caran  
Peyê perdeyan ra beno eyan û beyan

10 Sirr û efsûnê zerrîya Memî û Zîne  
Sazê ke cenenê hewayê sînayene

Hîna ke bêveng bîyî, nêameybî zıwan  
Nêdaybî wayiranê xo zerar û zîyan

Mizrabê zıwanê şar û xelqê fekbazî  
Bêperde ke çiringnayî dawul û sazî

Mem û Zîne ke ne suc o, ne zî guneyî  
Xeberdar kerdî pîl-qijî, gede-gudeyî

Bi fekê xo cenayî zengilî, zinge-zing  
Tingirnayî têlê kîpakîpî, tinge-ting

15 Her di aşiqî; kesê rebenê hezînî  
Şar teyšan, Kerbela de mîsalê Huseynî

Meclis û cematî tim ameyêne pêser  
Qisey kerdêne sewdaya Mem û Zîne ser



Seke ci rê bes nîyo barê serê milan  
Fesadan zî vengê xo kerd berz sey zengilan

Yanî xebera eşqê her di sewdaseran  
Fesad û fuzûlan, hesûd û hîlekaran

Kerde qal û qîlê cematî û meclisan  
Resnaye kesanê gevezeyanê pîsan

20 O Bekiro çimnebar û îblîs û zexel  
Fitnekar û maro sîya, o zerrîçepel

O mirdar zî hal û hewal ra bî xeberdar  
Wurişt cayê xo ra o pîntîno xerezdar

Desinde da piro şî xelwetê mîreyî  
Mîreyî rê kerd behsê hal û meseleyî

Hêrs bî mîre, ame piro halê cînetî  
Bî xerqê deryayanê fikir û heyretî

Awirê xo dayî serê Bekirê pîsî  
Persa vat: "Na xebera xîlafê namûsî

25 Ma do rastîya ci senî eyan bikerê,  
Ma do eslê ci çi tewir beyan bikerê?"

Vat: "Ferman bike mîreyê mi, Memî bîya  
Xelwet de ronîşêne şîma her di pîya

Mem aşîqo sadiq o, bizane baş û qenc  
Memî reyde kaybike ti **kişik** û setrenc

Ti ci ra şert biwaze mîreyê mi '**dilwaz**'  
O wext bewlî beno sîr û heqîqet û raz

Gama ke zor biberê, ey mexlûb bikerê  
'Rast vaje, ti kame sînenê?' vaje ci rê

30 Mem ciwanêko dîlawer o, zerrîsaf o  
Bîlhesa vera to de rast û bêxîlaf o

O sewdaya zerrîya xo nêkeno înkâr  
O sîrre xo semedê to ra keno îqrar

Ey linge ca kerda seba na sînayene  
O do bivajo 'Zerrîya mi kewta Zîne'

Dîma zî ti bi aqil û fam û feraset  
Semedê Memî ra ronane yew sîyaset"

---

**kişik:** setrenc; yew texteyo ke ser o 64 qareyê bi rengê sîya û sipî estê, mîyanê di kesan de ke her kes zî 16 kerrayê xo estê de yeno kaykerdiş

**dilwaz:** Verî kayê setrencî de usûlêk estbîyo, nê usûlî gore, kaykerdoxêk şertê xo destpêk de eşkera nêkerdo û şertê xo "dilwaz" ronayo, wexto ke zorê reqîbê xo berdo, hema şertê xo eşkera kerdo. Reqîb zî mec-bûr bîyo ke ê şertî biyaro ca. (notê M. Emîn Bozraslanî)

Sultan û hukimdarî cîsnê şahmarî yê  
Kesê zehîrdarî, merdimê mordarî yê

35 Moro ke danê pîro bizanê ke jehr o  
Şefqeto ke nawnenê, bizanê ke qehr o

Kesê bîaqilî zanenê fendê maran  
Kesê xafilî zanenê înan sey yaran

Ti leyê înan de çi rêzdar çi nazdar bê  
Ti verê ci de, çi qeşmer çi yarîker bê

Vîçêk vurîyayîş bivînê to de eger  
Hinî temamen çarnenê to ra rî û ver

Bîlhesa estbê dormeyê ci de îblîsî  
Merdîmê çimnebarî û pexîl û pîsî

40 Bêguman ke ê kesî şeytanê şeytanan  
Ya Reb ti înan meke nîzdîyê sultanan



**KAYKERDIŞÊ SETRENCÎ BI ŞERTÊ DILWAZÎ  
RONAYIŞÊ DAMA HÎLEKARÎYE SEBA KIFŞÊ RAZÎ**



Serfermandarê alayanê estareyan  
Yê akewteyan û yê awanşiyayeyan

Şahê textê asmênê çarine, o serdar  
Wexto ke hetê rojhelatî ra bî dîyar

Aşma setrenbaze û estareyo esker  
Êyê ke dîyayê bi xalîya keske ser

Şah mat kerdî bi **peyakê** nûr û zîyayî  
To vatêne heme nûrê xo de nimnayî

S O mîreyo ke bi xîret zerrîfîkar bî  
O aslano ke bi hemî birîndar bî

Hetanî destê sibayî hewn nêkewt çiman  
Nêbî sakîn û xayîs sey awan û çeman

Rojî ke rojhelat ra ramojna şewq û nûr  
Tarî û zulmet ke alemî ser ra vist dûr

---

**peyak:** (setrenc de) pîyon

Mîre vejîya teber, ame şaneşîne  
Ame nizdîyê seraya a nazenîne

Ronişt û wina ferman da bi xizmetkaran:  
“Şima xebere bidê embazan û yaran

10 Bi sereyê xo Mem bîyero; biwesênê  
Wa Tacdîn û birayî nîyerê; mehesnê

Ewro bi Memoyî ez do xezeb bikerî  
Sûcêkê ey esto, ez do edeb bikerî

Bêxeber û bêhayî mebê, eman-yeman  
Wa tim mi ser o bo, goşê şima hemînan”

Xebere rusnaye, Memî dawet kerd înan  
Kerdbî hazir gulawe û şerbetê gulan

Xeylê qend û şerab, xeylê şerbet û şeker  
Xeylê awa gulan, xeylê zî misk û enber

15 Ard û mîyanê meclisî ra çarna înan  
Keyf û kelebutêko bêbaw rona înan

Xeberî, qal û qiseyî ke qedîyayî  
Dame û tewle û setrencî ronîyayî

Mîr Zeydîni Memî ra vat bi xerez û kerb:  
“Ewro ma to reyde kenê şer û ceng û herb

Dê ronîşe verba mi de, bibe musabîq  
Bêşik seba to ez a reqîbo muwafîq

Şertê mi to reyde ey Memoyo serfiraz  
Ti ke çi wazenê, semedê mi zî dilwaz"

20 Lajanê mîreyî ra estbî yewo ciwan  
Xortêko şîrino nazik, yewo nuktedan

Yûsuf duştê rindekîya cî de mehcûb bî  
Rustem duştê egîdîya ci de mexlûb bî

Hemsuhbet û hemdemê Memî bî o ciwan  
Hemşayî û hemxemê Memî bî o ciwan

Serdarê lajekan bî, nameyê ey Gurgîn  
Hema wurişt xo ca ra, xeberdar kerd Tacdîn

Wexto ke o şêr hal û hewal ra bî waqîf  
Wuriştî xo ser ey reyde Çeko û Arif

25 Şêran qerifnayî zincîr û reseneyî  
Heme hîrê pîya şîyî leyê mîreyî

Hem Tacdîn hem birayî pîya weş ameyî  
Qey Memî ra her di **kapî duşêş** ameyî

---

**kap:** (tewle de) zar

**duşêş:** (tewle de) her di zî şêş ameyîşê zaran

Pîya ke ameyî fil û **rex** û **kerkedan**  
Mîre û malimê ci hê mat û perîşan

Zana ke Mem setrencbazêko cîro cîhat  
“Ma **desto** teze kay bikerê” mîreyî vat

Memoyî hîrê destî mîre berd pêsero  
Bekoyê pîsî çimî çarnayî dorme ro

30 Dî ke Zîne verê pencera de asena  
Mîsalê rojî ya aşme de nîya dana

Ê fesadê mirdarî hîleyêk peyda kerd  
Çarna û çepirna, behaneyêk eda kerd

Ey vat: “Dore bi dore benê dest û kayî  
Têver de hewilîyanê mekan û cayî

Memo do mexlûb bibo na donime helbet  
Meqsedê to beno hasil, asan û rehet”

Mîre wurişt şi cayê Memê jarê jaran  
Mem wurişt ame vera Zîna yara yaran

---

**rex:** (setrenc de) qela

**kerkedan:** Setrenc de di filî estê. Verî, seba yewerî “fil” seba ê bîni vato “kerkedan”. Na beyte de “fil û rex û kerkedan” ra Tacdîn, Çeko û Arif qest benê. (notê M. Emîn Bozraslanî)

**dest:** (kay de) dore, rey. Sey kayê yewin, kayê diyin...

35 Wexto ke çimî rîyê Zîne ro ginayî  
Memî fil û **ferzîn** têdima belaş dayî

Dil perra û şî bi pencera û şibakan  
Estora xo daye bi herinda peyakan

Mîreyî zorê Memî berd şeş rey dest bi dest  
Mem rîyê yara hemverî ra bîbî sermest

Mîreyî vat: "Memo, ma şert ronabî dilwaz"  
Memî vat: "Çi yo yê mîreyî waştiş û **waz**?"

Mîreyî vat: "Meqsed ne pere yo ne zî mal  
Ma wazenê eşkera bibo hal û hewal

40 Meqsed û meram bi setrenc û kay û **bazî**  
Yewna teba nîyo, bê xeyncê kişfê razî

Şertê ma o şert o ke ti îqrar bikerê  
Dinya de kam a yara to, dîyar bikerê

A kesa ke zerrîya to pê helîyaya  
Eger ke horî ya, eger ke ferîştaya

Ez layiqê to bivînî a kese eke  
Malê xo dana, ana to rê a rindeke"

---

**ferzîn:** (setrenc de) wezîr

**waz:** waştiş, arzû / **bazî:** kay



Eke kewt xerezdaran dest mecal û firset  
Derba xo danê piro bêguman û helbet

45 Bekirî vat: "Mi dîya, yê Memî waştîye  
Keynaya ereban, yewa lewdeqnayîye

Sey qîrî ya, yewera bexuda sîyaye  
A keyna nîya ke mîre biwazo aye"

Na derbe Memî rê zêde giran ameye  
Adir kerd zerrî ver, zêde yeman ameye

Behrê zerrî pêl da, keldayîş ame piro  
Desinde têwdîya, xuşayîş gina piro

Memî vat: "Qetîyen sey vatişê ey nîya  
Mîreyê mi, waştîya mi yewa perî ya

50 Şahbanû ya a, şaneşîne ci rê mekan  
Enqa ya a, cayê berzî ci rê aşîyan

Nesilo pako temîz ra ya, mîranî ya  
Ne awe ra ya ne herre ra, nûranî ya

Ser û serwera horîyan a, nazenîn a  
Melek a, ema hetê nameyî ra Zîn a"

Senî pê hesya qala xîlafe heybetî  
Hema ame mîreyî ro halê xîretî

Verê xo çarna bi qefleyê xizmetkaran:  
"Şima paweyê çî mendê gelî nankoran!

55 Qey nêtepîşenê nê rezîlî bi **zîlet**  
Ke ez ey geber bikerî, wa bibo îbret!"

Di sey xulamî dorme de ameyî pêser  
Herinda xo de bî rast Memo, dest de xencer

Tacdîn û Çeko zî birayê bînî reyra  
Pîya wuriştî xo ser, seba Memoyî ra

Xulaman rê vat: "Gelî egîdan, mekerê  
Şima pêro ne serxweş ê, ne zî meywer ê

Şima baş zanenê ke ma senî yeman ê  
Ma wayirê hunerê pîlî, pehlewana ê

60 Panc sey tenê şima hêrîş bikê bi kerban  
Ma ancî nêdanê şima dora çî derban

Merg û ecelê şima bi destê ma nîyo  
Ema şima zaf reyî hunerê ma dîyo

Hetanî şima Memî bikerê **giriftar**  
Şima ra di sey kesî do bibê birîndar

---

**zîlet:** rezîliye, bêşerefiye / **giriftar:** tepîşte, girewte

Hetanî ke şîma nêgirewto canê ma  
Do wina Memî ra bimanê çimê şîma

La çîyo ke mîreyê ma bikero ferman  
Ma nêbenê manîyê çî qerar û hukman

65 Destî girêdaye, ma bendeyê mîreyî  
Ha dest û payî, ha zincîr û reseneyî"

Mîre wurişt, dest û payan ra girê da Mem  
Mergê xo waşt Tacdînî, a game û o dem

Se bikero Tacdîn, ey rê nîyo şerm û ar  
Celadê Memî bi xo mîre û hukimdar

Memo hema girewt rusna verê **serhengî**  
Vat: "Dê ney biberê bierzê bircê tengî"

Înan Mem girewt berd, da bi verê **dizdarî**  
Eşt peyê beran, zindanê ci birco tarî

70 Vila bîyî cemat û meclis û dîwanî  
Seba Memî ra bîyî kesê perîşanî

Mîsalê deluyan kerdêne ax û feryad  
Seba Memî ra kerdêne hewar û îmdad

---

**serheng:** fermandarê eskeran. Tîya de mesûlê zindanî qest beno.  
(notê M. Emîn Bozraslanî)

**dizdar:** muhafizê dize/qela. Na çeku tirkî de bîya "dîzdar".



**XELWETÊ ZINDANÎ DE SIFETANÊ NEBAŞAN RA XELI-  
SÎYAYIŞÊ MEMÎ  
ÇÎYANÊ RÛHANÎYAN REYRA HEMHALBÎYAYIŞÊ  
Ê YETÎMÎ**



Ta ezel ra çin o bext **mîhrê** felekî  
Qet nêqedîyeno kîn û kîbrê felekî

Dest bierzo kam kesî, rast bikero erd ra  
Bêguman ê kesî gêno kuweno erd ra

Berzîye semedê xo ra eyan wazeno  
Nizmîye semedê ma ra pinhan wazeno

Her roja Heqî, Rojê bimbarekî beno  
Eşkeft û mixareya herre de nimneno

5 Bîlhesa estbo keso sewdasero aşiq  
Ci rê hem xayîn û teres hem zî munafiq

Verî, zerrîya ma aşiq û zerrîdaran  
Ma dest ra gêno bi cîlwe û nazê yaran

---

**mîhr:** şefqet, merhemet, dostanîye

Dima zî keno bêumîd, keno melûl ma  
Sey Memî erzeno zere, keno zelîl ma

Bê mirad keno hepis, dano tepiştene  
Keno zereyê **gorne**, peyêna peyêne

O bextreşo ke ci rê vajîyayêne Mem  
Bê dost û bê yar bî, bê heval û bê hemdem

10 Eşto bi çalêk, bi nalayîş û jarîye  
Çalêka mîsalê gorna tenga tariye

Lîmin û lîşin, mîsalê fekê ejderî  
Sawdar û xewfdar, qasê Nekîr û Munkerî

Ronişt zereyê çale de Mem abidane  
Hepis û zindan ci rê bîyê çîlexane

Bîya mîsalê **çala Nexşebî** a çale  
Aşme zî bîya aşma newîya hîlale

---

**gorne:** gor, mezele, qebre

**çala Nexşebî:** Nizdiyê Buxara de bajarê Nexşebî de yew çale bîya. Na çale bi serewerdartîşê Muqenneyî meşhur a. Muqenne 785 de vera hukimdarê Ebasîyan Mehdî de sere darto we. Pa keyeyê xo na çale de mendo. Fam kerdo ke ser nekeweno, muxitê keyeyê xo veşnayê. Wextê xoverdayîşî de derheqê ey de efsaneyêk ameya vatiş ke her şewe zereyê çale ra aşmêk vejeno û keno berz, a aşme roşn dana dormeyê xo. Tayê hozananê rojhelatî şîiranê xo de qalê çala Nexşeb û aşma ci ya efsanewiye kerdo. Ehmedê Xanî zî tiya de zindan şîbenayo a çale û Mem zî şîbenayo a aşme. (notê M. Emîn Bozraslani)

O sofî ke resa bi kuncikê xelwetî  
Şeyxîye resaye bi meqamê wehdefî

15 Ge-gane mîsalê sewdaseran bi dilwaz  
Ge-ge sey welîyanê abidan bi awaz

Ameyêne piro, keleyê bermayene  
Bi no qayde û hawa veng dayêne Zîne:

“Ey tiya ke tanîya bedenî ya, can a  
Ewro Misirê zerrî de şah û sultan a

Her roje dilê jarî de reyna û reyna  
To pirênê sebirê mi çîr kerd û dirna

Se beno, mîsalê Zuleyxa ti ge-gane  
Biperse halê Memî ey yara şîrine

20 Leyla ti ya, ez zî seba to bîya Mecnûn  
Hesiranê goninan qey to kena gulgûn

Ferhad ez a, ti zî semedê mi Şîrin a  
Ez eşqê to dest ra hesiran gurgurnena

Gerçî dinya mi ser o bîya heps û zindan  
Ewro tenya ez bi xo ya, keso musluman

Çimkî fekê resûlê Heq tealayî ra  
Vajîyayo no vate û bîyo eşkera:

'Dinyaya ke cenet a semedê kafiran  
Meskenê belayan a semedê mu'mînan'

25 Her çiqas ke zaf zêde ra tarûmar a ez  
Ema bi tarûmarîya xwu keyfdar a ez

Sed serrî Memî bikerê heps û zindanan  
Pêrestîş ra umîdê xo birneno caran!

Sond wanena bi Quran û **sûreya Nûrî**  
Sond wanena bi rîyê to yê bêqisûrî

Des reyî bi heqê por û perçemanê to  
Çewres reyî bi heqê beşn û qamanê to

Sond bo bi rîyê to yê sey tîja zelale  
Sond bo bi êyê mîsalê aşma delale

30 Bi ê birûyan ke Memî rê qiblege yê  
Bi ê gilayan ke Memî rê secdege yê

Hezar rey sond û qesem, bi her di **nûnan**  
Her di çiman reyde, wina yo soz û peyman:

Heta ke bieşko nefes bigêro no can  
Yarê, ti nê canî de nimita û pinhan

---

**sûreya Nûrî:** Sûreya 24. ya Quranî, tede qalê munasebetê cinîyan  
û camêrdan beno. (notê M. Emîn Bozraslanî)

**nûn:** Alfabeya ereban de nameyê herfa n (ن) yo. Na herfe bîya sem-  
bolê birûyanê rindekan. (notê M. Emîn Bozraslanî)

Çende bi cîyakewtene bêqerar a ez  
Hende bi to hêvîdar û umîdwar a ez

Gerçî mîreyî bi mi kerd qehir û xezeb  
La qehir û xezebê ci nîyo bêsebeb

35 Çimkî ey goş da qiseyanê Bekirî ser  
Erd û asmên Memê jarî ser o ard pêser

Çimkî ti padîşah, ez kesó parsek bîya  
Ez hunkifê to ney, keso punasek bîya

Ti sey rojî sey aşme rindek û weşik a  
Ti narîna narînan, delal û nazik a

Ez rezîl û ruswa ya, keso bêrûmet a  
Ez jar û perîşan a, keso bêtaqet a

Ez perwane ya, mi canê xo eşto adir  
Ez veşaya hem bi batin hem zî bi zahir

40 Ti tîja rojî, û dil sey nîluferan o  
Ti tîja aşme, ten duştê to de **keten** o

Eke ten bipûyo yan bihelisîyo  
Eke dil behrê xeman de bifetisîyo

---

**keten:** Vaşêk o, vilikê xo zaf weşik ê, nê vaşî ra çît-çîtare virazî-  
yeno. No vaş duştê tîja aşme de helisîyeno.



Mi heq kerdo; edalet o, û zulim nîyo  
Çimkî no xasîyetê adirê eşqî yo

Na çale zêde ra xorîn a, zêde ra kûr  
Labelê edalet ra, nîya cîya û dûr

Sofî ya ez, yê mabed û manastiran a  
Talibê cemalê Zîna yara yaran a"

45. Peynîye de ame werê meqamê "**mûtû**"  
Bi goreyê îcabê "**qeble en temûtû**"

Nefsê ci bî zelal, bî nefso temîzo pak  
Qelbê ci bî roşnî, bî qelbo roşno roşnak

Eynaya ruhî bî sey cîla, beriqîya  
Nefs û dil û can bîyî temîz, pêro pîya

Îbadetkarê zereyê çala xorîne  
Hîna ke tamam nêbibî serra yewine

Beno ke nêbîyo mehpusê çewres rojan  
Şikê zerrîya ci bî bawerî û îman

---

**mûtû**: bi erebkî "bimire"

**qeble en temûtû**: bi erebkî, "verî ke şima bimirê"

Tîya de yew hedîs qest beno ke pêxemberî vato "Bimirê, verî ke şima bimirê." Yanî "Hîna ke şima bi ecelê xo nêmerdê û na dinyaya ra nêşiyê, xûyanê xo yê xiraban çin bikerê û bi no tewir nefsê xo bimirênê, bikewê hukmê merdeyan." Ehmedê Xanî vano Mem zindan de resayo nê meqamî, xûyanê xiraban ra bîyo pak, nefsê xo mirênayo. (notê M. Emîn Bozraslanî)

50 Dîyar bîyî zerrîya ci de şewq û nûrî  
Kîfş bîyî verê çîman de esrar û sirrî

Eynaya zerrî şewle da û beriqîya  
Sûretê ci hetê mana ra bedilîya

O heykelê waz û waştîşê qestikênî  
Bî mekan û meskenê eşqê rastikênî

**Can û camidî**, dinya û alem seraser  
Bîyî eyne û eynik ameyî çîman ver

Dar û berî, velg û vaşî, dêv û însanî  
Madenî, kemer-kuçî, nebat û heywanî

55 Her çîyo ke bi dilê xo ewnîya pira  
Her çîyo ke bi xeyalê xo eyse ci ra

Her çî çîman ver de bî Zîne, her çî Zînêk  
Aseno her yewî ra îman û yeqînêk

Kesê resedxaneyan o, to vatêne qey  
Çala xorîne zî durbîn a, semedê ey

---

**can û camid:** candarî û bêcanî, gane û objeyî



**BÊUMÎDÎYA ZÎNE BI MEHPUSÎYA MEMÎ  
EMBAZÎYA AYE BI XEM Û DERM Û ELEMÎ**



Zîna ke bi derdê hîcranî xemgîn bîye  
Bê sebr û sebat, bê qerar û temkîn bîye

Hîna ke Mem nêbîyo yê çala xorîne  
Pêresayene ra umîdwar bîye Zîne

Wexto ke Memo zar erzîya peyê beran  
Umîdê pêrestene nêmend tede caran

Seyrangeyî, şaneşîne, çardax û eywan  
Ci rê bibî diz û dizikî, heps û zindan

5 Werdek û şimitek, heme werd û xidayî  
Ci rê bibî mîsalê ziqimê sîyayî

Canê ci rê çin bî ne rakewtiş ne rehet  
Bedenê ci de çin bî ne qewet ne teqet

Bibî jara zeîfeka şehtîyayîye  
Helîyaybî bibî mîsalê têla muye

A muye bîbî zerd û çeqer sey zefranî  
A muye girewtbî rengê sûretê Xanî

Şan ra hetanî şewdir, şewdir ra heta şan  
Tim û tim vatêne “Ya Homayo ezîmşan”

10 Semedê felekî ra vatêne aye tim:  
“Ey gonîwero bêbexto xayîno zalim!

Yê Zîne qest û xerez to reyde qet çin o  
Yê to Zîne reyde no çi xerez, çi kîn o!

Çerxê to nêçerixîya demêk seba mi  
To zaf û zîyade vîna, Memêk seba mi

Nûr û cemal rîyê Zîne de to kerd peyda  
Pê ci veşna Memo jar, kerd bilbil û şeyda

Rîyê Memî de şewqêk, to nawit û musna  
Pê ci qelbê Zîne, to kizirna û veşna

15 Dê bivaje, çi kewt to dest, ey feleko kal!  
To nîşanê mi da, yewero semto delal

Verî, çira to musna mi, bi mi eyan kerd?  
Dima çira to girewt berd, bi mi pinhan kerd?

To ma sotî bi kil û adirê hesretî  
To ma kiştî bi xem û kederê wusletî

Mesûd û bextewar o, heme xelq û alem  
To dayo Zîne û Memî keder û elem

Dê mi rê bivaje, ti derd û qehirê xo  
Bivarne dilê xo ra, jehr û zehîrê xo

20 To Yûsuf mi ra girewt, eşt heps û zindanan  
To ard mi ser de, no halo per û perîşan

Zîne bîya Yaqûb, yê aye ax û nalan  
Sebîrê zerrî to kerdo wêran û talan

Halê Zîna pepûke halê Zuleyxa yo  
Ne Yûsuf o, ne mirad, ne mekan, ne ca yo”

Ge-ge zî ardêne verê çîman Memo jar:  
“Ey Yûsufo bêsuco hepsîyo girîftar!

Mevaje ke zereasan, rehet a Zîne  
Mevaje ke weş û war, bisihet a Zîne

25 Sond wanena ez, bi sond û qesem willayî  
Çi şewe çî roj, heme rojanê Homayî

Ci rê çin o hewn, çin o werd û werdiş bin ra  
Hesîrê gonînî kê m nêbenê çîman ra

Kar û gureyê her di çîman hişyarîye  
Kerdena zerrî-cîgeran gonîwerîye

Ey qiblegeyê zerrî, ey Kabeyê canî  
Sond bo bi Quran û Homayê ezîmşanî

Tim û tim destê hîcran û dûrîya to ra  
Tim û tim derdê hesret û bêrîya to ra

30 Hezar ax, di hezarî nalayîş û fixan  
Dil û can ra benê berz, her dem û her zeman

Bişewe û biroj, halê Zîne wina yo  
Ey bextsîyayê mi, halê to çi teba yo?

Hepsîyê mi, kam o to rê heval û hogir?  
Waştîyê mi, kam o to rê deyx û sebir?"

Ey dil, ti qelbê mi ra bivejîye teber  
Ey can, ti dilî rê bibe hemrah û rayber

Dê hadê, bişorê Memî bivînê şima  
Ey ra xeberêk bîyarê, û biresnê ma

35 Ey dil, to ke selam da ci, dî Memoyo jar  
Rew bîye, halê ey ser, mi bike xeberdar

Ecêba çi yo hewalê ê giriftarî?  
Ecêba çi yo xîyalê ê dilfekarî?

Ecêba bi ma aşt o, yan heredan û zîz?  
Ecêba baxê ey de wisar o, yan payîz?

Ecêba weşreng û nazik o, sey sûrgulan  
Yan zar û perişan o, mîsalê bilbilan?

Eywan ma rê bîyo mekanê ezîyetî  
Zindan zî ma rê bîyo baxçeyê cenetî

40 Kaşka pê mi xezeb bikerdêne mîreyî  
Mîsalê Memî bi zincîr û reseneyî

Ez zî bikerdêne tepişte û zindanî  
Çimê mi biginayêne ê perişanî

Reyêk bidîyêne mi Memoyo girîftar  
Derman bikerdêne mi o keso birîndar

Wa emr kilmek bibîyêne, nêbîyêne derg  
Wa misteheq bibîyêne, seba mi ra merg



**XEMGÎNÎYA TACDÎNÎ BI HALÊ BIRAYÊ XO MEMÎ  
BIRAYAN REYDE ŞEWR Û MIŞEWRE  
SEBA XELASA DILXEMÎ**



Amadekerdoxê kitabê Mem û Zîne  
Cîldkerdoxê destana eşq û sînayene

Arê dayî beş û qisimî, nayî têver  
Heme bi nîzam û întizam, dayî pêser

Ey vat ke: Zîne û Memo, bîbî pîl nazdar  
Derdî ke ameyî piro, bîyî merezdar

Ê derdî bîyî behr û deryayê adirî  
Adirê xeman o, veşneno dor û verî

5 Çi kesê ke bi eşq û sewda bîyê sermest  
Adir de veşayî, bîyî mehkûm û bindest

Bîyî nêweş heme zî bi derdan û xeman  
Ame înan ro halêko girano yeman

Bîlhesa embazê verênî, nas û dostî  
Hemderd û hemsuhbetê ci, Tacdîn û Sifî



Newe ra derd û xemî ameyî ra ser de  
Hinî qet qisey nêbîyêne înan ver de

Her çiqas ke Mem û Zîne ra cîya bîyî  
Ancîna zî bi derdê ci mubtela bîyî

10 Sitî qey Zîne ra kerdêne ax û hewar  
Tacdîn bi kederê Memî bîbî tarûmar

Mîyanê birayan de **telî û dasî bî**  
Nîyet û meqsedê ci çîyo winasî bî:

Wa bido piro bişoro verê mîreyî  
Mîreyî ra biwazo Memê fiqareyî

Semedê ey, wa rica û minet bikero  
Semedê beşê ci, cehd û xîret bikero

Yan mîre seba ey, birayî verabido  
Yan zî o do no rayîr de can û mal bido

15 Arifî ver çarna Tacdînê sey Rustemî:  
"Darê zorî nêbo, veranêdanê Memî

Bîla pêrodayiş û bîla cengo giran  
Mevaje ke no mesele hel beno caran

---

**telî û dasî bî:** hêrsin û bêhuzûr bî, tirş û tiloq bî, sey telî û dasîyî şî-  
yêne înanê dor û verî de

Mesele hal nêbeno, bi meclis û dîwan  
Ma do dest biberê xo, bivejîyê meydan

Hewle a ya ke ma şodir ra espar bibê  
Girê bidê çekan, her hîrê çekdar bibê

**Çarane** û **çewşenan** bidê verê xo ma  
**Zendane** û mîxferan bidê serê xo ma

20 Wa bihejîyê gurzî, biêrzîyê rimî  
Ma begî ra biwazê birayê xo Memî

Yan ma bi darê zorî, Memî veradanê  
Yan ma bi egîdîye sereyê xo danê

Eke mîreyî bi no hawa verada Mem  
Kul û dirbeta zerrîya ma bena melhem

Eke peyser nêeşte game û kerd înad  
Ma zî duştê ci de ronane ceng û cîhad

Ma gama verêne Bekirî geber kenê  
Ê mirdarî verê berî ra teber kenê

25 Verê her berî de ma ca kenê yew şêrî  
Wa her kes amade bo seba ceng û şerî

---

**çarane:** kincê cengî yê asinîni

**çewşen:** zirxo ke pul û zincîran ra virazîyayo

**zendane:** zendik, zendika ke cerg de dîyeno zendan ra

**huyeweş:** keso ke huyayişê xo weş o

Bekirê fesadî nêdo ma mîre eke  
Duştê ma de destê xo derg bikero çeke

Ma arêyê ecelî zaf yeman çarnenê  
Sey hebanê xeleyî sereyan tehenê

Wa Botan de bironîyo govend û dîlan  
Kesê **huyeweşî** biyerê seyr û seyran

Gama ke ma dest berd şûr û sungî û **herban**  
Wa delalî bivînê dirbetan û derban

30 Wa tim û tim bivajê ma rê perîzayî:  
'Destê şima weş bê, ey ciwanê mîrzayî'

Wa tayê biberemê, tayê sena bikerê  
Wa tayê bihuyê, tayê dua bikerê

Dildar û dilberî seyr bikerê bircan ra  
Durraneyî bizejyê teber **durcan** ra

Xatûnî pencera ra temaşe bikerê  
Pirênê **gulgulinî** pirtile bikerê

Ma do tim bieşnawê vengê nazenînan  
Ê do ma rê bivajê, hezar aferînan"

35 Goş da qisayanê birayî ser Tacdînî  
Tek-tek xo sere de ca kerdî ê xemgînî

---

**herb:** sungî, rima kilmeke / **durc:** qutîya mucewheran  
**gulgulin:** bi gulan neqîşnaye



**HETKARÎ Û TEDARIKÊ TACDÎN Û BIRAYAN  
BI FERMANÊ XÎRETÎ  
ESPARÎYA ÎNAN BI ESTORANÊ HEMÎYETÎ**



Serê sibayî ra **şahsuwarê felekî**  
**Estoro qir** da cayê **estorê belekî**

**Estoro qero qemer** tewle de girê da  
**Estoro qiro gewr** zî newe ra verada

Gurzê xo yo mîsalê adirî kerd eyan  
**Şimşêrê xo yo zerrnkilkerde** zî vet meydan

Ters û xofê ci ame piro, bî zerd cîhan  
Recif û qutifiyayîş kewt para koyan

5 Birayan û Tacdînî der û cîranan ra  
Waşt xatir û helalîye zerrî û can ra

---

**şahsuwarê felekî:** roj qest beno  
**estoro qir:** roşnîya roje qest bena  
**estoro belek:** xizgewrê serê şodirî qest beno  
**estoro qero qemer:** tariyê şewe qest beno  
**estoro qiro gewr:** roşnîya roje qest bena  
**şimşêro zerrnkilkerde:** tîja rojî qest bena

Bi hîrrayîş vetî teber estorê holî  
Sûrê erebê sey **Rexşê Rustemê Zalî**

Lezabez estorê çapikî bizmar kerdî  
Bi hêrîş û galim dişmenî hişyar kerdî

Bi siman meydan pîkol kerdêne estoran  
To vatêne dişmenan rê kenenê goran

Tacdînî merdimanê xo ra yew extîyar  
Taf de rusna mîreyî ver, kerd wezîfedar

10 Vat: "Ci rê bivaje, gelî beg û axayan  
Ferasetdarî nêtefênenê çilayan

Mîreyê ma usûl zaneno, aqilmend o  
La ewro çiman de nûr û zîya nêmendo

Ma çar birayî bîyî, ey de sadîq bîyî  
Ma heme çar bi xizmetê ci aşîq bîyî

La no çi însaf o ke serrêk ra zêde yo  
Memoyo fiqare çalêk de tepîşte yo!

Dişmenê ma şad ê, dostî kesê xemgînî  
Ferz o hinî merg, seba Çeko û Tacdînî

---

**Rexşê Rustemê Zalî:** Estorê Rustemê Zalî bîyo. Ci rê "Rexşo Belek" zî vajîyeno (notê M.Emin Bozarlanî)

15 Rast a, Mem zêde ra succdar û gunekar o  
Labelê aşiq o; eşq şah û hukimdar o

Hukm meke ti, bi hukimdaran û mîreyan  
Zulm meke ti, pê sêkuran û fiqareyan

Ma umîd kenê, serbest veradîyeno Mem  
Derdê zerrîya ê bêkesî beno melhem

Ma çar birayî yê, her yew zî dês û dîwar  
Estûna weşîya mîreyî yê, ma her çar

Sereyê ma her çaran, mîsalê gogan o  
Îradeyê ey zî ma ser ra sey çogan o

20 Yan çîyêko havildar ma rê birone ti  
Yan zî Bekê fesadî ma rê birusne ti

Ke ma semedê ey ra bivajê çend çîyan  
Derdê zerrîya xo ci rê bikerê beyan

Rûmet nêmedo, pê ma huyeno xas û xam  
Ma do bar bikerê, û verê xo bidê Şam"



**TEDBÎRÊ BEKIRÎ SEBA DEFKERDIŞÊ ŞIK Û ÎNADÎ  
ZÛR Û ZURBETÊ EY BI TERSÊ FITNE Û FESADÎ**



Qisaya xo ke kerde tamam ê qasidî  
Hal û hewal ra bî xeberdar Beko mudî

Dî ke seba ey ra hal yeman û xirab o  
Vat: "Efûyê Memî munasîb û sewab o

Begê mi, qey mi nêvat, gama verêne ra  
Tacdîn û birayan caran medejne xo ra!

Yan mi bikişe yan zî bide înan Zîne  
Wina nêbo, to reyde kenê dişmenîne

5 Hewle a ya ke ti qet meke qal û israr  
Tacdîn to ra nêterseno, nêkeno fikar

Ti bivaje: 'Mi Mem û Zîne bexişnayê  
Seba xatirê Tacdînî ra, zewicnayê'

Qetîyen eşkera meke hêrs û înadî  
Wele bierze serê adirê fesadî

Dima tabivisne, eke peyda bî firset  
Bincaran mede ci, ne eman ne zî muhlet

Begê mi, dişmeno ke nêşkenê pê ci  
Derman şerbeto jehrin o, ey ra bide ci

10 Hukimdarên rê tim lazim benê di fîncan'  
Yewere qey xiraban, yewere qey qencan

Yewere nêweşan sihetdar û weş kena  
Yewere weşan bêmecal û nêweş kena

Yewere dişmenan gankêş û xedar kena  
Yewere merdeyan saxlem û candar kena

Wa bewlî nêbo yê to, hêrs û kerb û qehir  
Ganî ma do bikerê, îdare û sebir

Kar esto ke nêbeno bi keder û kerban  
Qetîyen zî nêşono ser, bi zor û derban

15 Westayan rê lazim o, hem rayîr hem usûl  
Hesab û kitab, sebr û sebat, û tehemul

Rojî çeşît bi çeşît ê, geyreno dewran  
Homa teala rojêk peyda keno îmkan

Yanî şew û rojî estê, şan û şewdirî  
Tayê zeng û zelal ê, tayê ting û tarî



Lazim o ma zî, goreyê rojan û şewan  
Ge-gane bibê pinhan, ge-gane zî eyan

Ma tayênan zahir, tayênan xef bikerê  
Tayênan berz, tayênan telef bikerê"

20 Şimşêr winî seqa kerd ke Bekê kafirî  
Kerd tûjê tûjan, mîsalê **şûrê Misirî**

Şîret û nesîhetî, qisayê **yalanî**  
Semedê ci ra kerdî destik û kalanî

Zûr û zûrbet varna her ca xeripna Bekî  
Şimşêr pê zûran zêde ra xemilna Bekî

Girewt kerd binê berzînî o şimşêr nimit  
Bi o qayde nimit ke kesî pê nêzanit

Mîreyo ke qehir û kerban zerrî sotbî  
Heme qisayê ke Bekirî ci rê vatbî

25 Bawer kerd, girewt xo ver qasido extîyar:  
"Ey kalo, xelet mefikirîye ti, zînhar

Ez ke bierzî kîşte-kenar heme ferzan  
Ez Tacdînî dest ra senî vejena erjan!

---

**şûrê Misirî:** Tewirêkê şûranê zaf tûjan biyo; biyo nişanê şûranê başan. Seba ke Misir de virazîyayo, ci rê "şûrê Misirî" vajîyayo (notê M. Emîn Bozarlanî)

**Yalan:** Zûre. Na çekuye bi tirkî ya, Ehmedê Xaniyî "yalan" vato

Bi Tacdînî yo, seltenat û heybetê mi  
Bi Tacdînî yo, ezamet û şuhretê mi

No nişan û îhtîşam, no mewqî û meqam  
Bîla xatirê ey, mi rê xenîm û heram

O Rustem û **Gêw** o, pehlewan o hêca yo  
Ez xizina û defîna, o ejderha yo

30 Bivaje: 'Mi bi zerrîya xo Zîne û Mem  
Day' xatirê Tacdînî ver, bê dej û elem

To verê xo mi ra çarnayo bîlasebeb  
Ma to çi çî waştö ke mi nêkerdo eceb!'

Tacdîn û Çeko, her di roşnîya çiman ê  
Goreyê dilê ci bo, eke çi wazenê"

Verê mîreyî ra bî rewan qasido kal  
Hurdî-hurdî qisey kerd ci rê hal û hewal

Şêranê ke nîyet ardbî ceng, bîy' mulayîm  
Vat: "Dem û dewleta mîreyî, bibê daîm"

---

**Gêw:** Embazêkê Rustemî yo dilawer bîyo (notê M. Emîn Bozarlanî)



**NESÎHETÊ XEREZKARÊ MEREZDARÊ DILKULÎ  
SEBA MÎREYÊ ZERRÎPAKÊ SAXÊ SAFDILÎ**



Şan de ke asmênî manqala xo ronaye  
Meşaleya xo wedarite û nimnaye

Yanî çilaya zerrnêne ke berde xo ra  
Newe ra kincê renginî ke dayî xo ra

Mîreyo ke her tim keyfweş û zerrîşa bî  
Seke şîn ronabî û sîya girê dabî

Bekirê fesadê rîsîyayê mel'ûnî  
Çim ke gina halê mîreyî yê mehzûnî

5 Vat: "Ey çilaya dewlete, ti qet xem meke  
Emr û heyat bido ma, bext û firset eke

Zereyê xo ra derd û keder û elemî  
Biveje bierze teber, Zîne û Memî

Rîyê înan ra ronîyeno eks û înad  
Rîyê ci ra peyda beno fitne û fesad

Eger ke mîre bido mi fzin û destûr  
Ez Memî kişena bi hîle û bi tedbîr

Bi şerbetê jehrinî, Tacdîn û birayan  
Ti şenê hema berteref bikerê înan

10 Çîyo ke karê ma keno rehet û asan  
Zînhar agahdar meke kesanê şinasan

Mîreyê mi, dê ti bişo bivîne Zîne  
Vaje: 'Mem veşnayo, adirê sînayene

Ti awa heyatî ya, Mem keso teyšan o  
Ti ruho edebî ya, Mem zî ha can dano

Dê ti Memoyî zindan ra biveje bîya  
Hinî yê to yo, mi dayo to o bextsîya'

Begê mi, ez zanena, Mem zêde ra jar o  
Perwane yo, meqsedê ci adiro har o

15 Gama ke çimê Memoyî bigino Zîne  
Nêmaneno tede taqetê cuyayene

Senî ke Zîne şîye kewte verê çiman  
Ti bawer bike ke tede nêmaneno can

Bi no qayde can dano Mem, mireno şono  
Lej û keşmekeş zî wedarîyeno şono"

Mîreyî estê ke ezîz û bîaqil ê  
La cê nêkenê rast û çewt, sax û safdil ê

Safîye, nezanî û zerrîpakîye ver  
Goş nêdanê bin û bîngeyê qisayan ser

20 Goşê xo zerrî ya, zerrî zî bi goş nîya  
Bîbîkê ci sipî la çimî bi xo sîya

Xerezdarî bivajê, çi qisa û qalan  
Sey rastîye pê ci, benê îqna û înan

Caran nêvanê ke "Na qenc a yan xirab a"  
Caran nêvanê ke "Na şaş a yan sewab a"

Nêvanê ke her çî, bi rayîr û bi usul  
Hema yenê xezeb, qet nêkenê tehemul

Exlebî bi aqilê xo wa benê mexrûr  
Ekserî fikir û mentiq ra kewenê dûr

25 Zerrîsîyayan, fêlxiraban û pexîlan  
Sextekaran, rîsîyayan û bêesilan

Anê û xo rê kenê qilawuz û rayber  
Merdîmê bêcînsî benê wezîr û serwer

Teslîmê destê înan kenê kar û barî  
Ê zî dewlete kenê wayîra qisûrî

La mîreyê wayîrê fam û ferasetî  
Sultanê wayîrê şefqet û sîyasetî

Qetîyen yew merdimî nêkenê sermîyan  
Hetanî ke rindarind nêkerê îmtîhan

30 Yew merdimî çewres donimî ceribnenê  
Aye ra dima nêzdîyê xo de ca kenê

Hem şahîye hem zî wezîrîya cîhanî  
Manenê bi **begme-kizîrîya** zemanî

Mîsalê yew kayî yê, ê her di zî pîya  
Boş û betal ê, pêser ra nêbenê cîya

Hetanî mevajê "çîman ser" û "**elheq**" ti  
Do bi çi qayde bibê wezîro mutleq ti!

---

**begme-kizîrî:** kayêkê kurdan o, bi kapan kay beno (notê M. Emîn Bozarlanî)

**elheq:** Yeno manaya tesdîqkerdişî. Yanî, "ya, wina yo" (notê M. Emîn Bozarlanî)



**DESTÛRDAYIŞÊ MÎREYÎ SEBA DÎYIŞÊ MEMÊ JARÎ  
BÊHIŞÎYA ZÎNE BI ZEWQ Û HEWESÊ DÎYIŞÊ YARÎ**



Kamilê aqildarê wayirê tedbîrî  
Wina neqil kerdî hedîse û xeberî

Ey vat: Mîre bi şêwr û mişêwre û **raye**  
Wexto ke da piro şî heremê seraye

Veng da ra Zîna bêçara, arde leyê xo  
Yew bi yew ci rê vatî, qal û qisayê xo

Vat: "Neheqîya ma bi Memî zîyade ya  
Bêrehmîya ke ma pê kenê bêhûde ya

5 Mi pê ê rebenî hem cewr kerd hem zî sîtem  
Sebebê cewrî ti, sebebê sîtemî Mem

Eşqê to sereyê ey ra aqil pernabî  
Bîbî gêj û şeyda û cindar, muftela bî

Hekîmêk mi rê kerdbî behsê yew çareyî  
Vatbî, bi zincîran benê weş dîwaneyî

---

**raye:** fikir, nezer, qenaet

Coka mi xezeb pê kerd, tepişt û eşt zere  
Zere de ha kerda temam, Memî yew serre

Mi wina kerd ke eşqê şima bibo kemal  
Bi pêresayene wa nêbo çîyo betal

10 Ema ez hinî bawer a, bi zerrî û can  
Yê şima eşqo pîl o, sewdaya sewdayan

Şima her di resayê mertebeyê pîlî  
Şima layiqê yewbînan, kesê meqbûlî

Bêguman ke Mem sewdasero rastikên o  
Qelbê ma sewdaserîya ey tesdîq keno

Mamûr o, bi emrê padîşah û mîreyî  
Mazûr o, bi uzrê merdimê bêguneyî

Kam ke ci rê peyda bikero zor û zehmet  
Bêguman do bivîno ezab û ezîyet

15 Rindekîya to dest ra Mem bîyo giriftar  
Eşq û sewdaya to dest ra bîyo birîndar

Tîra ke ginaya zerrî, to naya pira  
Dermanê bêhişîye, to sawita tira

O surmeyo ke esto, to kerdo çiman ra  
Heta ti nêdîbî, dil nêveşabî bin ra

Porê to bîyo qeyd û bendê dest û lingan  
Dano zerrîya ey de, sey eqreb û hingan

Tewq kerd Memî ra to, kerd tewqdar bedenê ci  
Dame ronaye, kerd esîr dil û canê ci



- 20 Senî ke to akerdî, çimê sey ahûyan  
Verdayî ê fiqareyî ser sey cadûyan
- Dê hadê ti bişo, qisey bike Memî de  
Abike qeyd û bendan, seba xo raverde
- Ey xunçaya nêaşkawîyaya sûrgulan  
Bişikne qefesan, azad bike bilbilan
- Mem teyšan o, ti çimeyê çemê Feratî  
Mem nêweş o, ti hênîyê awa heyatî
- Zîne awa heyatî ya, Mem ho teyšan o  
Zîne ruho ebedî ya, Mem ho can dano"
- 25 A nazenîna ke aşiq û bengîn bîye  
Şerm ci rê perde bî, şermek û şermîn bîye
- Senî ke birayî o perde kaş kerd ver ra  
Gonî eşt teber hema, fek û pirnikan ra
- Zîna ke di sey' kulî estê cîgeran ra  
Kewte halê merdene, keyf û kelecana ra
- Ê behrî, behrê pêlanê sewdaserîye  
Tim sevekneybî perdeyê hayedarîye
- Senî ke o perde wedarîya mîyan ra  
Rijîya bendê şerman mabeynê behran ra
- 30 O umanê xeman coşîya zîyade ra  
Winî coşîya ke qapaxê serî perra
- Qapax ke perra şî, ci ra pêlanê gonî  
Xo eşt teber, mîsalê Ferat û Ceyhûnî

To vatêne qey birrê mazêran hejîya  
To vatêne qey şûşe ra şerab rişîya

Mîreyo xerezdar huya bi halê Zîne  
Waşt ke binimno keleyanê bermayene

Dûyê kebabê muhabet û merhemetî  
Peyda kerdî çiman de hesirê şefqetî

35 Kele ame serçimeyê merhemetî ro  
Berme ame ê mîreyê zerrîpêtî ro

Ronişt kurekur berma bira waye reyde  
Her di pîya mendî heta şewdir uca de

A bîye xerqê gonîya zerrî sey gulan  
O zî ci rê berma û nala sey bilbilan

Êyê seraye dorme de ameyî pêser  
Hemîne xo eşt bi linganê mîreyî ver

Vat: "Ey Xusrewo heqşinaso rast û adil  
Bîlasebeb çira bîyê kiştux û qatil?"

40 Zîne gulêra baxçeyê **îsmetî** bîye  
Zîne selwîyêra baxê îfetî bîye

Durrdane ya Zîne, zerrn û sedef û gewher  
Layiq nîya ke wina gonî biverdê ser

---

**îsmet:** rast û durist, bêgune, hetê exlaq û namûsî ra pak

Zîne nazikbeden a, nazenîn û masûm  
Çin o sucê ci ke heyat ra bibo mehrûm

Çi ser û semed ra to gonî verdaya ser,  
Qey can û beden yewbînan ra kerdê cêser?"

Mîreyî vat: "Qisey mekerê cahil cahil  
A bêhiş a, ez nêbîya kiştox û qatil

45 Senî kişena ez, Zîne yê mergî nîya  
A, cenetê heremî de dara **Tuba** ya"

Ehlê heremî dorme de ameyî pêser  
Hesirê çiman varnayî selwîyêre ser

Heme keyeyan de ronîya şîn û şîwan  
Feryad û fixan şî resa rîyê asmênan

A game xafil ra kewt bi zere yew camêrd  
Ey vat: "Canê xo teslîm kerd, Memo bêkes merd"

Xebera merdene ke şîye goşê Zîne  
Goya merdbî; ameye can a nazenîne

50 Wurişte dîqetê xo da dor û verî ser  
Dî ke mîre bermeno, hesirî lay-laser

Ehlê heremî; kesê xasî, kesê xamî  
Şîn û şîwan ameyo piro, bi temamî

---

**Tuba:** Dara cenetî. Bawer beno ke virqosî ya, yanî kokê xo cor de,  
şax-şafil cêr de, siya xo dana heme cenetî ser

Zîne vat: "Ey ser-sebebê seadetê mi  
Zînhar bêkeyf mebe ti, roja dawetê mi

Ey şah, to dayo ruh û canê Zîne ruxset  
Memoyî zî merdene xo rê kerda fîrset

Can şî û resa canî, bîyî yew can pîya  
Ruh şî û resa ruhî, mîyan de helîya

55 Hetanî nêbîbî bi fekê to wa îqrar  
O ruh mendbî hepisê-tenî de girîftar

O zî mîsalê Memê melûlê mehpûsî  
Semedê pawitişê name û namûsî

Coka, heta ewro cayêk ro nêşîbî o  
Paweyê destûr û musadeyê to bî o

Ruhê mi, to ke semedê dilî riza da  
Şahê mi, to ke milkê tenî de sela da

Bedenê mino jaro perîşan bî giran  
Ruhê mino bêhêzo bêteqet bî rewan

60 Ca de vejîya teber ruhê mi beden ra  
Ruhê Memî ra zî şewleyêk bî eşkera

Pîya terikna no xan û qonaxo fanî  
Pîya verê xo da cîhanê cawîdanî

Çi tebayo ke qebûl nêkeno meknan  
O teba wa verê xo bido lameknan

Caran yewna çî nêyero aqilê şima  
Melekê nêzdîyê Homayî şahidê ma

Gama ke can beden ra, vejîya bî rewan  
Ey dîye canana xo, bi tewrê canî can

65 Her di ke resayî yewbînana welhasilî  
A roşnîya û a meş'aleya cemalî

Gamêk vindertî têver de, û bîyî asan  
Dima emel û îtîbar, ard bi yewbînana

A, a dilopa umananê sifetpakan  
O, o zerreyê deryayanê xeternakan

Ge-gane resayî kenareyê **fenayî**  
Ge-gane zî resayî serhedê **beqayî**

Rîyê erdî ser ra aye ra dima pîya  
Resayî bi rojo ke vila keno zîya

70 Caran nêameyî pêser, nêbîyî cêser  
Caran nêbedîlayî, yewna çîyî ser

Wexto ke kewtî rayîr, verê xo da Heqî  
Bi cenabê Heqî, bîyî çîyêko baqî

Qet êceb nîyê, nê xeberî semedê mi  
Şima nêzanê, sey hunerî semedê mi

---

**fena:** fanîbîyayîş, çinbîyayîş

**beqa:** baqîbîyayîş, ebedîbîyayîş

Şeyxo ke ci rê murîd û suxte ya Zîne  
O ruh û can o, este û poste ya Zîne

Tabî nameyê ey verê şîma de Mem bî  
Labelê şah û sultanêko muhterem bî

75 Bî layiqê şan û şerefê padişahi  
Bî meqbûlê meclis û dîwanê Îlahî

**Dola bimbareka firaze** qelbê ey o  
Ruhê ey bi **nûrê Heqî** favisnaye yo

Ey ez girewta, xo de berda Tûrê Sîna  
Çimê mi akerdî, mi her çî dî û vîna

Ez veta peyê perdeyan ra, kerda dîyar  
Berda resnaya bi rojî, kerda şewledar

A gama ke bi can bîye rayîrwan Zîne  
Canrotoxî ra xo rê deyn kerd no can Zîne

80 Her çend ke gama verêne **“îqlîî”** vat ey  
Labelê aye ra dima, **“îrcîî”** vat ey

---

**dola bimbareka firaze:** Dola/Cêvîya Sîna qest bena. Koyê Tûrî ke Mûsayî serê ci de Homayî dir qîsey kerdo, uca de yo. Zîne qelbê Memî şîbênayo na dole (notê M. Emîn Bozarslanî)

**nûrê Heqî:** O nûro ke serê Koyê Tûrî de ginayo dare ro û verê çîmanê Mûsa pêxemberî de dîyar bîyo. Zîne ruhê Memî şîbênayo a dare (notê M. Emîn Bozarslanî)

**îqlîî:** Yanî Homayî ruhê ma ra vat “Beden ra qut bibe, beden ra qut bibe” (notê M. Emin Bozarslanî)

**îrcîî:** No hetê ayetêkê Qur’anî ra îşaret o ke Homayî tede qalê heylan kerdo û dayo zanayene ke wextê wefatê înan, Homa ruhê înan rê vano “Razî û razîkerde abigeyrê verê Homayê xo.” (notê M. Emîn Bozarslanî)

A ha ameya ke şîma bikero razî  
Bi rizaya şîma bişoro verê qazî

Ke Zîne cîya bibo şîma ra bi xatir  
Ke şîma aye rayîr bikerê bi axir

Abigeyro verê şîma ra pê reqasî  
Hinî bibo zerrîweşa cenetê xasî"



**TEWSÎYE Û TEDARIKÊ ZÎNE SEBA SEFERÊ AXRETÎ  
AMADEKERDIŞÊ ÇÎ Û CIHÊZÎ SEBA VEYVEKÎYA CENETÎ**



Zîne ke ramojna hende sirr û keramet  
Hende menzîl û mertebe, hende meqamet

Dima ronîşte wesîyetê xo kerd aye  
Birayî rê vatî nê qisayê xo waye:

"Ey padîşahê ruhan, padîşahê qelban  
Waye birayî rê, bibo feda û qurban

Wa to rê bibê qurban, her roje di sey Zîn'  
Ez hêvî kena, ti nêbenê keso xemgîn

5 A roje ke mi zerrîya xo daye Memî  
Ardî pêser mi seba xo ra heme xemî

Welatê xerman de ser kewta, bîya serbest  
Xemî teslîmê mi bîyî, û bîyî bindest

Mem seba mi ra, merhemet zî seba to ra  
Xem seba mi ra, seltenat zî seba to ra



Şahê mi, ti mi de meke qewxe û xerez  
Qeneatkar a, bi para xo razî ya êz

Sey Xusrewî ronîşe, baqî bo textê to  
Tace bide xo ser, wa tim weş bo bextê to

10 Birone ti, meclisê keyf û serxweşîye  
Bîya werê ti, şênî û zerrîweşîye

Serxweş bike, xortan û gencan û rihalan  
Zerrîweş bike newe ra pîran û kalan

Vêşî bike ti sebebânê keyf û kayî  
Hîra bike rayîranê zewq û sefayî

Şimitekan û werdekan amade bike  
Carîyan û xulaman zî azade bike

Pirr bike tepsîyan bi şeker û pereyan  
Wa bibê nesîbê feqîr û fiqareyan

15 Çîyê weşî û keyfweşîye bike pêser  
Çîyê mestî û sermestîye bide têver

Wa meclisî pê înan bibê mest û sermest  
Şênîye biyero ronayene dest bi dest

Wa gonîşîrînî pêro arê bidîyê  
Bi reqis û govende pêro bihejîyê

Tewir bi tewir buxûrî, enberî, ûdî  
Miskê boyeweşî, awa gulan zebadî

Nê cinsê nîmetan gelek û gumra bibê  
Bêhed û bêhesab vêşî û derya bibê

20 Wedarîyayo şîyo heywanîyetê ma  
Bîyo kamil û tamam rûhanîyetê ma

Kewenê binê erdî leş û bedenê ma  
Ema resenê yewbînan ruh û canê ma

O nîkaho ke dawetîyê ci melek bê  
Ganî buxûrdanê ci zêde û gelek bê

Çimkî ez û Mem ma hinî sey melekên ê  
Meyldarê eteran û çîyanê pakan ê

Veyveyo ke melekî tede dawetî yê  
Zama û veyveke zî helbet cenetî yê

25 A roja ke to Sitî daye bi Tacdînî  
Senî ke to bajar de ronaybî ayînî

Xeberdar bike heme dikanan û sûkan  
Wa bixemilnê eynî mîsalê veyvekan

Bivaje, wa heme şarê Botan espar bo  
Bivaje, wa heme ordî zî seferber bo

Wa seregerm bibê, mîsalê roja îdî  
Têver de bierzîyê tîfing û cirîdî

Roja ke rayîr kerdbî Sitîya perîye  
Senî ke seba ci ronabî keyfweşîye

30 Ey sultan, ez to ra kena minet û rica  
Ti wesîyetê mi bikerê, bîyarê ca

Ewro şayî û keyfweşîye seba mi ra  
Wa zîyade bo, wa di qatî bo, ey bira

Tedarik bike ti, peyda bike cîhazan  
Amade bike ti, hem sazbandan hem sazan

Sey texterewanê Sitîya gulcemale  
Sey ca û meqamê a perîya delale

Tabûtêka zerrn ra neqîşnaye, rengîne  
Sindoqêka weşîka delala zerrnîne

35 Wa rîpêşê serî qehweyî û şalên bo  
Wa qapaxê serî cilayin û zerrnên bo

Ma her diyan, zama û veyveke qet û qet  
Verê çiman de meke bêqedr û bêqîymet

A gama ke ma şonê zereyê mezele  
Wa xelq û alem mevajo bi nalenale

'Veyveyê Sitî çî rojêka weşe bîye  
Zîne verî ra zî kesa bextreşe bîye!'

Sitî leyê mi de bo, tabûta mi reyra  
Wa Tacdîn zî bi birayê xo Memî reyra

40 Çi tewir ke Mem bibî şoşmanê Tacdînî  
Tacdîn zî bibo şoşmanê Memê rebenî

Wa bibo zerrîweşîye xemê mi reyra  
Û wa bibo şoşman Tacdîn, Memê mi reyra

Ey meyldarê xeyretî, ey sultano hêca  
Tiyê ke her meqsed û miradî anê ca

Heta yew serre bena tamam, bi selamet  
A serre ke kenê vila, çî nan û nîmet

Çiqas ke xelat kenê kincan û lîbasan  
Çiqas ke silayî kenê aman û xasan

45 Çiqas ke lete kenê ti paç û qumaşan  
Çiqas ke vila kenê ti heq û meaşan

Her roje bi nîyetê lej û ceng û şerî  
Çiqas vila kenê pere û nan û werî

Her reya ke textê xo ser o ronîşenê  
Her roja ke eskeranê xo dawet kenê

Çiqas ke kenê pîrr xizînanê vengan  
Çiqas ke kenê şad kesanê zerrîtengan

Çiqas ke kenê maldar kesanê feqîran  
Çiqas ke kenê azad kesanê esîran

50 Çiqas ke meclisê xo de xeberî danê  
Çiqas ke hepsî û mehkuman veradanê

Çiqas ke semedê xo ra serf û xerc kenê  
Çiqas ke xizînan zêde ra dekenê

O qehro ke dişmenanê xo pê def kenê  
O cewro ke zaliman pê berteref kenê

Edaleto ke qandê Homayî ronanê  
Mazlûmanê ke zaliman ra xelisnenê

Kilamanê ke meydanê cengî de vanê  
Gonîya ke canê dişmenan ra rişnenê

55 Hetanî werd û lepa kutikê nêçîrî  
Hetanî vaş û êmê herê binê barî

Sultanê mi, no yo to rê wesîyetê mi  
Serf bike ti înan heme bi nîyetê mi

Zînhar seyr meke heqîqet û mecazî ro  
Binuse hemeyan defterê cihêzî ro

Wa ez verê zamayî de bibî payedar  
A game û a saete nêbî şermezar

Gerçî mi qalê xo zêde kerdî derg-dila  
Bi qaldergîye hişê to kerd qila-vila

60 Ez qurbanê to bî meqsedê ma zaf dûr o  
Wa to ra dûrî bo, gorê ma zî zaf kûr o

Aye ra ez qisey keña wina bi dîqet  
Biyaro zerrîya to ro rehm û merhemet

Semedê min û Memî ra meke şerm û ar  
Gama ke canê xo dano Memo birîndar

Zîne do cenazaya Memoyî reyra bo  
Hetanî cayê mezelan zî ey reyra bo

Wexto ke ez mirena bira, destûr bide  
Wa mezela mi bivirazê kîştâ ey de

65 Memê perîşanî ra cîya mekerê mi  
Bê perde Memî reyra defin bikerê mi”

Zîne ke wesîyetê xo kerd û qedêna  
Nêameyî piro keder û xemî reyna

Mîreyî vat: “Dê ti bişo bivîne Memî  
Eger ke merdo candar bike ê masûmî

Ti bawer bike bi rastîye û bi îman  
Semedê to û Memî ra ez bîya poşman

Eger weş bimanê şima, eger bimirê  
Çin o hinî cîyabîyîş, to û Memî rê"



**POŞMANÎYA MÎR ZEYDÎNÎ SEBA EŞQÊ MEM Û ZÎNAN  
MERHEMETÊ EY SEBA HALÊ NAZENÎNAN  
MERDENA MEMÎ BI VATIŞÊ DERS Û BIRÎNAN**



Zîne ke eşnawitî qisayê birayî  
Ê qalê poşmaniye, qisayê wefayî

Xo xemilna sere ra heta binê payan  
Bîye behrê rindekiye, xerqê gewheran

Dadike, Sitî û sed xizmetkarî piya  
Aşme, roj û estareyê seyarî piya

Pêro piya vejîyayî teber bircan ra  
Durrdaneyî vejîyayî teber durcan ra

5 Sed carîyeyan, Sitî û dadikeyînan  
Girewte Zîne bi merasîm û ayînan

Zîne zana ke nêbeno miradê dilî  
Eke tenya nêvîno ê **şeyxê kamilî**

A zerraya mîsalê zuhreyê reqasî  
Bîye melhema razanê xelwetê xasî

**şeyxo kamil:** Mem qest beno



Wexto ke şîyî restî ê xelwetxaneyî  
Wexto ke abîyî berê hepisxaneyî

Ê pêro bi meşala û bi fener' şîyî  
Dadik û Sitî, çend gamî ci ra ver şîyî

10 Sey sedefêk xo dayo ra verê dîwarî  
Memê xerqê deryayê eşqê gonîwerî

Cano durrdaneyo bêbahayo pak û weş  
Veto ê hinî destê xo ra mift û beleş

Tefênîyaya fanosa zerrî û canî  
Bêaw mendo gulîstanê leş û bedenî

Pers kerd hepsîyan û zindaniyan ra înan  
Halê Memê feqîrê rebenê rebenan

Zindaniyê ke zanenê ê girîftarî  
Înan ci rê vat: "Xo dabî hetê dîwarî

15 Virsikêko ecêb kewt bi Memê jarî ser  
Şewqêko ecêb ci ra vejîya bi teber

Yew mîsalê rojî, yew mîsalê aşman bî  
Yew mîsalê zerrnî, yew mîsalê sîman bî

O roj û a aşme ke resayî yewbînan  
Helîyayî têzere de, kewtî tēmîyan

Gama ke her di bîyî yew, kewtî tēmîyan  
Bi şewq û şemal, bîyî mîsalê ayînan

Bîyî sey ayînan, bîyî roj û roşnîye  
Zindan ma ser o kerd gulîstan û şênîye

20 Mem bi no qayde, bî bêhayî û bêxeber  
Dilo evîndar zî bî heder û derbeder”

Hey nezano ke anêbîyê çimê dilî  
Qet mevaje ke ruh senî beno tecelî

Mevaje ke yan **tenasux** o yan zî **hulûl**  
Mevaje bi no hawa çîyêk nîyo meqbûl

Caran mevaje, na mesela û sanik a  
Caran mevaje, qala betala şenik a

Hewno ke vînenê, o zî bi no meqam o  
Çîyê dîyîşî yo, labelê natemam o

25 Bi hemsuhbetîya Memoyê muhteremî  
Agahdar bibî heme heval û hemdemî

---

**tenasux:** Yew beden ra derbasê yewna bedenî bîyayîşê ruhî. Goreyê bawerîyêk, wexto ke yew beden mireno, ruhê ey derbasê yewna bedenî beno û ê bedenî de ciwîyeno. Zanyaranê îslamî na bawerîye red kerda û vato “Merdişê bedenî dima, ruh alemo manewî de hetanî wextê qî-yametî paweno; ancî keweno bedenê xo yê verênî. (notê M. Emîn Bozarlanî)

**hulûl:** Yew bawerî ya, ke goreyê ci Homa keweno donê tayê kesan û tayê çîyan, bi sûretê ci aseno

**Murşîdê xasî** rindarind înan ro seyr kerd  
Bi qelbê xo qelbê înan ser o tesîr kerd

Hemxelwetîya Memê jarê girîfdarî  
Perdeyê xo antbî serê yar û axyarî

Sitî û dadike ver bi Memoyî şîyî  
Ey reyde qîsey kerd, xeylê mijuliyayî

Vat: "Memo, dê biwurize Zîne ameya  
Ruhê to ya bêşik, a rebene ameya"

30 O lewziwayo teyşanê dîyîşê yare  
Nêame xo ser, bi na qîsa û xebere

Xeylê ante û kaşkerde damara zerrî  
Rîşnaye ser awa gulana, misk û enberî

Bedenê ci de nêvet înan hîsê canêk  
Tenya ey sere ra bîyêne berz dûmanêk

Xo ra şîbî Mem, eynî mîsalê çilayan  
Dûmanê sereyî resayêne bi serban

Zîne ameye verê Memî de tîk bîye  
A aşme her ca ro vila kerde roşnîye

---

**murşîdo xas:** Mem qest beno

35 Perde ke verê cemalî ra kaş bî kenar  
Roj aşma pirre de bî eşkera û diyar

Wina vat Zîne, qisaya xo kerde beyan:  
“Wurize, ey cesedo ke mi dayo ci can”

Şewqê qal û qisaya fekê a şepale  
Verê xo da dûmanê serê a şemale

Şewqî ra adir girewt dûmanê sereyî  
Wexto ke çik erzîya qefesê zereyî

Memo ke xelwetxane de kewtbî îbadet  
Wurişt xo ca ra, seba **tewafî** ard niyet

40 A game bi rastî û duristîye Memî  
Destmajê xo kerd newe bi awa Zemzemî

Nimajge û **meqam** de edilîya biney  
Çareyê xo resna bi Hecerul-Eswed ey

Seba tewafkerdene ver çarna bi Beytî  
Perwaneyî perrê xo resnayî bi zeytî

---

**tewaf:** Dormeyê Kabeyî ro şîyayiş û ameyiş. Na beyte û çend beytanê cêrênan de Ehmed Xanî Zîne şîbênaya Kabeyî, Mem zî şîbênayo hecîyan ke Kabe tewaf kenê (notê M. Emîn Bozarslanî)

**meqam:** meqamê İbrahîm pêxemberî oyo ke duştê Kabeyî de yo (notê M. Emîn Bozarslanî)

A gama ke adir de veyşayêne perrî  
Înan têver de vatî, nê qal û xeberî

**Perwaney' şemale** rê vat: "Ti ya weş delîl"  
Şemale zî ci ra vat ke: "Ti yê weş xelîl"

45 Perwaneyî ci rê vat: "Ti ya **rayîrnuma**"  
Şemale zî ci rê vat ke: "Ti yê **canfeza**"

Perwaneyî vat: "Ti ya deyxê zereyî"  
Şemale zî vat: "Ti yê adirê sîneyî"

Perwaneyî ci rê vat: "Ti kena weş kulan"  
Şemale zî ci rê vat: "Ti kenê weş dilan"

Perwaneyî ci rê vat ke: "Ti ya padîşah"  
Şemale zî ci rê vat ke: "Ti yê qiblegah"

Perwaneyî vat: "Ti ya horîya Homayî"  
Şemale zî vat: "Ti yê roşnîya Homayî"

50 Lewteyşanan têver de, rehet û bêzehmet  
Dilsoteyan qalê xo dirix nêkerdî qet

---

**Perwaney'**: perwaneyî, perwane. Mem qest beno  
**Şemale**: Zîne qest bena  
**rayîrnuma**: rayîrnawitox, rayîrmusnayox. Keso ke rayîr naw-  
neno/musneno  
**canfeza**: ganîkerdox, heyatdayox. Keso ke gan/heyat dano kesêkê bînî

Qisayê xo vatî yewbînan rê a game  
Erz kerde pîya sewdaya xo ya temame

Dadike, Sîfî û ê xizmetkarî pêro  
Hepsîyî, mehpûsî, ê girîftarî pêro

Pê qal û qisayan zîz û seregerm bîyî  
Pê boye û bîne sermest û sersem bîyî

Înan Memê hepsîyî rê vat: "Ey evîndar  
Ma ameyî dîyarê to, mebe bom û har

55 Zîne bîye ser û semedê harîya to  
Mîre zî bî ser û semedê zarîya to

Mîre seba to, bî wayîrê merhemetî  
Zîne zî ameya, bi meqsedê suhbetî

Ha to rê awa heyatî, ke bîyê teyşan  
Ha to rê Luqman, ke bîyê nêweşo giran

Eger Mecnûn ê, ameya verê to Leyla  
Eger Wamiq ê, ameya seba to Ezra

Eger bilbil ê, gule qey to bîya hazir  
Eger nîlufêr ê, roj qey to bîyo nazir

60 Şema ha veşena, eger perwane yê ti  
Îsa ho ameyo, eger ke merde yê ti

Bi no hawa mebe, merdimo dîwane ti  
Nas û şinasî yê, mebe keso pêşe ti

Horîya ke bedenê to rê nefes bîye  
A Zîna ke her daîm to rê hewes bîye

Senî ke wazenê, eynî winî ameya  
Ewro esta meşte çin a, dinya fanî ya

Ti emrê xo erjan meroşe, meke zıyan  
Wa bîlasebeb nêvejîyo to dest ra can

65 Kes nêşimo şerabê ecelgirewtoxî  
Nêvînenno caran yewerê canrotoxî

Ancî pê aqilî xo nas û şinas bike  
Zincîranê cindariye ra xelas bike

Coka akerdî ma zincîr û reseneyî  
Biwurize ma bişorê verê mîreyî

Wayirê keremî, zaf a comerdîya ci  
Sîya perranê **teyra Homayî**, sîya ci

Seba to ra ardê pêser embaz û nasî  
Kerdê amade kinc û xalî û pelasî

---

**teyra Homayî:** Teyra dewlete. Teyrêka mîtolojîk a; sanikan de vajî-yeno ke ništa sereyê kamî ser yan zî sîya perranê ci ameya sereyê kamî ser, o kes bîyo mîre, bîyo hukimdar; yanî bext û şansê ci abîyo. Tîya de meqsed abîyayişê bext û şansî yo (notê M. Emîn Bozarslanî)

70 Seba veyveyî ra ronîyayo textê to  
Talihê to ageyra, bîyo weş bextê to

Ti ke şîyî verê mîreyî restî uca  
Miradê zerrîya to desinde yeno ca

Ti ke senî biwazê, çi bikerê niyaz  
O do bi o qayde, to bikero serfiraz"

Memî ke eşnawitî, nê şîret û pendî  
Wina cewab da ci, ê kesê hunermendî:

"Ez nêşona ver û huzûrê çi mîreyan  
Nêbena bende û koleyê bêçareyan

75 Şahî û wezîrîya dinyaya fanîye  
Her çîyê ci vik-veng, karê hoqebazîye

Pêro boş û betal ê, pêro bêbeqa yê  
Pêro bêaqubet ê, pêro zî fena yê

Mîreyo ke ci rê merg estbo, mîre nîyo  
Ezlbîyîş ci rê estbo, keso bêçare yo

Ma şîyî huzûrê ê mîreyê mîreyan  
Huzûrê ê şahê şahan û fiqareyan

Şahê şahan û sultanen û mîreyan o  
Bexişkerdoxê tometan û guneyan o



80 Neynika nûr û cemalî, ey afernaya  
Tîra xo pê bisk û birûyan, ey musnaya

Fanosa bedenî roşnak û kildar kerda  
Estbîyena xo tede, kifş û dîyar kerda

O mîre hakim o, o mîre **zulcelal** o  
Tim textê xo ser o, o mîre bêzewal o

A dinya de ma kerdî wayîrê mareyî  
Ma kerdî ebedî, bi emrê bêşubheyî

Baxê naz û pîlîye de neweber ê ma  
Hezar şukir ke bakîr û muteber ê ma

85 Heşa ke ma, no war û qonaxo fanî de  
Bê ke ca bibê, cenetê cawîdanî de

Ma zîna bikerê, ke karê heywanan o  
No mesken de, ke aqubetê ci wêran o

Nêbeno ke ma bibê kesê rîsiyayî  
Rezîl û ruswa bişorê verê Homayî

Heqî seba ma, horî û xilmanî têde  
Amade girewtê, baxçeyê cenetî de

---

**Zulcelal:** Wayîrê celalî, Homa

Ê nika pawenê merdiş û wefatê ma  
Ê nika goynenê veyve û dawetê ma

90 Labelê cenetê aşiqan uca nîyo  
Cenetê înan cayê dîyîşê Heqî yo

Baxê cenetî ra, berz o uca **dahanî**  
Linge nêvisnenê ci horî û xilmanî

No yo, çîyo ke Heqî ra hêvî kenê ma  
Ney ra qederî, yewna çî nêwazenê ma”

Memî ke meqsed û miradê xo vat axir  
Verê ci de ber abî, bî hedre û hazir

Teyro ke berê qefesî ci rê abîyo  
Winî perra û şî ti vanê qet çin bîyo

95 Destê xo na dinyaya fanîye ra şutî  
Perrê zerrîya xo dayî piro û kutî

Dinyaya gewre ser ra, ê teyr û şebazî  
Ver bi qatê Heqî, kutî perr û perwazî

---

**dahanî:** dahîna, daha, hîna



**TAZÎYE Û MATEM Û ŞÎNÊ MEMÊ ŞEHÎDÎ  
MERGÊ BEKIRÊ FESADÎ BI DESTÊ TACDÎNÊ SEÎDÎ**



**Şingiro** ke hedîse ra bîbî xebardar  
Seba ma hal û mesele, wina kerd dîyar

Ey vat: "Can ke hepisê tenî ra bi cuda  
Feryad û fîxan heme bajar de bî peyda

Bî welwele, bî qîrrayiş û zarezare  
Bî zelzele, hemeyan xo eşt, bi heware

Botan, pîlan ra heta qijan û tutekan  
Cenîyan ra heta keynekan û veyvekan

5 Muteberî, qedrberzî, kesê giregirî  
Cahil-ciwanî, neçarî, kesê feqîrî

Bajar de nêmend, keso zerrîweşo keyfbaş  
Heme kewtî têmîyan, bîyî şaş û pêşaş

Pêro pîya erzîyayêne ver bi Memî  
Hemîne derd kirişnayêne ser bi xemî

**şingir:** şingirewtox, keso ke şîn gire dayo

Tacdîn û Bekir rastê yewbînan ameyî  
Pîya eynî rayîrî ser o vejîyayî

Tacdîn: "Ey sebebê fesadîya alemî!  
Şeytano koro ke kewto dilqê ademî!

10 Ey ecdadê pexîl û qefçil û fesadan!  
Wey manîyê arzû û mirad û meqsedan!

Ey **perdedirê** aşiqan, Meman û Zînan  
Wey **daxkêşê** serê dirbetan û birînan

Ey îblîso pîso bêrehm û bêmerhemet  
Dê bes nîyo, to ma ser o kerdo qîyamet!

To derheqê Memoyî de, fesad qisey kerd  
To o bêgune ma dest ra, vet û girewt berd

Munafiq û maro sîya yê, neyar ê ti  
Hîna zî verê çiman de yê, dîyar ê ti

15 Binê erdî Memî rê, serê erdî to rê  
Ti wina şad û bextewer, piro bigeyrê!"

Tacdînî Bekir ca de ravist bi erdî ser  
Bedeno pîso mirdar canî ra kerd cêser

---

**perdedir:** perde dirnayox

**daxkêş:** keso ke dirbetan dax keno

Tacdîn ke şî resa leyê Memê birayî  
Dî ke nûrê xo kerdo vîndî ê çirayî

A game serê xo ra tace û **tomarî**  
Vetî eştî serê bedenê Memê jarî

Aqil kerdbî vîndî bi hesretê birayî  
Kam ke bidîyêne, Tacdînê ejderhayî

20 Waştêne hema canê ê kesî bigêro  
Sey Bekirî derg û pehnê erdî bikero

Kes nêşkayêne bibo muqabilê ci  
Bêşik Tacdîn do bibîyêne qatîlê ci

Neçar mendî, xebere daye bi mîreyî  
Mîre ame û girê da pê reseneyî

Wexto ke înan cenaza daye kiftan ser  
Şehîd cayê şehadetî ra vet bi teber

Asa verê çimanê înan de elamet  
Rabî qelebalixî mîyan de qîyamet

25 Dêvo ke înan girê dabî pê tedbîrî  
Qerifnayî xo ser ra qeydî û zincîrî

---

**tomarî:** kaxitê ke seba wezîran nusîyayê û hetê mîreyan û hukim-  
daran ra îmza û mor bîyê; beratê wezîran (notê M. Emîn Bozarlanî)

Kemend û zincîrî lete kerdî şikitî  
Ber û perdeyî parçe kerdî wedaritî

Ejderha ke eşkefte ra vejîya teber  
Desinde vaşt bi cenazaya Memoyî ser

Tabûte daye sereyê xo ser Tacdînî  
Fîxanê ci bî berz, resa rîyê asmênî

Kam ke esto şehre Cizîre de ademî  
Hemeyan daybî xo ra lîbasê matemî

30 Çiqas ke estbîyî bajar de naskerdeyî  
Cenî û keynekî û veyvekê neweyî

Hemeyan akerd bî sere, bisk û gilayî  
Hemeyan daybî xo ra çinayê sîyayî

Bê leçekan û bê çîtikan mend bî pîya  
Hemeyan seba Memî girê daybî sîya

Dadike, şîngirêdayeyan, mihrîbanan  
Pîya kerdbî nale-nal mîsalê goyînan

Înan lornayêne Memî ser o bi aheng  
Zîne wurişte payan ser, çapik û çeleng

35 A aşme pirre, bi vengê dawul û sazan  
Ver bi cenaza şîye bi kay û reqesan

Verg û heşî, benîademî, morcelayî  
Teyr û tûrî, dar û berî, mûr û melayî

Ê pêro semedê Memî ra nalayêne  
Her yewê ci bi hawayê xo kalayêne

Komê sîyayî, yê şîndaran û şîngiran  
Gurrayêne tim, mîsalê **hewranê pirran**

Alişkanê mîsalê gulan ro hemeyan  
Kerdêne war hesirê gonînî sey layan

40 Merdimî vatêne qey wextê wisarî yo  
Gulşenan de vareno, wextê yaxerî yo

O şîn û matem, o sîyapiragirewtiş  
Pê çarşefan û pûşîyan xotêrapîştîş

Botan de o wext û o dem ra bîyo edet  
O do dewam bikero hetanî qîyamet

---

**hewrê pirrî:** hewrê bi şilîye/varanî dekerde, hewrê ke şilîye ci ra zaf varena



**ARZÛ Û HÊVÎYA ZÎNE SEBA BEKIRÎ  
UZIR WAŞTIŞÊ AYE SEBA Ê KAFIRÎ**



Wexto ke ê şîyî goristan, cayê goran  
Dî ke meyîtêk eşto mabeynê **di daran**

Eşto rîyê erdî ser, mîsalê mirdaran  
Mîsalê bêkesan, mîsalê bêwayiran

Persayî û vat: "No çî keso bêwayir o?"  
Înan ci rê vat: "Merdimo suçdar Bekir o

Tacdîni o rîyê dinya ser ra **fena kerd**  
Alem bi fenayîya ey keyfweş û şa kerd"

5 Sanikvajî seba mi wina kerd rîwayet:  
Zîne senî ke eşnawit hal û hîkayet

Mîre û Tacdîni rê, nê qalê xo vatî:  
"Ey şah û wezîro wayîrê ferasetî

Ez hêvî kena şîma nêkê înadîye  
Seba Bekirê serçîmeyê fesadîye

**di darî:** darbest qest beno

**fena kerdene:** kiştene, helak kerdene



Çimkî Rebê aleman, Rebê îns û canan  
Rebê mexlûqatan, Rebê erd û asmênan

Roja ke eşq dayo kesanê sewdaseran  
A roje kîn zî dayo kesanê kîndaran

10 Wexto ke çinêbîyiş ra ma afernayê  
Têver de kerdê hewcedar, pêra besnayê

Ma gulê sûrî yê, Bekir seba ma **xar** o  
Ma xizina yê, Bekir zî seba ma mar o

Xizînayî muhafeze benê bi maran  
Gulê weşikî zî pawîyenê bi xaran

Roja verêne ra Bekî bi ma cefa kerd  
Labelê peynîye de zî bi ma wefa kerd

Eyan xebitîya qey muxalefetê ma  
Pinhan xebitîya qey muwafeqetê ma

15 Ma rê nêbîyêne asteng û manî eger  
Eşqê ma do bibîyêne betal û heder

Gerçî ey semedê xo ra çîyo xirab kerd  
Labelê derheqê ma de çîyo sewab kerd

O bî sebebê rastî û heqîqetê ma  
Bî rayîrwanê rayîr û terîqetê ma

---

**xar:** telî, na çekuye bi fariskî ya

O zî na rayîrwanîya ma de şehîd o  
Şîma bawer bikerê ke o zî **seîd** o

O mekanê şehîdano ke tede yo Mem  
Helbet a mezela ke tede yê ma her dem

20 Zînar Bekî ci ra mehrûm mekerê şîma  
Çayê ke bi ê kutikî pawîyayê ma

Wexto ke ma şîyî cayê berzê corênî  
**O do xo bido verê suxberê cêrênî**"

Însaf, semedê xatirê Homayî, însaf  
Eynike ancax hende bena xalis û saf

La caran mumkin o ke awke û tasike  
Xo mabeyn de qebûl nêkerê kîn û rike

La pewteyanê eşq û sewda ra qederî  
La soteyanê eşq û sewda ra qederî

25 Yewer bianco hende ezîyet û cefa  
Yewer nîşan bido safî û wefa

Ê merdîmî tim wayirê merhemetî yê  
Coka layiqê nîmetanê cenetî yê

---

**seîd:** berzbîyayox, keso ke ver bi cor beno berz

**O do xo bido verê suxberê cêrênî:** Tîya de ayetêka Quranî îşaret bena. Na ayete de behsê Eshabê Kehfî û kutikê înan Qitmirî beno û vajî-yeno ke "Kutikê înan zî suxberê cêrênî de her di zendê xo derg kerdbî." Tîya de Zîne Bekir şibênayo ê kutikî (notê M. Emîn Bozarslanî)



**KEFENKERDIŞ Û DEFINKERDIŞÊ  
MEMÊ XEMGÎNÊ XEMGÎNAN  
HEMNEFES Û HEMQEFESBÎYAYIŞ  
BI ZÎNA NAZENÎNA NAZENÎNAN**



Welhasilî, şehîdê eşqê gonîwerî  
Qurbanê tehdâyî, kişteyê darê zorî

O kişteyê suc û cirmê bêguneyîye  
Oyo sey beratê şahî û mîreyîye

Bi nûrê pakê temîzî kefen kerd înan  
Qebra ting û tarîye de defîn kerd înan

Teslîmê xizîna kerd, Memoyo sey durrî  
Verê lingan de ca kerd, Bekiro sey marî

5 Ronayî verê sereyî de elametî  
Yanî "No bi xo yo serwerê qîyametî

Seresparê qebîlaya pakbazan no yo  
Pîl û serdarê heme serfirazan no yo"

Zîne ameye, bi qama sey senewberan  
Sîya xo daye ser, mîsalê selwîyêran

Bila perde, mîsalê neyî nalayêne  
Têdima hesirê çiman gurgurnayêne

To vatêne qey ameyo wextê wisarî  
Deryayan varnenê rîyê erdî ser hewrî

10 A şilîye ke varayêne serê gorî  
Her yew dilopa xo bîyêne des heb durrî

Wexto ke derdê zerrî dest ra kerdêne "ah"  
Ê heme matemîyan zî neûzubillah!

Bîyêne şîrîkê ci, bi meqam û aheng  
Kewtêne her new felekan ser awaz û veng

Esker û esparan, kesanê giregiran  
Derwêş û dewijan, merdimanê feqîran

Dildaran, nazenînan, rindan û şepalan  
Horîyan, perîyan, înanê sebrê dilan

15 Pêro û pîya kerdêne hewar her kesî  
Fîxanê ci resayêne **çerxê etlesî**

Zîna ke çin o hinî hêz û quwetê ci  
Nalayîş zî birîya, nêmend qudretê ci

---

**çerxê etlesî:** Goreyê astronomiyê Batlamyusî asmêno/feleko newin. No felek feleko peyên o û pîlê heme felekan o

Şîye verê sereyê Memî a xemgîne  
Ci rê nê qalê xo vatî a nazenîne:

“Ey oyo ke xo rê kerdo milk beden û can  
Ez bax û baxçe ya, ti baxwan û baxçewan

Baxo ke to resna, bêwayir û wêran o  
Bê rîyê to o bax, derey çiyî rê beno!

20 No baxê gulan; perçemî, birûyî, biskî  
No husn û cemal; çene û çimî, alişkî

Çimê sîyayî sey vaman, çimê şehlayî  
Henarî, beyî, sayî, şaxê berz balayî

Weş o rengê înan, lezetdar ê **bitehm** ê  
To ra teber kesanê bînan rê heram ê

Ez beşna sey xurmeyêran biraşanî  
Ez do heme meyweyanê ci biroşanî

Sunbul û alalanê nûrdaranê geşan  
Nê rihanan û menefşeyanê boyweşan

25 Yanî por û perçeman, nê bisk û birûyan  
Hewle a ya ke ez bikî talan û wêran

---

**bitehm:** tehmdar, tehmweş

Parçe parçe bikerî kincanê sey gulan  
Biverdî sereyî ser de herran û welan

Heme porê xo biruçiknî ta bi ta ez  
Heqê xo o yo ke bidejnî ca bi ca ez

No bax û baxçe, nê meyweyî, lejg û gilî  
Pind û pelî, heme çiçegî, şax û vilî

Nezirê ewnîyayîşê to bîyî tek-tek  
Weqfê her di çimanê to bîyî mubarek

30 Ez do hemîne bikerî wêran û talan  
Wa çi rey nêbê para cahil û cuhûlan

Lakîn xo bi xo fikirîyena ez her dem  
Belkî ti bi mi bikerê lome û sîtem

No hal bi nezerê to nêbo çîyo meqbûl  
Ez tersena mi bigêrê sebeb û mesûl

Wucûdo ke beden û can ra yeno meydan  
O, milkê to yo, nîyo bêwayir û xopan

Eger ke nuqsan bibo rîyê mi ra muyêk  
Beno ke ti bi mi bîyarê hêrs û sûyêk

35 Wexto ke bi mi bikerê sîtem û ezab  
Ez zanena ke nêşkena bidî cewab

Nêzdî yo, ez zî sey to aqil kena zîyan  
Wextê ci yo, ma hinî resenê yewbînan

Hewle a ya, tedarikê xo bivînî ez  
Na dinyaya gewre ra destan bişuwî ez

Baş o ke ez bi na semtîye, nê cematî  
Nêdî bisk û birûyan ezab û zewalî

Teslîm bikerî emanetê Heqê pîlî  
Ez xo biresnî to, bi nê husn û cematî"

40 Bi no tore îfade kerd Zîne heqîqet  
Nêmend bi dinya eleqeyê ci qet û qet

Verarda xo mezele ser ra arde pêser  
Bedenê bêzar can ra bî cîya û cêser

Destê xo can ra şutî a game bi zerrî  
Finda nûrdare xow ra şîye, biye tarî

Ruhê xo resna huzûrê Homayê corî  
Bedenê nazik zî kerd bi zereyê gorî

Ê şîngirêdayeyanê dilbirîndaran  
Newe ra dest kerd bi bermayîş û hewaran

45 Zerrî-can ra fixan kerd înanê haziran  
Dest bi ax û feryad kerd înanê naziran

Feryad û fixanê rîyê erdê sîyayî  
Şîyî resayî asmênê berzê balayî

Zîne anegoreyê tore û ayînan  
Seba definkerdîşî kerde hazir înan

Mezelo ke Memo meleknezer tede yo  
Yanî o sedefo ke o cewher tede yo

Da xo ro û ser o bermayî lay û laser  
Şilîya hesiranê çiman varnaye ser

50 Mîsalê cewheran varnayî ser hesirî  
Reyna akerd înan qapaxê serê gorî

Ê her di cewherî eynî ca de, durcêk de  
O roj, a aşme; pîya têver de, burcêk de

Bê wasita her di zî pîya defin kerdî  
Her di têver de teslîmê yewbînan kerdî

Yanî newe ra akerd qapaxê sendûqe  
Mîreyî vat ke: "Memo, ha to rê maşûqe!"

Hîrê reyî cesed ra veng û seda ame  
Her hîrê reyî zî ci ra "merheba" ame

55 Hemeyan ke no vengo heqîqî eşnawit  
Pê bawer kerd înan, qîymetê eşqî zanit



Helal bo ci rê, hezar pesnî seba înan  
Nêbîyî meyldarê dinyaya gewre caran

Qet xo nêlebitna bi herre û harşike  
No bî eserê sewdaya temîza pake

Ê şîyî, sadiq û zerrîrehet û temîz  
Ê şîyî, bakîre û serfiraz û ezîz

Bê ke mirad bigêrê pêra lewziwayî  
Bi ax û hesret şîyî huzûrê Homayî

60 Zaf weş ciwîyayî bi eşq û sewda wellah  
Zaf weş bar kerd na dinya ra tebarekellah

Kesê ke bi ciwanîye, mîsalê Zîne  
Bineqîşnê heyatê xo bi sînayene

Yan sere bidê qey eşqî, sey Memê jarî  
Weşîye bikerê qurbanê nê rayîrî

Bêguman ke yeno werê miradê înan  
Bêguman ke beno hasil meqsedê înan

Ya Reb, ti bi rincanîya eşqê sadiqî  
Ya Reb, ti bi kemalîya sidqê aşiqî

65 Ya Reb, ti bi şîrinîya husn û cemalî  
Ya Reb, ti bi sînayîşê pîl û celalî

Ya Reb, bi derdê hîcran û cîyabîyişî  
Ya Reb, bi zewqê wuslat û pêresayişî

Ya Rebî, ti bi zerrîweşîya hebîban  
Ya Rebî, bi zerrîsîyayîya reqîban

Ya Rebî, ti bi nazdarîya nazenînan  
Ya Rebî, ti bi nîyazdarîya xemgînan

Ya Reb, bi hesiranê çîmanê bilbilan  
Ya Reb, bi şebnemanê pelanê sûrgulan

70 Ya Reb, bi hesiranê sûran ê Mecnûnî  
Ya Rebî, ti bi rîyê Leyla yê gulgûnî

Ya Reb, bi Memê jarî û a sînayene  
Ya Reb, bi hesretdarîya Zîna rebene

Wexto ke ti cîya kenê beden ra canî  
Wa eşq û sewda ra bêpar nêmano Xanî

Yanî sewda û bengînîya Mihemedî  
Ti zîyade nêvîne seba nê Ehmedî

Ehmed ho pêxemberî ser çend qalan vano  
Bengînîya ci zî arzû keno, wazeno

75 O tim û tim bengînîye vano vindeno  
Labelê bela yo çîyo ke pê geyreno

Boş û betal ê, heme qal û vateyê ey  
Şaş û xelet o, heme kar û gureyê ey

Çîyo ke vano zahiren delal û baş o  
Çîyo ke keno batinen xelet û şaş o

Sey Memî wexto ke Xanî teslîm keno can  
Sey Bekirî, ti ey bide xatirê qencan



**SALIXDAYIŞÊ ALEYDARÎ Û ÎXTÎLAFÊ XÛLQETÎ  
NEWE RA PEYDABÎYAYIŞÊ XÛY Û FITREÎ**



Hîkmet o yo ke terk kerd no xan û na dinya  
Verê xo da bi koşk û seraya a dinya

Labelê terk nêkerd, cins û cîbiletê xo  
Her yew aferîya, bi xûy û xûlqetê xo

Mezela Memê jarî, yê Zîna rebene  
Bîye kewe, bi zîraetê heskerdene

Weameyî di leyekî, teze û serkeş  
Sere wedarit pîya, serxweş û zerrîweş

5 Yew dara senewbere, yew dara selwîye  
Her di teze û narîn, her di zî bi sîye

Destî milê yewbînan ser o ardî pêser  
Beşna delale kerde derg û dayê têver

Mezela Bekirî ser ra sere vet darêk  
Bîye zergûn û kewe; mendêne sincêrêk

Aramî û rehetîye ra, bêpar bîye  
Sey wayirê xo Bekirî, xerezdar bîye

Weameye tavil, xo resna her di daran  
Bîyê manîyê pêrestîşê her di yaran

10 Nêeşkaya bi înan îdare bikera  
Dişmenîye ci kerda, elem û eşkera

A sincêre xo resna ê her di hebîban  
Kewte mabeynê înan mîsalê reqîban

Welhasilî kelam, bi qirm û şax û gilan  
Xo lefêna bi piro, mîsalê fuzûlan

Kesê ke bêesil ê, û çin o rîyê xo  
Caran nêteriknenê exlaq û xûyê xo

Ti eke çewres serrî bironê **henzele**  
Bi hingimên awe bidê hele bi hele

15 Weye bikerê aye pê rojî, pê tîje  
Awa gulan birişnê ser her dem her roje

Bi kardî her roje reyayan abikerê  
Zêde û zîyade ra şeker debikerê

Ver de bixebitîyê mîsalê **hindîyan**  
Caran seba to gêna herinda **hindîyan!**


Mevaje ke derey, dana çi mehsûl û ber  
Semereyê ci çin o, tehlîye ra teber

---

**henzele:** fekîyêka sey beşîlayan a, la beşîlayan ra zaf qickek a; bi tehnas bîya û bîya nîşanê çîyanê zaf tehlan (notê M. Emîn Bozarlanî)  
**hindî:** kesê Hindîstanî, keso ke bi eslê xo hind o / **hindî:** zebeşe



MÎSALÊ SERENCAMÊ BENÎADEM Û MALÎ  
YÊ NE BI GOREYÊ ZAHIRÊ SÛRETÊ HALÎ  
BELKÎ BI GOREYÊ BATINÊ MANA  
YÊ GIRÊDAYEYÊ ÎRADEYÊ HOMAYÊ PÎLÎ



Keso ke agahdar bî, bi halê **eyamî**  
Bi no tewir mi rê kerd behsê **serencamî**

Ey vat: Extîyarêko zerrîweşo aşiq  
Qalê ey sey serê şodirî rast û sadiq

Wexto ke çimî bestêne, kerdêne efkar  
Ruhî zor berdêne beden, bîyêne zordar

Sirrî çiman ver de bîyêne kifş û eyan  
Asmênê Heqî de bîyêne keso seydwan

5 Eke bîyêne **xayib** alemê herre de  
Eke bîyêne **xalib** alemê zerrî de

---

**eyam:** zeman, dewr, dewran

**serencam:** peynîye, nihayet, netîce

**xayib:** vîndîbîyaye

**xalib:** serkewte, muzafer, serfiraz

Bi sirranê Lewhê Mehfûzî qelbo mehzûn  
Tim û daîm bîyêne xebêrdar û memnûn

Sirrî ke verê çiman de bîyêne dîyar  
Kesê wayirê meqaman kerdêne haydar

Ê extîyarî yan bi hewn yan zî bi îlham  
Bi no qayde heqîqet kerd eyan û îlam

Ey vat: Ez şîya dîyarê baxê Ridwanî  
Mi dîyî di hezarî horî û xilmanî

10 Ê pêro û pîya yew qesre de xizmetkar  
A qesre zî seraser bi durran xemildar

Yewero tacdaro sîlehdar, sey Bekirî  
Vinderto uca de, xo dayo verê berî

Ey dest de estbîye çoganêka heyzeran  
Mi nêzana ke kam û çi kes bi, bincaran

Mi ci rê vat: "Ey tiyê ke mertebadar ê  
Ti wayirê na qesre yê, yan nobedar ê?"

Vat: "Ey şeyx, qey ti nêzananê ez çi kes a?  
Ez berwanê mîreyî, Bekiro nekes a

15 Pardarê Zîna rebene, Memê jarî ya  
Ez tîya de zî kesê verê suxberî ya

Na seraya ke bi heşt tebeqan eyan a  
Bi qatêk yê mi, bi hewt qatî yê înan a

Ez tîya de emîn, merdimo destbidar a  
Ema nê milkî ser o keso hîsedar a

Her çiqas ke ez nobedar û dergewan a  
Labelê bi mekan zî şîrikê înan a”

Mi ci rê vat kê: “Ey merdimo **weş-serencam**  
Nê meseleyî bike eşkera û îlam

20 Gerçî zêde yo lutf û îhsanê Homayî  
La çira dayê to nê mekan û nê cayî?”

Vat: “Şeyx, ti hîna zî nêbîyê keso arif  
La halê dinya ser bîyê merdimo waqif

Ez bi halo eyan neyarê înan bîya  
Ema bi halo pinhan yarê înan bîya

Mi ê dinyaya fanîye ra antî peyser  
Bander kerdî, musnayî izdirab û keder

Mi ê hes û hewesê dinya ra kerdî pak  
Bi dax û derdan mil ard war, kerdî kedernak

---

**weş-serencam:** peynîya/netîceyê ci weşîye ser  
**înan:** Mem û Zîne qest benê



25 Mi zîyade ra ard ser de elem û keder  
Ê zî bîyî kesê qedrberzî, şîyî aver

Aye ra, mi tim duştê înan de qisey kerd  
Nê qisayan peynîye de sereyê mi werd

Na dinya û a dinya têver de hewî yê  
Her di wesnîyî zî têduşt de zaf qewî yê

Hetanî destê xo nêşuwê yewere ra  
Tehm nêgênê ti, ne naye ne zî aye ra

Mi yewere kerde teber semedê înan  
Ê serê erdî ra vetî serê asmênan

30 Mi dayo bi înan heme no bax û baxçe  
Înan zî dayo mi ci ra yew gil û gilçe”

Mi goş da qal û qisayanê Bekirî ser  
Vat: “Ey bextreşo aqubetê ci xeyrî ser

Tacdînî ti kîştê, bê cirm û bê cinayet  
Heq tealayî çi kerd, seba ey înayet?”

Vat: “Cenabê Heqî bexişna, Tacdîn ef kerd  
O kerd keso cenetî, adir ra muaf kerd

Rebê ezîmşanê wayirê merhemetî  
Bexişna o, ci rê akerd berê cenetî

35 Alem bîbî bêzar, xirabîya mi dest ra  
Hinî neçar mendbî, fesadîya mi dest ra

Ey ez kişta, semedê nîzamê alemî  
Semedê huzûr û întîzamê alemî

Ey zahiren kerde şaşî û xeletîye  
Batinen ronaye başî û rehetîye

Kar û gure esto ke zahiren xirab o  
Kar û gure esto ke sûreten sewab o

Yewer edalet o, bi sûretê cefayî  
Oyo bîn zî qehr o, bi kîsvetê wefayî

40 Ema **Perdekêşê** nîşananê hîkmetî  
Bê sirr nêverdayê xizînayê qismetî

Pare nêkerdê ê, bi kesanê nexasan  
Bîlhesa girewtê dayê dostan û nasan

Homayî ê qey her kesî nêkerdê dîyar  
Dayê tayênan, tayê ci ra mendê bêpar

Hezar şukir ke Tacdîn û ezo lanetî  
Sayeyê Memî û Zîne ra bitaybetî

---

**Perdekêş:** Homa qest beno.

Bêpar nêmendî ma, rexmê hendê guneyan  
Homayî rehmêtê xo, seba ma kerd eyan”

45 Ey dost, yan bi zerrî-can bibe yarê qencan  
Yan zî bi kîn-kîbir bibe neyarê qencan

Ê qenc ê, bêguman ke qencîye zanenê  
Qencîye ra teber yewna çî nêzanenê

Ti çiqas duştê înan de bibê cefakar  
Ê do ancî duştê to de bibê wefakar

Zînar mebe embazê xiraban û qelpan  
Ne dost ne zî dişmenê kutikan û kelpan

Bibê dostê ci; ê do to bikerê mirdar  
Bibê dişmen; ê do to bikerê birîndar

50 No hîmet, xasê merdimanê aşiqan o  
No paye, rayirê kesanê sadiqan o

Kesê ke sey Bekirî suçdar û qelaş ê  
Bi heme kar û barê xo neheq û şaş ê

Yan zî kesê ke sey Tacdînî zulimkar ê  
Qatil û cigerdar, kesê ke dilawer ê

Ef benê ê, bi kerametê sewdaseran  
Muaf benê ê, bi hîmetê sewdaseran

Beno qewet ci rê, ardimkarîya înan  
Beno layiq ci rê, teqîbkarîya înan

55 Bi rastîye no îşaretêko letîf o  
Baş û hol îzan bike, çîyêko zerîf o

Ti baş îzan bike meseleyî muderîs!  
Ti hol texmîn bike **mesaheyî** muhendîs!

Dîşmenî ke bi eşq bibê kesê pardarî  
Ema mehrûm bimanê ci ra dost û yarî!

Eger ke wina bo, eleqeyê reqîban  
Do bi çi derece bo, payeyê hebîban?

Heskerdoxî ke bibê kesê heskerdeyî  
Homawaşttoxî ke bibê kesê waştayî

60 Heqîqetî tenya û tenya Heq zaneno  
Heqî ra teber çew qet teba nêzaneno

---

**mesahe:** rîpeyme, rîverîye (hêga, baxçe, erazî ûsn.)



**ÎSBATÊ XASÎYET Û KEMALÊ CEWHERÊ EŞQÎ KE EŞQ  
KÎMYAYA PÎLE Û KUKURDO SÛR O SEBA WAYIRÎ  
ZÎRA KENO MELEK BI NEFSÊ ÎNSANÎ  
HEYWAN Û ŞEYTAN Û CINAWIRÎ**



Ey goşdarê sanikan û qalanê zûran  
Xîretkarê qiyas û tefsîr û tabîran

Xanî bi qedehanê eşqî bî dîwane  
**Meyo solin** ci rê bî şîrin û şehane

Winî zêde şimito ke ê nehişyarî  
Nêzaneno ke vatê çi qal û xeberî

Keyf û zewq o karê Xanîyî; mestane yo  
Goreyê urf-edetan nîyo; dîwane yo

5 Şerabwer o Xanî, hem mexmûr hem serxweş o  
Her çiyî keno têmîyan ra, şerabroş o

Qalê Xanîyî mîsalê va û hewayî  
Şima goş bidê ser; manenê vengê neyî

**kukurd:** Madeyêko kîmyewî yo, verî zaf qîymetin biyo, însanan bawer kerdo ke çîyan vurneno, çîyanê xirabanê qelpan zî keno baş û weş (notê M. Emîn Bozarslanî)

**meyo solin:** Naye ra qesdê Xanî kurdkî ya. Seba ke o wext edîban qîymet nêdayêne kurdkî û eserê xo bi fariskî û erebkî nuştêne, û seba ke Ehmedê Xanî zî eserê xo bi kurdkî nušto, coka halê xo wina îfade keno.

O ney helal nîyo ema heram zî nîyo  
Bê perde yo labelê bê meqam zî nîyo

Tazî û erebî û farisî û kurdî  
Bi **hezl û bazî** tertîb kerdî û pêardî

Tayê bi efsaneyanê terefê Botan  
Tayê bi behaneyan tayê zî bi fortan

10 Bi **mihemedkî**, bi **silivî** û bi **botî**  
Tayê zerrn û sîmî, tayê lal û yaqûtfî

**Mûrayê mawî**, mircanî, sedef û la'î  
Tayê çiyê lêlî, tayê çiyê zelalî

Xemilnayî sey hurdî-letan û qijekan  
Ardî bi çarşîyan û bazaran û sûkan

Tayê ci sanik ê, tayê ci zî mîsal ê  
Tayê ci heram ê, tayê ci zî helal ê

---

**hezl:** Şiîre de seba pêameyişê wezn û qaffiyeyan cîya-cîya çekuyan ra îstifade kerdîş (notê Kadri Yıldırımî)

**bazî:** kay, eser de "kayê çekuyan" (notê Kadri Yıldırımî)

**mihemedkî, silivî û botî:** Seba ke o wext mîreyê welatê Serhedî mîr Mihemed bî, coka "mihemedkî" ra qesdê Ehmedê Xanî sey fek kurmanckîya mintiqaya Serhedî yan zî Bazîdî ya, "silivî" ra qesdê Ehmedê Xanî kurmanckîya mintiqaya Silivân û "botî" ra zî qesdê Ehmedê Xanî kurmanckîya mintiqaya Botanî ya. Yanî Ehmedê Xanî kurmanckîya nê her hîrê mintiqayan kerda tîmîyan û pê eserê xo *Mem û Zîne* nuşta.

**mûrayê mawî:** Murayê girdê keweyî ke cam ra virazîyayê, hîna zaf dekenê vile û çareyê golîgan.

Sanikî hîse ra pardar û biqismet ê  
Eke bizanê, mîsalî zî bişîret ê

15 Lakîn qesdê ey bi hende qiseykerdişî  
Meqsedê ey bi hende berdiş û ardişî

Zahirkerdişê cemalê eşqî yo helbet  
Sabitkerdişê kemalê eşqî yo helbet

Eşq yew eyne yo, eyneyo **Homa-nûma** yo  
Mîsalê rojî yo, binûr û bizîya yo

Duştê eşqê rastikênî de mebe xafil  
Baş bizane rayirê rastî, mebe cahil

Eşq gewherê gewheran o, cinsê kîmya yo  
Bizane qedr û qîymet, eşq giranbaha yo

20 Kesê ke sifir û paxir ê, bêcîla yê  
Qelbê ke sexte û yatme yê, bêqela yê

Eşq bi xo gewher o, înan keno mucewher  
Eşq bi xo cîla yo, beriqneno seraser

Kam ke verê xo bido eşqî, bibo meyldar  
Bincaran nêmaneno bênesîb û bêpar

---

**Hûma-uma:** Çîyo ke Homayî ramojneno, yanî nawneno.

**Eynaya eksî** yo, çin o eşqî rê mîsal  
Xizînaya sirran o, çin o ci rê zewal

Çin o caran keso ke eşq ra bêeser o  
Eke estbo zî keso zewq ra bêxeber o

25 Ganî her kes anegoreyê qudretê xo  
Qey eşqî serf bikero hêz û qudretê xo

La ekserê alemî cahil û nezan o  
Nefsê xo ra bêxeber o, bi xo nêzano

Zaf ê kêmaqil û safî, kesê ehmeqî  
Hemeyê înan zahid û sofî û feqî

Cahil û newende yê, merdimê sefil ê  
Bêpîr û bêrayber ê, kesê bêdelîl ê

Nezanîye rê benê muşterî, eşq gênê  
Sermayeyî qey çîyanê vengane xerc kenê

30 Tayê xerc kenê semedê cuya na dinya  
Tayê zî herînenê seraya a dinya

Di hetî zî zerar kenê, benê zîyandar  
Lezet û zewqê eşqî ra manenê bêpar

---

**eynaya eksî:** eynaya ke sûretê çîyan apey nişan dana, dana ekskerdişî





**BEYANÊ MERTEBE Û DERECEYANÊ  
RAYWANÎ Û WUSÛLÊ ÎLELLAHÎ  
MERASIMÊ FENAYÊ FÎLLAH Û BEQAYÊ BÎLLAHÎ**



Saqî, hela bivaje mi rê, no çî hal o  
No çî ecêba hewn o, ecêba xeyal o?

Bi tabîran mevaje ke çîyo betal o  
Bi teswîran mevaje ke çîyo xeyal o

Destpêkê xo sey heyatî yo, cuyayîş o  
Ema netîceyê xo merg o, candayîş o

Bi xo wucûd o, la bêcan û bêbeden o  
Zaf weş aferiyayo, çî heyf ke çin beno

5 Felekî, **unsûrî, ber û eserê înan**  
**Xiltî**, xisûsiyetî, anaxtarê înan

Zaf weş yenê werê, benê pêser û pîya  
Lez abirîyenê, benê cêser û cîya

**unsûrî, ber û eserê înan:** Bi "unsûrî" çar unsûrê bingeyênî –herre, awe, hewa, adir- qest benê. Ber û eserê nînan zî "ziwa (herre)", "hît (awe)", "serd (hewa)" û "germ (adir)" (notê M. Emîn Bozarlanî)

**xiltî:** zerdawe, sewda, belxem û gonî rê vajîyeno (notê Kadri Yıldırımî)

Pêro zî serrişteyê cewherê beqayî  
Pêro zî sermayeyê îletê fenayî

Tayê giran ê, tayê zî şenik û xeffî  
Tayê nimite, tayê zî nazik û letîf

Gerçî her çar semedê ma kok û damar ê  
Her çar zî duştê yewbînan de aleyhdar ê

10 Adir bibo hewn a, hewa beno bê mana  
Awe bipeyso, herre çîyêk rê nêbena

Felekî sey arêyan, arêyî manenê  
Tim çerixiyenê, tim û daîm geyrenê

Zadê ê arêyî, merdimê serê erdan  
Binê erdî, verê kerra de çala ardan

O zad hebe bi hebe leqeno têdima  
Fekê ciwalî ra rişîyeno daîma

Çi ke rişîyeno beno lete û hurdî  
Yeno tehnayiş pêro, beno toz û ardî

15 Elawenê başebaş; gêno halê mîrî  
Gude bi gude beno qabilê adirî

Hebê zadî zêde ra ancenê ezîyet  
La terk nêkenê pîsîya xo rehet rehet

Welhasîlî kelam, ne merde yê ne cande  
"La yemûtu, yehya" vajîyeno Quran de

Labelê înanê temîzanê hêcayan  
Înanê hewlanê başanê mustesnayan

Citêr abirnenno, xisûsen weçînenno  
Erzeno pîzeyê herre, reyna rameno

20 Hetanî nêpuyîyê, nêbê çin û helak  
Nêresenê caran, nêbenê temîz û pak

Wexto ke girewt sere, rindarind derestî  
Kirişnenê cuwen, seba nan û nîmetî

Arêyê fekan, û çeqçeçoyê ziwanan  
Awa zereyê fekan, kemera didanan

Zîyade ra tehhnenê, zêde ra çarnenê  
Bajarê bedenî de, zêde ra geyrnenê

Kuwenê, tehhnenê; qet nêdanê ci eman  
Kenê hurdî û hurdîlek, mîsalê ardan

25 Welhasîlî, badê hende zor û zehmetî  
Gênê xo ser karî, cîya-cîya qewetî

---

**la yemûtu, yehya:** no qal Quran de vîyareno, Heqî tede behsê ce-henemîyan kerdo û seba kesê cehenemî vato 'O tede ne mireno ne zî cu-yeno' (notê M. Emîn Bozarlanî)

Qeweto antox zereyî het ser anceno  
Qeweto tepîşttox givişneno dejneno

Qeweto hemilker hezm keno, hemilneno  
Qeweto tehndayox heps keno, edilneno

Tendura madeyî rindek rindek pewjena  
Çiyê xirabê zêdeyî ci ra vejena

Devacor benê çiyê şenikê xefîfî  
Devacêr benê çiyê giranê kesîfî

30) Dima zî çiyê tewr letîfî cîya benê  
Abirîyenê û pêser ra vila benê

Oyo ke eyar keno germîya bedenî  
Oyo ke cîya keno pak û qilêrinî

Heme beden û wesilan ro vila kenê  
Heme hetan û cîhetan pê însa kenê

Hem qedehê zerrî hem dêzika cîgeran  
Bi meyê nesafî debenê giran giran

Welhasilî, ereqê şerabê heyatî  
Çilkeno sey şerbetê şekerê nebatî

35) Badê caameyişê nê kar û gureyan  
Na fine dore yena pîze û vêreyan

Cum beno, xo verdano deryayê awinî  
Zemanêk ra tepîya gêno rengê gonî

Demêk paweno, seba werê ameyene  
Bi nîzam û întîzam qey peyda bîyene

Wexto ke ame werê, mîsalê mircanî  
Bena eynaya eks-kerdox a tîja canî

O can çi teba yo? Nan û awa nebatî  
O nan û a awe zî çimeyê heyatî

40 Hetanî pîze de tebite û sekan o  
Werdê xo gonî ya, yewna çî nêwazeno

Wexto ke hêgayê pinhanî ra o sewze  
Xo mojneno û keno eyan, tern û teze

Ê sewzeyê neweyî, dem bi dem, bi gonî  
Awe danê, badê ameyişê cîhanî

Tenga ci de nêreso şilîya hetkare  
O do bibo sey xurmayêrêka bêbere

Gilê ci benê kewela, bi pel û **beran**  
Eke bi feyz bivaro ser, variş û varan

---

**ber:** berî, ber, mehsûl, fekî

45 Wexto ke o sewze bi sey leyanê geşan  
Beno mest û sermest, bi meyweyanê weşan

Ê meyweyî tawo ke resenê kemalî  
Benê eyna û eynika şewqê cemalî

Eger ke layiqê îzetê Emîrî bê  
Eger ke hêcayê huzûrê Qadirî bê

Mukafat û xelat ê; xo reyde çarnenê  
Bê wasita vejenê bi dîyar, berz gênê

Senî vetî dîyar, uca de benê **mehbûb**  
Nameyê xo zî o mekan de beno **meczûb**

50 Ê xurmayêrî, gilê ci zaf û xeylê yê  
Labelê peyda nêbenê, tay û tikê yê

O qayde ke mendî, ver bi va û hewayî  
Do bişorê mehserayê dej û cefayî

Lazim o ke bander bibê, û debiresê  
Bibê qabilîyetdar, terbiye bimusê

Bi tîja rojê şerîetî bipewjîyê  
Bi tîja aşma teqwayî zî bisociyê

---

**mehbûb:** sînaye, ezîz  
**meczûb:** cezbegirewte

Wexto ke rindarind derestî, pewjîyayî  
Gilê dare ra ameyî war, rişîyayî

55 Hetanî nêteriknayo qatê îzetî  
Hetanî ke nêbîyê yê herra zîletî

Caran nêbenê rayîrwanê terîqetî  
Caran nêşono mehsereyê heqîqetî

O tewir û o qayde dest bi dest geyrenê  
Ver bi ê meqamî game bi game şonê

Ê do zêde ra biancê dej û ezîyet  
Ê do aye ra pey bibê şeker û şerbet

O şerbet eger ke şîp û şîrin bo; xam o  
Ema eger ke tîrş û tehl bo; natemam o

60 Şono verê destê extîyarê meywerî  
Kupa pile de nîyeno serê adirî

Gama ke uca de rindarind keke kewt ser  
Wexto ke kupa pile ra vejîya teber

Zêdeyîya sifetan ra nezelîyeno  
Mesafeyê tecelîyatan kilmek keno

Welhasilî kelam, bi germîya cemalî  
Welahsilî kelam, bi şewketê celalî

Cewher ke tamamen bî perişan û heder  
Mîsalê erezî bî pasîf û tebatker

65 Heraretê cîya-cîya tecelîyetan  
Tanîya adir û cîya-cîya qewetan

Herre û harşike tehn danê bin, kenê war  
Bux û buxarî danê ser, vejenî dîyar

Eke bî pak û zelal, badê berzkerdişî  
Dore yena bi meqamê tenyamendişî

Wexto ke cewher abirîya erezî ra  
Ey dekenê bi zereyê **pota** newe ra

A pota her çiqas ke teng û tengela ya  
La qey meqamê fenayî deşta hîra ya

70 Eke gêno rengê surahî û şûşeyî  
Eke sûrek o yan zî meylidarê penbeyî

Hîna nêgirewto halê meyê tamamî  
Û hîna nêbîyo layiqê ê meqamî

Bimano tede halê verênî ra eser  
Hetê Heqî ra teba nêyeno çiman ver

---

**pota:** Qabo ke maden tede helênîyeno. Na çeku fariskî ra yena, ci rê "bûte" vanê. (notê M. Emîn Bozarlanî)



Çin bo meşrebayê wefayê padîşahî  
Nêşono bi meclis û sifreyê îlahî

Heta nêbo fanî, bi fenayê mutleqî  
Bincaran nêvînenno o, beqayê Heqî

75 Fanîyîye seba ci ra beqa ya helbet  
Baqîyîye seba ci ra fena ya helbet

Labelê ne bi **ittîsal** û ne bi **îlhaq**  
Bêguman ne bi **înfisal**, û ne bi **îtlaq**

Hinî miradê xo yeno ca, beno hasil  
Vînenno cayê xo, beno murîdo wasil

Ya Reb, se beno, bivîne halê ma koran  
Biance verê çiman ra perde û torran

Çimanê ma eciz û neçaran abike  
Beynate ra perde û perrûyan rabike

80 Wa behrê yeqînî pêl bido, bibo pêldar  
Ma zî seyr bikerê, û bibê temaşekar

Nê zanayîş û gumanî, îlm û teqlîdî  
Cayê xo bihewilnê, bi eynê tewhîdî

Nêmanê mabeyn de wesîle û sebebî  
Ma bi çimanê xo bivînê Musebîbî

---

**ittîsal, îlhaq, înfisal, îtlaq:** nê termê tesewufî yê. **İttîsal**, mewcûdîyetî hetê maddî ra Homayî reyra benê yew; **îlhaq**, mewcûdîyetî peyêna peyêna Homayî reyra benê yew û benê leteyêkê Homayî; **înfisal**, mewcûdîyetî hetê fizikî ra Homayî ra cîya biyê û peyda biyê; **îtlaq**, qûl Homayî reyde wayirê eleqeyî nîyo, serbest û cîya yo (notê Kadri Yıldırımî)

Bi zatê Wacibî esto îtiqadê ma  
Ma ver de bîyo perde **îmkanîyetê** ma

Ancîna destê ma ra, ti ma xelas bike  
Ya Reb, ti ma semedê xo ra, **xonas** bike

85 No şîyîş, kilmkerdişê rayîrê menzîlî  
Xasîyetê murîdê rayîrê îqbalî

Bi çi qayde ma rê beno qismet û nesîb?  
Eke ezel ra teqdîr nêkero Musebîb

Çimkî ne çiyê xirabî ne zî meqbûlî  
Nîyê bi goreyê fezîlet û fuzûlî

Îbadetkarî bi yew rîya benê helak  
Asêyî bi yew dua benê temîz û pak

Alem **xeyalo zil** o, kesî de nîyeno  
Homa rayîr ra vejeno, rayîr mojnen

---

**îmkanîyet:** estbîyayîş, mewcûdîyet

**xonas:** keso ke xo zaneno, keso ke xo nas keno

**xeyalo zil:** Verî, kayêko sey sînema bîyo. Parçeyanê çermeyê de-veyan ra yan zî kaxitanê reqanê sey kartonan ra şeklê merdiman virazî-yayê, perdeyêkê roşkerdeyî ser o nîşan dîyayê û terefê kaywanan ra bi layan leqnîyayê; la kaywan temaşekaran ra nêaseno. Kaywan goreyê he-reketanê şeklan û goreyê babete bi fekê şeklan qîsey keno. Coka nê kayî rê bi erebkî "xeyaluz-zill" yanî "sîya xeyalî" vajîyayo. (notê M. Emîn Bo-zarlanî)

90 O keno mumkin, manzaraya xeyaletî  
O yo keno pira, perdeyê delaletî

Labelê dayo ma **cuzê îxtiyariye**  
Nefsê ma bi fêlbazî û hîlekarîye

Berdo ma dest ra, ma bîyê kesê neçarî  
Ma mendê bi hêvîya Heqê mededkarî

Labelê baş o semedê ma hemeyan ra  
Labelê bes o semedê ma asêyan ra

Ewela ma Homayî bi heq nas bikerê  
Her çiqas ke ma qisûrin û gunekar ê

95 Dima zî bi zerrî û can ci ra bitersê  
Dînê xo kesanê aliman ra bipersê

Senî ke vanê, ganî ma eynen wina bê  
Hetanî ke rîyê dinya ser ra fena bê

Paştîya xo bidê Homayê lutifkarî  
Belkî ma nêdano destê adirê harî

---

**cuzê îxtiyariye:** No termêko îslamî yo. Manaya xo wina ya: Homayî her çî afernayo, la leteyêk îrade dayo merdîman, weçînayîşê rindî û xirabîye de ê serbest verdayê. Rindî û xirabîya ke merdîm keno, afernayoxê xo Heq o, la merdîm bi îradeyê xo ci ra hetêk weçînenno û keno (notê M. Emîn Bozarlanî)



SEBA KITAB Û NAMEYÎ QALA PEYÊNE  
BI HAWAYÊ QELEME REYDE QISEYKERDENE

GERÇÎ AMANC QEDÊNAYIŞÊ QALAN  
LA XETÎB O MEQSEDÊ QALAN



Ey esparo eslen bi **qismê peyadeyan**  
Wey aşiqê pel û rîpelanê sadeyan

Ey şaîro ke sere ver de ameyo war  
Wey hurmetnezano şerpezeyo efsûnkar

Ey şaş û ewareyê newala dalalî  
Wey naşî û nezanê dawaya kemalî

Ey qelema sertiraşkerdaya reşrengê  
Bes, to kaxita sey qumaşî ya weşrengê

5 Bi nameyê bisk û birûyan gemirnaye  
Bi "**bê**" û "**dal**"an zîyade ra nemirnaye

---

**qismê peyadeyan:** Qisimê peyayan ra; keso ke eslen peya yo.  
Xanî na rêze de seba xo vano "Ey keso esparo ke eslen peya yo"

**"bê" û "dal":** Di herfê alfabeyê erebkî yê, wexto ke ameyî têhet beno "bed" ke na çeku bi fariskî ya, yena manaya "xirab", "nebaş"

Çiqas ke nuşteyê to **xubar** û hurdî yo  
Û çiqas ke weşikîye ra zî dûr nîyo

Gama ke sey **meşqî** zêde û zîyade bo  
Mîsalê **nesx** û **sulsî** gird û qerase bo

Xeripneno rîpelê rindî û cemalî  
Çin o tede eserê roşnî û kemalî

Lazim o dilberê sadeyê sey perîyan  
Xetî pira nêbê mîsalê gerdenîyan

10 Rind ê rîyê sey aşme ra xetê sadeyî  
Nîyê ser û çîman ra mîsalê reşmeyî

Ey qelemê, to zêde ra kerd derg û dirêj  
Sawit pelan ra zêde ra qilêr û qirêj

Wazena cewher bo qisa, wazena durr bo  
La bêqîymet a, wexto ke zêde û pîrr bo

Ma ti nêvînena, biqîymet o cewahir  
Çîmkî peyda nêbeno, şenik o, û nadir

---

**xubar:** Na çeku bi erebkî ya, manaya xo "toz" o, la sey termêk bîya nameyê tewirêkê nuşteyê alfabeya erebkî yê hurdîyê weşikî (notê M. Emîn Bozarlanî)

**meşq:** Nuşteyo ke şagirdî pê nuştîş musenê. Malim serê ripelî de sey nimûneyî rêzêk nuseno, şagirdî zî eynî rêze hetanî cêr nusenê û banderê nuştîşî benê (notê M. Emîn Bozarlanî)

**nesx û suls:** Di çeşîtê nuştîşî yê ke herfê xo zaf gird ê (notê M. Emîn Bozarlanî)

Çiyo ke vîr ra şono, çîyo şaş û xelet  
Suc û gune, çîyo ke qebûl nêbeno qet

15 To nusna yew bi yew, bê fikir û bê usûl  
Kam kes do pê bikero, sebir û tehemul!

Pê na kerdena to çi kes qayil nêbeno  
"Helal bo to rê" nêvano, qebûl nêkeno

Ey bêedeba bêterbîyeya bêare  
Ey ziwanderga sîtemkara sîyakare

Çende ke mi serê to taşt, terd û terişna  
Hende zî to çîyo xelet kerd û nivîsna

Çende ke serê to kerd tûj seba nuşteyan  
Hende zî ti bîya meyildara guneyan

20 To fehşî û şaşîye kerde sey Xanîyî  
Nîgarkêşîye kerde mîsalê Manîyî

Hinî bes hende keleş, hende yariye  
Tobe bike na xeletî û xirabîye

Dê bikewe serê raya tobekerdene  
Hîna ke nêameya to dora merdene

Dore ameye qelema reqîbe dima  
Qisayê têvernayîşî kewtî para ma

A dilawera serfiraza şêrgelîye  
Ewilî girê da, kemerê çimsûrîye

- 25 Nişte **Dundila** serê giştan, bîye suwar  
Desinde hemverê ma de bîye cengawer

Desinde ant ziwane xo ra **Zilfiqarêk**  
Duştê ma de bîye dişmen, sey şehsuwarêk

Hêrs bîye û sûyê xo ard, pê ê gazinan  
Bi nê qisayan fekê ci de geyra ziwane

Vat: "Ehmed, ti ke keso xebîs nîyê eger  
Mi çiyêk nênuşt, qalanê to ra teber

Qalê to eger ke baş ê, eger ke xirab  
Fê'lê to eger ke şaş ê, eger ke sewab

- 30 Ey **xirab-emelo**, helbet ti hewl zanenê  
Vatox û kerdox ti yê, wayirê înan ê

Memleketê neyan de, zil û ney bîya ez  
Şerabweran ra dûr, şerab û mey bîya ez

To ke ez cira kerda, neyîstan ra arda  
Yê mi ne veng û vaj bî, ne zî sewt û seda

---

**Dundile:** Estora Hz. Elî ya. Ehmedê Xanî na rêze de serê giştan şibênayê Dundila Hz. Elî. Qeleme ke girewta xo dest, no yeno a mana ke weništa Dundila serê giştan, dest bi ceng kerdo.

**Zilfiqar:** Şimşêrê Hz. Elî. Ehmedê Xanî cengawariya qeleme şibênayo cengawariya Hz. Elî. / **xirab-emel:** emel-xirab, keso ke emelê xo xirab o

To ez vista dûrî, hem dost hem zî yaran ra  
To ez kerda cîya, hem ca hem zî waran ra

Hem girê hem movikê mi, seraser pêro  
**Bi "kun"** to qul kerdî, qulîkî nayî piro

35 Dima to ez girewta arda baxê eşqî  
To no zereyê mi qul kerd bi daxê eşqî

A gama ke to puf kerd, bedenê mi ra can  
Ame bi zerrîya mi ro, feryad û fîxan

Nefesê to zereyê mi veşnayo soto  
To ke çi teba puf kerdo, mi zî o vato

Ez lal û bêziwan a, cinsê xilmaşan a  
Bêcan û bênefes a, cinsê qamîşan a

Meclisê keyf û şaşîye, pê mi to kerd weş  
Kitabê suc û guneyan, pê mi to kerd reş

40 Her çiqas ke ez esta, mewcûd a zahiren  
Labelê mîsalê neyî ya, ti yê neyçen

Ma ney xo bi xo ceneno vano çi caran!  
Ma qeleme xo bi xo kena war dilopan!

---

**bi "kun"**: Bi fermanê "kun"î, yanî bi fermanê "bibe".

Heq wexto ke çiyêk aferneno, senî ke ci rê vano bibe û bi ê fermanî  
aferneno, to zî ez winî qul kerda (notê M. Emîn Bozarslanî)



Suc erzeno vileyê qeleme nuştekar  
Labelê neycenî dest ra ney keno hewar

Hem ney û qelemî, hem kitab û nîşanî  
Hem hedef û kewanî, hem tîr û tîrdanî

Bîyê mehkûm bi teqdîrê Heq tealayî  
Hîna ke name nêbîyê suc û guneyî"

45 Ya Reb, ti zanenê Xanîyê jarê jaran  
Halê ey, halê qelemanê girîftaran

Qelbê ey, ey dest de yo bêşik û bêguman  
Îradeyê ey, ey dest de nîyo bincaran

Game ke to kerd wayirê qeleme musna  
Çi teba ke da vernîye, ey zî o nusna

Amir ti yê, o bi fermanê to mamûr o  
Merdimmo mamûr zî tim û daîm mazûr o

To dayo bi ey leteyêk îrade helbet  
Ey zî teslîmê to kerdo, kerdo emanet

50 Xanî eger ke qelem o, eger ke ney o  
Bi xo çiyêk nîyo, aletê destê to yo

Kar û zîrarê xo bincaran nêzaneno  
Seba xo ra çiyêkê başî çî zaneno!

To ke çi teqdîr kerdo, çi vato, çi dayo  
Xanî mîsalê neyî yo, bi o hawa yo

Hem bi sipîyî hem bi sîyayî willahî  
Meram û meqsedê ey ti yê, ya Îlahî

Labelê bi murekebê gunekarîye  
Nayo ripelan ro, rengê şewa tarîye

55 To dayo bi ey ver, **nimûneyê nuşteyan**  
Hîris serrî yo, xelet nuseno o nezan

Gama ke xeyb ra abirîya ame cîhan  
Hezar û şeştî û yew bî, tarîx o zeman

Emrê ci emser resayo çewres û çaran  
Yê Xanîyê ser û serdarê gunekaran

Zêde ra ardo pêser mal, bi fê'lê şaşî  
Yew pûlê ci zî çin o, bi emelê weşî

Ewîfî, to dayo, bi eşq dest pêkerdene  
Axirî, bide, bi husn peynîye ardene

## PEYNÎ



---

**nimûneyê nuşteyan:** Meşq. Nuşteyo ke malim serê ripelî ra nuseno, şagirdî zî bin de rêze bi rêze eynî nuşteyî tekrar-tekrar nusene û banderê nuştişî benê.

Ey saqî, ti Homayî kenê kerem bike  
Zî îskan û qedehê Cemî bi meq deke

Dê awa qedeh zî bi meqî cihannuma. bo  
Dê awa bext û qederê ma. pê eşkera bo

Wa bibo eşkera ma. ver de hal û hewal  
Wa biyero zanayene qeder û iqbal

Bêqbalîye rosaya gama. peyêne,  
Ecêba hinî merg' o, yan hinî merdene?

Ecêba tim wina sono, tim wina beno,  
No çeracê felekî tim-tim wina geşreno?

Ecêba mumkin o ke bext ma. de bibo yar?  
Yew estare semedê ma. ra bibo diyar

Dê awa semedê ma. zî bext bibo dost û yar  
Dê hinî bibo aya hewn ra, bibo hişyar

Birejûyo ma mîyan ra sîyêk-sitarêk  
Peşda bibo ma. ra padîşahêk, serdarêk

Şarê hunerê ma. biyero ronayene  
Zederê qelema. ma. biyero zanayene

Derd û kulê ma. birîno daru û derman  
Îlm û îrfanê ma. bibo yê serê destan

